

mandam
Experi








Pharmacopœi Parisienſes

Ex Dono Magistri
GILLET

1765







DAVIDIS von der Decke . D .
 Experimenta et Meditationes,
 circa Rerum Naturalium Principia.



11264
DAVIDIS von der Becke/
Mindani,

EXPERIMENTA
ET
MEDITATIONES,
CIRCA
NATURALIUM RERUM
PRINCIPIA.

Quibus

Quæ circa fixi & Alcalisati Sa-
lis, ante calcinationem in misto præexisten-
tiam, ac Causas Volatilisationis, obscura
aut dubia esse poterant, clarè
solvuntur.


Nutu Illustrissimæ Societatis Regiæ
BRITANNICÆ.



HAMBURGI,

Ex Officina GOTHOFREDI Schulzen/

Anno M. DC. LXXIV.



ILLUSTRISSIMÆ
SOCIETATI

REGIÆ
BRITANNICÆ,

Ad

MATHEMATICA, PHYSICA,
MEDICA STUDIA PRO-
MOVENDA;

GENERISQUE HUMANI
• COMMODA AUGENDA
INSTITUTÆ,

Quem plerique hodie morem
habent; *Studia sua & cogi-
tata Celeberr. Vestr. Nomi-
nibus dicantes; ut à meritorum Ve-
strorum in universum orbem, inde-
que debitarum laudum enumeratio-
ne Scribendi initium faciant, hunc
ego non imitabor. Non, quod ullum
genus laudis, vobis non debitum,
esse; aut à quopiam excogitari posse
existimem; (Cujus enim tantum esse
potest flumen ingenii? cujus tanta
scribendi aut dicendi vis, tantaque
copia, quæ, non dicam exornare, sed
enarrare saltem, innumera Vestra,
in Rempubl. literariam, beneficia,
possit?) Sed quod exempla me ter-
reant illorum; qui, cum quandoque
conarentur, in omnibus ac singulis
meritis Vestrīs recensendis, omnes
ingenii sui vires; quantumque in
dicendo valerent, experiri; postea
verò, omnem ætatem sibi, ad præ-
dican-*

dicanda illa & recolenda, futuram
adverterent, rei difficultate perter-
riti, in ipso dicendi limine defece-
runt. Qui tamen satius, Vestris-
que meritis dignius fecissent, si omni-
no tacuissent; quod metuendum sit;
ne alii, meritorum Vestrorum ma-
gnitudinem, dicentis eloquentia di-
mensi, secus de iis sentiant ac debe-
bant. Hoc certè celare non possum
aut diffiteri; nec debeo etiam, Singu-
larem fuisse illam Vestram, in me,
ignotum vobis, humanitatem, quam
abundè testati estis; cum pagellas
meas, tenues admodum, nulloque
studio elaboratas, (quòd ad Virum
mihi, meisque conatibus amicis-
simum Excell. Langelottum dandæ
essent,) circa fixorum Salium vola-
tilisationem occupatas, non tantum
inter Acta Illustriss. Societ. Vestr.
Philosophica, locum aliquem tenere
voluistis; Verum etiam, ad ea, quæ

dubia aut obscura videri poterant, clarius ac Solidius explicanda, gravissimi juxta ac humanissimi autores extitistis.

Quæ Vestr. in exteros humanitas, quemadmodum, nullis unquam literis atque linguis, celebrari satis potest; ita eâdem accensus & incitatus, non circa fixorum Salium naturam saltem investigendam, aut quâ ratione volatilia reddi debeant, vires meas experiri, decrevi, sed ipsa prima etiam Naturalium rerum incunabula perscrutari, animum induxi. Quo successu, hætenus quidem ignoro; Rem enim aggredior, quemadmodum totius Philosophiæ Naturalis Nobilissimam, ita pariter & difficillimam. Cui sustinendo oneri ego certe non essem, nisi in Vestra eâdem humanitate, robustissimi fulcri, spem quandam non incertam, collocatam haberem. Hæc ne excidam, face.

facere potestis Viri Illustr. quando hoc, quicquid est meorum conatum, benevolè suscepitis.

Ad Vos, tanquam in tribunali sedentes, universus literatorum confluit Orbis, & cogitata sua, gravissimis judiciis Vestris submittit. Vos non Germaniam modò, ad optimarum artium, ac Philosophiæ Naturalis solidam cognitionem incitastis, sed Galliam quoque; quin universum terrarum orbem è somno excitastis, ut ea apertis cernantur oculis hodie, quæ ne in somniis quidem ante visa cuiquam fuerant. Quod certè non Exemplo tantum Vestro, sed singulari quoque Humanitati, quâ singulorum conatus prosecuti, nullius adspernati estis, debetur.

Quare, qui universo hætenus Orbi præsidium quoddam fuistis, & semper eritis; nolite per Vos accidat,

*ut ex innumeris uni, defuisse dicamini,
aut saltem videamini.*

*Quod si à Vobis impetravero,
(neque enim certa spes me fallere pot-
est) tantum me vitæ fructum conse-
cutum existimabo, quantum quis ta-
citus optare ausit. Valete Viri
Illustr. E*

Hamburgi, Calend.
Martij 1674.

Vobis

devinctissimo, favete

DAVIDI von der Beeke.

PRÆ-

PRÆFATIO

LECTORI Sal.

ANtequam ad secutorum lectionem accesseris B. L: unicum te novisse oportet: *Prima hinc saltem offerri tibi cogitata, neque tanto, quanto quidem fieri poterat, studio elaborata.* Quo ipso quidem non deprecor, locutionis ruditatem, quodque nullum, orationis florem, me secutum deprehensurus sis; Cum ab initio statim, unicam mihi sectandam *Veritatem* decreverim, quæ nullis indiget verborum fucis. (simplex enim est; Mendacia verò sub phalerato dicendi genere in animos hominum irrepunt) Sed si forte non eo ordine omnia disposita observaveris, qualem desiderares; aut in aliis humani quid me passum adverteris, æquo hoc animo feras, qualem
tu à


tu à me exspectares si meo loco stares. Quod si à te impetravero, aliorum, qui nihil, nisi quod ipsi faciunt, rectum putant, prævifa jam tela minus nocebunt. Sed à bonis nihil mihi mali extimescendum erit; pessimorum verò hominum, quive *Herastro* similes, cum nihil laude dignum præstare possint ipsi, in aliorum conatibus retardandis, turpissimam gloriam quærunt, contumelias, adeò non defugio, ut etiam æquissimo animo laturus sim. Quemadmodum enim, illa demum vera laus est, quæ proficiscitur ab iis, qui ipsi in laude vivunt; ab hominibus verò, frugi parum, quæ contingit nobis, non laus, sed summa vituperatio potius habenda est; Ita non parvam hic gloriam consecutus, dicendus erit, qui à levissimo quoque, injustè calumniis lacesitus fuerit. Quare si cui lubi-
tum

tum fuerit convitiari, per me licebit,
animi sui impotentiam turpissimam,
prodere, totique literatorum Orbi
demonstrare, quam solidis Ratio-
nibus ac Experimentis destitutus, ni-
hil præter convitia, in pagellas no-
stras jacere possit; More canum, qui
quamvis nocere nequeant, latrant
tamen. His verò ne respondere
quidem deliberatum est. Quid enim
mihi cum vetularum rixis? aut si
me . . . calcitraret; num in jus
vocandus esset? Nullius boni Viri,
famam aut existimationem, hæ pa-
ginæ lædunt, neque illorum etiam
à quorum sententiis divortium feci;
câ enim hoc factum est modestia,
quâ fieri potuit aut debuit, ut nemo
jure mihi propterea succensere de-
beat. Quod si verò, à recepta Phi-
losophandi ratione, me recessisse,
ægrè quis laturus sit; hunc memi-
nisse velim illius *Lactantii* l. 2. *Di-
vinar.*

vinor. Institut. quod habet ; Sapientiam sibi adimunt , qui sine ullo iudicio inventa Majorum probant , & ab aliis pecudum more ducuntur , sed hoc eos fallit ; quod Majorum nomine posito , non putant fieri posse , ut aut ipsi plus sapiant , quia Minores vocantur ; aut illi desipuerint , quia Majores nominantur. Quicquid sit ; Maximum mihi erit , & invictissimum in veritate , præsidium ; Quamvis enim mille Demosthenes ac Chrysippi , totidemque Aristoteles omnes Eloquentiæ ac Argumentorum vires conferrent , ne minimum quidem experimentum , ita labefactare poterunt ac evertere , ut quod verum erat , falsum evadat.

Quare Vale Lector , & postquam legeris judica. Quod si vera tibi dixisse visus fuero , in eandem me-

mecum condescendas sententiam ;
Sin secus ; fatius est oculos ac men-
tem avertisse ; quamquam te non fa-
cile hoc ante facturum credam,quam
probè à capite ad calcem perlectis &
intellectis omnibus qualè illud , quod
repudiandum sit, intellexeris. Iterum
Vale.



Æquo Lectori.

Quanta etiam in typographicis erroribus ex hoc libello eliminandis, tum à me, tum ab aliis adhibita fuerit diligentia, neq; tamen à typographis impetrari potuit, quamvis amicè ac diligenter monitis, ut qui sæpius exserto velut digito, ipsis ostensi erant errores emendarentur. Commata enim deprehendi omiſſa, transpoſita, quin aliquot in locis ſenſum corruptum ferè, & quid non? ferenda tamen hæc fuerunt, quod mutari non poſſent. Hoc ſaltem obnixè rogatum volo Æquum rerum arbitrum, ne mihi quæ aliorũ culpâ omiſſa vel commiſſa ſunt, imputet: communis librorum fati recordatus. Vale.

D A V I D I S

vonder Becke

EXPERIMENTA & ME-
DITATIONES circa Natu-
ralium Rerum Princi-
pia.

Naturalium rerum dari Prin-
cipia nemo est Christianus
Philosophus qui dubitet :
Mundum namq; huncce non
ab æterno fuisse, sed cœpisse
aliquando ac in tempore à Ter Optimo,
Terq; Maximo Deo ex Nihilo negativo
creatum esse novimus. Neq; etiam igno-
rare possumus, cuncta quæ videmus cor-
pora, non simplicia esse, sed composita,
ortus namq; rerum ac interitus luculen-
ter satis hoc ipsum ostendunt. Cum ve-
rò omne compositum è simplicioribus
se sit conflatum, necesse erit, ut quæ sim-
plicia sunt, compositis priora sint, & quò
quæ res simpliciores sunt, eò cœteris pri-
ores sint, ac tandem cum consentienti-
bus

bus cunctis sanè ac Christianè philosophantibus, à progressu in Infinitum Natura abhorreat, illa quæ in priora alia tanquam simpliciora à nobis resolvinequeunt, omnium Prima dicantur. Adeòq; citra dubium illa Naturalium corporum vera Principia & genuina constituentia erunt, quæ in rerum naturalium ordine simplicissima sunt, seu in quæ ultimatò res corporeæ resolvuntur, ut in alia priora resolvi nequeant.

Quænam verò illa sint, acerrimè de hoc inter se digladiantur Philosophi. Nolo hîc tot discrepantium à se invicem sententias recensere, neq; adeò ex veterum memoria repetere, quo jure, quâve injuria *Anaximander* rerum Principia dixerit esse infinita, aut *Anaximenes* infinitum aërem rerum Principium esse docuerit; neque *Hipparchi*, *Heracliti*, *Ephesii* Ignem; neq; *Anaxagoræ* & *Clazomenii* infinita Principia, tanquam particulas minutas & confusas, sed Divina mente in ordinem redactas; Neq; *Leucippi*, *Diodoti* & *Democriti* plenum & vacuum; neque *Diogenis Laërtii* aërem Divinæ rationis compotem; neq; *Pythagoræ Samii* numerum

rum hûc afferam, utpote quæ nostro Seculo vix defensorem aut patronum habent: Sed hoc saltem præterire non possum, neq; hodiè etiam inter doctissimos viros, circa naturalium rerum Principia compositam litem esse, quin adhuc sub iudice sit. Ita sunt, qui quatuor rerum naturalium Principia Ignem, Aerem, Aquam & Terram docent, quibus pro expediendis naturalium rerum difficultatibus Peripatetici potissimum nituntur, Cum tamen summis aliquibus ingeniis obscuriora hæc & rudiora viderentur, ut ad secretiores Naturæ recessus, hâc via aditus sibi reclusum iri omninò diffiderent, sepultam jam dudum Democriti ac Epicuri Philosophiam, corporum naturalium principia *atomorum* modo *rotundarum*, modo *acuminatarum*, *quadratarum*, *cylindricarum* consortio vel diversio tribuentem, è tumulo in lucem revocârunt. Præter hos reperiuntur alii, corporibus resolvendis operam dantes, docentesq; resolvi corpora posse in *Sal*, *Sulphur* & *Mercurium*, atq; adeò tria rerum principia esse; quibus se opponunt alii, in plura simplicia *Spiritum*, nempe, *Sal*,

Sulphur, Aquam, Terram reduci corpora posse, adeòq; quinq; rerum Principia demonstrantes. Neq; tamen desunt, qui & hos terminos justo angustiores arbitrentur, dicantque è succo v. g. uvarum præmissa fermentatione separari *Spiritum fragrantem, Oleum, Aquam acidam, insipidam, Sal fixum, volatile, Tartarum, Terram* &c. adeòque plura Principia ponenda esse. Contra sunt, qui terminis quam arctissimis, rerum naturalium initia definiunt docendo: Cuncta corporea ex unico universali Principio *Aqua Elemental*i, tanquam causa materiali, auxilio *Seminum fermentorum* prodiisse, ita ut universam hanc in mundo scenam, *fermenta* per *Semina* sub uno *Aquæ* elemento ludant.

Atq; inter tot maximorum ingeniorum divortia, non levis difficultas oritur, in cujus sententiam descendere debeamus. Ego quidem in animum non induxi, ullius sententiam examinare vel oppugnare, huic enim imparem me lubentissimè profiteor, qui adeò neminem docere ausim, ut etiam à quovis doceri eupiam; nihilominus tamen ut ultimæ huic calculum meum adjiciam multa me

cogunt. Neq; enim hoc, quod invictissimis Experimentis æque ac Rationibus demonstrari potest: Cuncta corpora nempe ex *Aqua* tanquam materiali, & *Seminibus* tanquam formali, causis *fermentorum* auxilio conjunctis constare, obscure ferendum est. Quod ut tantò clarius patere cuivis possit, propositum mihi est, publicè hanc rationem reddere, quare cæterorum sententias deferendas censeam; hancce ultimam verò accipiendam: quos Deus conatus secundet! Potiora tamen saltem attingam, ut citra obscuritatem brevis sim.

Constat verò pleraque cæterorum Principiorum ita esse comparata, ut citra artem, ac Ignem Chymicorum cultum anatomicum accedentem, omninò in corpore naturali formaliter ante calcinationem non tantum non deprehendantur, verum etiam in alia se priora redigi possint, quod tamen à natura Principiorum immensum distat. Cum enim Principii Causalis natura sit, ut ex eo res naturales primò producantur, atque in idem ultimatò resolvantur, omninò sequitur, quod quæ formaliter composita

non insunt, sed Ignis actione ac arte demum producuntur, quæq; in alia priora resolvi possunt, inter genuina corporum naturalium principia tolerari haud queant.

Quod enim *Spiritus illos vegetabilium ardentcs* per destillationem paratos attinet, tali forma illos formaliter ante manum artificis accedentem in misto præextitisse dici non potest; neque enim demonstrari possunt. Sed firmiter tenendum est, illos demum ex oleis in phlegmate proprio resolutis productos fuisse. Oleorum quidem unctuosæ substantia, aquis per se uniri nunquam poterit, nisi accedat fermentatio, quâ oleosæ particulæ omnimodè recluduntur, atque sic phlegmati (sine quo Salium in fermentatione nulla actio esse poterat) uniuntur. Sed videamus rem propius. Lavendula, Ruta, Majorana, nunquam per se dabunt spiritum, citra fermentationem, ast benè oleum; quamprimum autem accesserit fermentatio, non oleum sed spiritum ardentem impetramus, manifesto indicio, oleum sulphureum ardens, in spiritum sulphureum ardentem muta-

mutatum fuisse, quorsum enim oleum abiisset? non abiisse verò, sed in phlegmate solummodò resolutum fuisse, ex eo patet, quod aëris diuturniori actione accedente olea phlegmati superstiri denuò innatent. Manifestissimum tandem dictorum testimonium est sequens, quod olea rebus in fermentatione existentibus, modica quantitate affusa simul in spiritum abeant. E quibus meridiano Sole clariùs elucet; spiritus illos vegetabilium ardentes, non in spirituum forma, sed olei potius in misto latuisse.

Neq; huic obstat, quod ope Spiritus Vini citra fermentationem, vegetabilium v. g. Absynthii, Anisi Spiritus, confici queant, hoc enim priorem sententiam adeò non destruit, ut etiam egregiè confirmet. Spiritus vini enim quando ab aromaticis ejusmodi ac oleosis abstrahuntur, conjungunt sibi olea ista aromatica, atq; secum per alembicum rapiunt. Cum enim Spiritus Vini ipse sit oleum vini (quod ex vino Rhenano Bacharacensi, utpote generoso manifestè separari potest) in phlegmate resolutum, facile hic alia vegetabilium olea absorbet, cujus

A 4

quoq;

quoque extra Ignem facillimum experimentum fieri potest, si Spiritui vini summe alcolifato, guttæ aliquot olei cujusdam aromatici instillentur, non innant illæ Spiritui vini, sed protinus ab eo absorbentur. In præparatione Spiritus anisi adhuc evidentius sententiæ hujus veritas observatur. Cum enim Semini Anisi, affunditur Spiritus vini, hujus oleosa seu spirituosissima pars, recipit partem olei tantam, quantam per modum suæ receptivitatis potest, quod verò ex oleo Anisi reliquum fuerit (Anisi enim semen maxima olei quantitate turget) cum residuo Spiritûs vini phlegmate conjungitur, & liquor lactescit, more omnium oleorum cum aqua mistorum, uti quotidiano in Emulsionum præparatione experimento patet. Oleosæ huic aquæ, si novus Spiritus vini alcolifatus affunderetur, procul dubio hic oleum ex phlegmate sibi uniret, & novum Anisi spiritum constitueret.

Patet itaq; *Spiritus* illos Vegetabilium ardentes sub Spirituum forma in mistis non præextitisse, sed per fermentationem demum, aut mediantibus Spiriti-

bus vini oleosis, ex oleis eorūductos fuisse, adeòq; inter vera corporis naturalis principia stare non posse.

Et quamvis in misto formaliter præ-existissent hi Spiritus, neque tamen genuini Principii nomen sustinere possent, cum sint corpora composita, adeòq; actu in substantias simplices componentes resolvi possint, quod certè non Principiis, sed Principiatis saltem competit. Manifestissima namq; foret contradictio, unam eandemq; rem & esse Primum corporis naturalis Principium (de hoc enim sermo est) cujus necessaria conditio sit; non posse in alias partes priores ultimatò sensibiles resolvi, & tamen in ejusmodi particulas posse resolvi priores ac simplices. Hoc verò inditis vegetabilium Spiritibus observam⁹; hi enim sulphure quodam ardenti constant, alioquin flammam concipere non possent, & deinde in Sal volatile abeunt, more oleosorum omnium aromaticorū præcipuè. Atq; adeò non tam pro Principiis quam Principiatis habendi erunt.

Præter hos verò arduos vegetabilium Spiritus oleosos, dantur quoq; alii per-

Plantarū incinerationē facti, adeòq; effluviis
cœteroquin in aërem abituris constantes.
Spiritus hi, ejusdem planè cum Spiritu
fuliginis veletiam Tartari genuini alcali
sunt indolis, iisdemq; omninò Salibus
constant; neq; adeò realiter à Salinis
particulis separati in misto exstiterunt;
sed orti sunt ex fuligine adscenden-
te, dum herbarum Tartarus per Ignis cal-
cinationem cremaretur, ad reductionem
usq; in Sal fixum. Adeòq; nihil sunt ali-
ud quam Salia volatilia Tartari planta-
rum in phlegmate, s. parte Mercuriali à
Semine vegetabili nondum coagulata
seu maturata, resoluta. Ut paucis rem
complectar, sunt Salia liquida. Nemo
verò mirabitur, quod Tartari plantarum
mentionem fecerim, cum communiter
alioquin solis vini facibus Tartari no-
men tribui soleat, neque enim hoc citra
rationem factum. Quemadmodum e-
nim in succo uvarum, mechanica illa
Naturæ instrumenta Alkali & Acidum,
s. Aqua & Ignis mutuò coagulata Tartari
nomine salutantur, ita quoque nihil im-
pediet, quo minus hoc in aliis vegetabi-
lium succis iisdem plane Salibus, Semi-
nibus

nibus nihilominus diversissimis, imbutis liceat. Salia quidem è succis parata nonnullis Salia essentialia vocantur, quod etsi non improbem, miror tamen Zvvelferum, quod Salibus è succis paratis v. g. Acetofellæ, nomen Essentialis Salis concesserit, qui tamen nihil aliud sunt quam Tartari herbarum, atque aliàs Tartarum vini ordine Salium excluserit. Rectius docet Tartarologia Salæ: ex quolibet vegetabili succo, Tartarum quendam illi ex vino orto omninò similem, parari posse; qui tamen & ipse hosce dictos Tartaros Salium censu excludi non veretur, quanquam rationibus nitatur parum solidis, quas ne prolixior sim, hîc examinare non licet. Hoc saltem liceat hîc notare unicum, Vegetabilium succis omnibus Tartarum inesse talem, qualis inest vinis, adeòque *spiritus* illos *per vegetabilis incinerationem productos* prout Spiritum Tartari vini, è suis Tartaris iisdem omninò Salibus Acido & Alkali constantibus ortos, proindeque Spiritus illos revera Sales fluidos esse.

Quod si ita est, uti revera est neque hi Spiritus rationem Principii corporis
natu-

naturalis distinctam habere possunt, cum à Salibus volatilibus æque ac priora olea, essentialiter non differant. Hæc si cui obscuriora visa fuerint, clarissima tamen evadent, quando in subsecuturis de generatione fixi Salis Tartari, ex colliquatione volatilium, dicendum erit; ubi rêverâ patebit effluvia illa in Tartari calcinatione abeuntia, mera Salia volatilia esse, quæ cum particulis terrestribus si fuissent colliquata Alcalisatum Sal inde prodiiisset. Tartarorum interim Spiritus, è Salibus Acido & Alkali volatilibus constare, si quis velite esse certus, abstrahat saltem Spiritum Tartari genuinum ab Alcalisato Sale & Acido Spiritus Sale volatili in Alcalisato Tartari relicto, urinosum Sal volatile nares feriet.

Secundum itaque Principium *Sulphur* quod attinet qua ratione in misto præexistiterit investigandum erit. Advertendum tamẽ est, in *vegetabilibus*, *Mineralibus* ac *Animalibus* magna quidem copia, *Sulphura* reperiri, atq; nullâ ratione, genuini corporis naturalis Principii nomen sustinere posse. Possunt namq; dictorum omnium *Sulphura* in alias particulas priores

res redigi, quo ipso Principii nomine ex-
uuntur. Et olea quidem vegetabilium,
quæ potissimum consentientibus Philo-
sophis omnibus, vegetabilium Sulphura
constituunt, essentialiter sunt Salia vola-
tilia concentrata, quod præter experien-
tiam docet Subtiliss. Helmont. pluribus in
locis, præcipuè etiam c. 14. de febribus.
*Si novetitis inquit olea vegetabilium mutare
in Salia volatilia (quæ nunquam vidistis) na-
tæ eritis medicamentum, &c.* Inest tamen
oleis inflammabile quoddam acidum,
per quod ardent quodque unctuositate
sua, Salia hæc oleorum volatilia deti-
net, quo minus Salium cunctorum ritu
cum aquis promptemisceri queant. Quod
unctuosum oleorū acidum, etsi loco Sul-
phuris vegetabilis stare posse cuiuspiam
videri possit, quia tamen in prius aliud re-
digi potest, aquam nempe elementalem,
de quo in progressu discursus nostri plu-
ribus disserendi ansa præbebitur, prin-
cipiorum ordini interferi non potest. O-
lea igitur f. *Sulphura* vegetabilium, cum
in alia priora Sal volatile videlicet & A-
cidum volatile inflammabile dividi pos-
sit, Principiata potius quam Principia
salutanda erant.

Repe.

Reperitur quidem *in carbonibus* lignorum combustorum *Sulphur* quoddam *vegetabile*, antequā in cineres convertantur, cujus beneficio candent carbones, quodque auxilio Alcalium & præcipitationis inde separari potest, verum neq; hoc *Principium* quoddam *Sulphureum* constituere potest, cum & ipsum abeat in spiritum acidum, more Sulphurum omnium cujus certum experimentum fieri potest, si carbones Retortæ indantur, Igneq; aperto destillentur, prodit enim tum Spiritus acidus cum phlegmate. Spiritus hic separatus in Sal coagulari, & tandem omninò in aquam elementalem converti potest. Postquam enim spiritum illum è carbone acidum impetraverimus, Caput carbonum mortuum, copiam Salis fixi, excolliquatione Acidi & Alkali lignorum, cum particulis terrestribus, continebit quod aqua elui potest. Huic Sali fixo si addatur spiritus ille acidus è Sulphure carbonum productus, effervescent mutuò ac coagulabuntur in Sal, adeoq; nulla ratione neq; hoc carbonum Sulphur, pro genuino principio haberi poterit, cum à Salino Principio non differat.

Eadem

Eadem prorsus ratione; *Animalium Sulphura*, olea scilicet & pinguedines, revera nihil aliud sunt, quam Salia volatilia, cōcentrata alcalia, ab occulto quoad sensus acido saltem sale pingui paulisper suppressa, quo minus cum acidis manifestis éffervescere possint. Saliaverò hæcce volatilia eadem omninò ac oleorum vegetabilium, ratione manifestari possunt. Quamvis nonnunquam videamus axungiam v.g. Canis vitrio inclusam radiisq; Solaribus aliquantisper expositam in Sal quoddam volatile sublimari per se, citra ullam aliam artem accedentem; cui Sali volatili unicè debetur, quod ex usu axungiae caninae, Phthisicorum exulcerari pulmones, levamen quandoq; experti fuerint. Ita CC. etiam oleum in Sal volatile sublimari potest. Quare nec *Animalium Sulphura* Principii loco stare possunt, taceo quod omnia dicta olea in aquam elementalem converti possint, de quo tamen alibi pluribus.

Restant itaq; *Metallorum Olea* s. *Sulphura & Mineralium*. Mineralium equidem v.g. Vitrioli & Salis communis sic dicta olea, revera non sunt olea: sed saltem cen-

concentrata Salia & pauciori phlegmate contenta Acida, adeòque graviora neque enim flammam more cœterorum oleorum concipiunt, adeòq; inter Sulphura stricte sic dicta referri nequeunt, neque adeò sunt hujus loci. *Metallorum* verò *Sulphura* fixa illa incombustibilia (quod tamen contradictionem quandam implicare videtur) & irradiantia, ab Helmontio, Paracelso, aliisque obscure admodum descripta, Principii rationem habere nequeunt, cum testimonio maximi illius Philosophi *Helmontii* c. de *Flem.* §. II. metalla tota, difficilius quam vis cœteris mistis, mutari possint in Salem æquiponderantem corpori metallico, qui deinde omninò in aquam insipidam reduci possit. Quod Experimentum si verum est; prout ego credo tanto Philosopho & alioquin in aliis experimentis communicandis candido, neminem facile fidem denegaturum esse, haud obscurum certe testimonium inde nobis petere licebit, quod ipsum quoque metallicum Sulphur in aquam ultimatò reducibile sit. Quod si enim integrum metallum hoc est, omnes ejus partes in aquam elementalem

lem converti poterunt, Sulphura Metallorum tanquam partes totius excludi nulla ratione poterunt, quin in aquam reduci possint; ex quo deinde per se patet, *neque hæc metallorum Sulphura, pro principiis veris metallorum habenda esse.*

A Sulphurum examine, ad *Salini Principii* examē nobis descendendum esset, nisi de hoc in progressu discursus nostri prolixius nobis agendum esset, ubi Divina juvante gratia demonstraturi sumus; Salia omnia ultimatò in aquam elementalem reducibilia esse, ac prætereà, Sal illud fixum alcalisatum per Ignem productum, formaliter ante incinerationem in misto non præexistisse, sed demum per Acidi & Alkali cum terrestribus particulis colliquationem productum fuisse. E quibus ac aliis ibidem dicendis, facile cuivis patebit, Salinum hocce Principium tanto perè à Principibus quoque ævi nostri Philosophis æstimatum, sua sponte Principiorum corporis naturalis ordine excidere,

Terram itaq; ceu quartum Principium quod attinet, videamus paucis saltem, quo jure Principium dicatur. Quamquidem controversiam omnium optimè no-

bis magnus poterit decidere *Helmontius*. Hic *Tract. de El* § 11. inter illa quæ mechanica sua in aquam reduci posse sibi constare dicit, numerat quoque Terram, additque §. 12. didicisse se per ignem; quod Deus antedem creaverit Aquam & Aërem, & ex Aqua Terram elementalem, quæ est arena *Quellen*, eò quod esset futura basis creaturarum antesignano homini, ideoq; initio creari debebat, licet sua natura non esset verè primigenium.

Cujus rationem §. 14 & 17 exhibet hanc quod Terra tandem sit convertibilis in Aquam per privationem suæ essentia per quam seminales virtutes ipsum intelligere existimo) Ideoq; credo dicit Aquam corpus prius atq; simplicius, cum illa nunquam in Terram recedat nisi virtute seminum, adeoque vices compositi Aqua assumat, antequam Terra s. Sabulum (quod pro originali Terra, propter difficilem ejus, præ arena è silice vel Adamante in Aquam reductionem per Ignem Gehennæ i. liquorem *Alcahest* præstandam § 3 & 15 de Terra habet) sint. Reliquas omnes Terras (.nigras, albas fulvas, rubras, non originales Terras, sed Terræ fructus esse ac semine constare dicit, subter quas arena est.

Ex his clare satis patet, neq; *Terram* pro genuino rerum Principio haberi posse; cum ipsa reducibilis sit in *Aquam Elementalem* beneficio liquoris *alcahest*.

Hic verò liquor cum paucis saltem cognitus sit, (Paucis enim admodum contingit; ad secreta Naturæ penetralia admitti) quamplurimi quoq; hanc Terræ s. fabuli in *Aquam* beneficio *Alcahest* reductionem, in dubium vocare poterunt, quod ego quidem meiq; similes quos Natura vix ac ne vix quidem ad limina penetralium suorum admisit, quiq; hæc per transennam saltem inspicimus; adeò accurate determinare non poterimus. Neque tamen adeò obscurum hujus experimentum ante aliquot dies factum novimus, quo silex mediante menstruo quodam integris viribus separabili, ita solutus fuit, ut in aqua citra heterogenearum partium subsidentiam solvi potuerit, cujus rei oculatos possum adducere testes.

Terra itaque Principiatum potius est, quam principium, huncq; usum habet insignem ut sit matrix seminum, in qua semina explicentur & nutriantur. Quod quidem cunctorum seminum nutrimentum

tum est Aqua, ab acido seminum fermento, modo in Plantam, modo in metallum, Silicem, pro seminis directione coagulanda.

Quid igitur de *quinto & ultimo* principio *Aqua Elemental*i statuendum erit? Atq; huic ultrò soli, titulum veri principii materialis omnium corporum largimur, atque hoc tantò majori jure ipsi competere arbitramur, quantò certius constat *solam aquam elementalem in aliud prius reduci non posse*. Cætera, Principia dicta omnia, s. Spiritus s. Sal. fuerit, s. Sulphur s. Terra, omnia inquam ultimatò in Aquam reducibilia sunt. Quod ipsum qua ratione præstari possit, jam satis ab aliis explicatum est, neque in fine etiam discursus nostri, hæc paulò ulterius explicandi ansa deerit; quando Salia Alcalifata, per seminalis virtutis remotionem, cunctaq; corpora alia, in primam materiam s. Aquam elementalem relabi, mechanicè demonstraturi sumus.

Plurima quidem Peripatetici Philosophi de mixtorum s. compositorum corporum *materia prima* dixerunt, quod nempe sit; *ex qua insita primo sint omnia &*

inquam resolvantur ultimatò omnia, neque hodie cessant aut temperant sibi ab hujusmodi speculationibus, adeò; ut plurimi difficultate rei perterriti, ut difficilem omninò deferant rem, vel ut inutilem abjiciant. Sed si aquam Elementalem cunctorum mixtorum primam materiam esse quis dixerit; eum quidem à scopo non omnino aberrasse censerem. In Aquam enim elementalem omnia corpora reduci possunt ultimatò, ut nempe Aqua elementalis in nullam substantiam aliam priorem ac simpliciorum resolvi possit, quod de sua materia prima, jactant Peripatetici. Deinde, è materia prima dicuntur cuncta corpora producta primò esse; quod etiam Aquæ elementalì reverà competit. Hæc enim indifferens est, ad innumeras formas successivè recipiendas. Ita pro seminis fermenti coagulantis diversitate specifica, in diversas species coagulatur. A semine vegetabili coagulatur in vegetabile; Plantam. A minerali semine, in metallum, saxum &c. In Animalibus pro seminalis fermenti in ventriculo non tantum propriè sic dicto, verum eti-

am omnium muscutorum ventriculishabitantis diversitate, diversimodè pro seminis natura & directione coagulatur.

Diversa semina Terræ injecta, ex unica nutriuntur Aqua, uti pluvia cunctorum vegetabilium sitim explet.

Tandem pisces sola aqua nutriti docent quomodo Aqua virtute seminum fermentorum coagulabilis sit. Quid enim sunt aliud quam aqua variè coagulata?

Quæ cum ita sint, quid impedit, quo minus *aqua elementalis*, pro *materia prima compositorum* haberi debeat? Verum mittamus hæc & properemus ad alia & quidem ad *Peripateticorum Elementa*, quatuor examinanda, cum locum hunc ee iis tractandis comodissimum esse videamus.

Postquam enim in præcedentibus *Aquam & Terram* Peripateticorum demonstravimus, ostendendo paucis, Aquam pro unicorū naturalium materiali Principio habendam esse; *Terram* verò ultimatò in Aquam reduci posse; non in congruè nos facturos arbitramur si quædam de *igne* (cujus natura hætenus ob-

obscurissima est) & *Aëre* hic dixerimus, & ostenderimus quo Jure hætenus *Ignis* ac *Aer* pro primis mistorum Principiis habita sint.

Novi jam & prævideo, quam quantamque gratiam inituris sim apud Peripateticos, quod cum aliis de quatuor Elementorum veritate dubitare cœperim. Quos verò obnixe rogatos volo, velint Præceptoris sui Aristotelis nomen ac auctoritatem (quibus nihil esse potest veritati inimicum, magis) aliquantum seponere & veris ad veritatem ducentibus viis *Rationi* atque *Experientia* conjunctis insistere, sic non dubito, quin de Quadriga illa Elementorum paulò aliter Philosophaturi sint.

Ignem Peripatetici opinantur habitare sub concavo Lunæ. Quem locum, ut ipsi tribuerent, inducti sunt corporum levitate & gravitate. Cum enim corpora quædam à peripheria ad centrum pel-
li; quædam à centro ad peripheriam elevari conspicerent. Hæc *Ignem* & *Aerem*; illa *Aquam* & *Terram* appellarunt.

Ita nempe arbitrabantur; *Terram* corpus gravissimum esse, adeoque infi-

munum locum, primique elementi titulum obtinere. Hâc leviozem esse *Aquam*; adeoque secundum à Terra locum ipsi concesserunt. Aquâ leviozem dicebant esse *Aërem*, adeoque tertium locum ipsi largiebantur. *Ignem* denique omnium corporum levissimum esse, & reliqua corpora transcendere docebant, adeoque huic supremum locum sub regione s. concavo Lunæ jure competere.

Quod ipsum quandoque experimentis stabilire satagunt. Cum enim Terreis, Aquosis, Spirituosis, oleosisq; particulis mistis, diversæ naturæ partes diversæ, & propria loca occupent, quatuor Elementorum existentiam se demonstrasse opinantur. Et cum particulæ oleosæ supremum locum occupent, easdem verò flammam concipere notum sit, pari ratione & ignem suum elementalem cœtera elementa transcendere, & supra Aërem sub Lunæ concavo, naturalem sedem creationis tempore nactum esse fingunt. Unde interrogati quare Ignis sursum tendat? rationem hanc afferunt: quod quælibet res malit esse in loco proprio, quam alieno, adeoque Ignis tendat
ad

ad Lunæ concavum, tanquam sedem propriam.

Hæc ut & alia figmenta orbi hætenus imposuerunt, ut omnino mirum sit, tot cæteroquin summos ac doctissimos viros, in his credendis adeò faciles fuisse, & adhuc esse, ut iniquum ferè ducant de iis dubitare, nefas negare. Sed missis his, naturam *Ignis* paulo intimius percontabimur, ex quo sua sponte patebit, quâ ratione corporis naturalis Principium dici possit.

Ignis ergo Naturam explicaturi sequentibus verbis nos expedire poterimus. *Ignis est motus velocissimus Sulphuris acidissimi volatilis.*

Quod ut demonstremus duo nobis agenda sunt: *Primò* enim ostendendum erit ipsum *formale Ignis* esse *motum*. Deinde verò, materiam movendam s. motam, esse *particulas acidas volatiles*.

Prius itaque quod attinet, notum est, materiam *Ignis*, in quovis corpore inflammabili esse *Sulphur* quoddam, de quo singulariter notandum est, quod quamdiu particulae hæ sulphureæ quiescunt, nullum calorem nec flammam

de se spargant, *motus* verò illico & calorem & flammam impertiant, adeoque ignem formaliter sic dictum constituent. Hæc omnium conflagrabilium rerum inductione stabiliri possent, sed potiora saltem attingemus.

Lignis inesse sulphur quodam cuivis equidem constare arbitror; quomodo enim aliàs flammam concipere posset. Nunquam tamen observatum est, ligna per se citra particularum sulphurearum *motum*, flammam aut calorem prodidisse. Hoc verò non semel innotuit: ligna ex mutua attritione excalescunt, tandem in manifestam flammam erupisse. Testantur hoc molendinarum accurruum axes, longiori s. diuturniori *motu* non raro incensi. Sed cui alii Ignis hic productus tribui poterit, quam particulis ligni sulphureis & quidem *motis*.

Sulphuris hujus manifestissima in carbonibus cernuntur vestigia; ex his siquidem sulphur separari potest aurei coloris & usus non spernendi, quod ipsum materia est ignis igniti carbonis; sulphure enim hoc à carbone separato
non

non igniri amplius carbo poterit, sed in cinerem convertetur, qui nunquam flammam concipiet. Sulphur itaque quemadmodum Ignis materia erat in carbonibus, ita etiam in lignis erit.

Hoc verò lignorum sulphur, quam diu quieverit per se nunquā accendetur; quod si verò ex alterius ligni celeriori attritione flammam conceperit, soli *sulphurearum* conflagrabilium *particularum*, per ligni substantiā sparsarum *motui* hoc ipsum tribuendum erit, cum præter attritionem nihil aliud hîc intercedat, à quo Ignis productio emanare posset.

Ignis adeoque *ratio formalis*, quā à Sulphuris substantia differt, est saltem *motus*.

Idem observatur in collisione filicis cum ferro, quorum Sulphura per se scintillulas nunquam ederent, nisi mutuo corporum attritu, ad motum excitarentur.

Spiritus s. oleum Vitrioli plurimas continet particulas Sulphureas acidas tam ex acido embryonato inter terræ visceribus mineram Martis vel Veneris rodente inque illis coagulato ortas, quàm
ex

ex ipsa Venere vel Marte profectas. Hæ particulæ sulphureæ quiescentes, omnis caloris expertes sunt, quam primum autem affuderis oleum Tartari p. d. vel aliud Alkali fixum, *motus* & effervescencia insignis excitabuntur, *tanto cum calore*, ut vitrum vix manibus teneri queat. Idem contingit in mistione Spiritus Tartari, non phlegmatici illius acidiusculi Offinarum, sed genuini Alcalici amarican-
tis, cum spiritu vitrioli; utrobique autem calor à motu excitatur.

Sulphur calcis vivæ (quod an unicum sit, ex insitis calcarii lapidis principiis, an adventitium ex Igne, non multum disputabo, cum caloris causam hic saltem investigem) quamdiu extra motum est constitutum nullum emittit fumum, nec calorem; statim vero ac aqua superfusa fuerit, ut Alcalicæ lixiviales calcis vivæ particulæ liberatæ, acidum illud Sulphur, ad motum provocare possint, motus excitatur tantus cum calore insigni, ut manibus tangi non possit.

Similis quoque strepitus & calor ex motu particularum ortus, observatur in præparatione Pulveris bezoartici
mine-

mineralis dicti. Dum enim Spiritus Nitri butyro Antimonii affunditur, effervescentia & calor maximus oriuntur, nulla ratione alia, quam quod motus excitetur particularum Sulphurearum Antimonii.

In butyro enim Antimonii duo potissimum observanda sunt. Particulæ nempe Salino-Acidæ ex Mercurio sublimato ortæ, & sulphuræ Antimoniales, quæ conjuncta constituunt butyrum Antimonii, cujus proinde à Salibus Mercurii sublimati acidis, tam insignis adurendi vis est (quando corrosiva ista Salia Aquâ aliquoties eluuntur, Sulphura Antimonii manifestiora fiunt, adeoque citra ullum corrosionis interiorum periculum, vomitus excitant, & Mercurius vitæ, quamquam immeritò appellantur.) Butyro vero Antimonii quando affunditur Nitri Spiritus, hic more acidorum omnium rodendo agit, tam in Salia Acido-Salina, Mercurii sublimati, quam sulphura Antimonii, & motus particularum excitatur maximus, quem insignis comitatur calor, certissimus Ignis producti vel producendi index. Hic verò calor actu neq; in butyro

tyro Antimonii neque spiritu Nitri, separatis, deprehendebatur, conjunctis verò demum & *motus* innotescebat, Adeoq; & hoc experimento manifestè patet *solum motum caloris sensum produxisse*,

Fœnum & linum madidè reposta interdum flammam concepisse, experientiâ constat. Hujus verò ratio è solo particularum motu petenda est; quod enim dicta, non tam sicca quam madida incallescant, ex eo est, quod mediante humido particulæ Salinæ & Sulphuræ solvantur; ut libère moveri queant, quæ liberatæ sensim subjectis suis exhalare conantur, hæc verò cum densiori mole in tumulum excreverint, solutæ sulphuræ particulæ ex inferioribus præcipuè partibus libère evaporare nequeunt, quare conglomeratæ celesterrimè moventur, motuq; suo reliquas sibi similes in fœno vel lino particulas à compedibus suis liberant: quem *motum comitatur calor ac tandem Ignis formaliter sic dictus*.

Hæc verò ut tantò evadant evidentiora, videamus aliud, ex hordeo pro cerevisiæ coctione parato, petitum experimentum. Omnis siquidem ille, in hor-

dei præparatione, ut ad cerevisiæ coctionem aptum evadat, hunc in finem suscipitur labor, ut Salia Hordei Alcali & acidum s. Sulphur (quæ hic synonymorum rationem habere liceat, statim enim omnis circa hanc rem dubitatio solvetur: quando particulas istas sulphureas conflagrabiles; acidasse. evidenter demonstraverimus) ritè solvantur, quò deinde coctione in aqua communi tantò promptius misceri, ac cerevisiam constituere possint.

Hunc in finem hordeum aquâ comuni, maceratur dies tres circiter vel quatuor, donec intumescere incipiat, quod signum est, particulas Alcalicas & sulphureas jam esse solutas ac in se invicem agere cœpisse. Postea tumentia hæc hordei grana in acervos congeruntur. Ita expergefactus *motor, calidum seminis innatum, Acidum in Alkali agit atq; hoc in Acidum & concretas sibi seminales hordei Ideas movere incipiunt & explicare, ut hordeum germinare incipiat.* Hic verò notandum, quod in illa particularum mutua actione, magna jactura fiat & particularum in surculos abeuntium & earum quæ sensim exha-

exhalant. Hæc ne modum excedat moderato calore denuò exsiccat hordeum, sic particularum motus ob humidifolventis defectum, adeoque spatium liberum denegatum, retardatur.

Dum verò ante dicto modo, hordeum madidum in acervos reponitur, calor excitatur nunc remissior nunc intensior, prout acervi densius aut rarius congesti fuerint. Hujus verò *caloris nulla præter particularum motum causa alia*. Sulphuræ nempe ac Alcalicæ Salinæ particulae solutæ, sensim exhalare nituntur, at, cum densiori granorum coacervatorum mole libera transpiratio ipsis denegetur, tumultuantur, cæterasq; in grano relictas sulphuris particulas, ulterius solvunt, ut hordeum germinare incipiat, non aliter ac in ipsi terræ visceribus. Quæ quod ita sint, vel ex eo patet, quod quo acervus rarior vel densior fuerit, eò calor excitetur remissior vel intensior. In rariori namque acervo particularum sulphurearum exhalatio liberior est, *neq; adeò tanto impetu* intra acervi penetràlia *moventur, unde calor remissior*; secus fit in densiori acervo. Cujus habitâ ratione, Mindæ in patria
mea

mea forte & alibi, æstivo tempore acervos hordei germinantis rariores congrunt, ne externo calore accedente, internus acervi calor sulphureis particulis nimium motis justo major evadat, unde grana adurerentur, cerevisiaque postea empyreumaticum saporem saperet. Quare etiam æstivo tempore acervos frequentius movent, ut particulis sulphureis exitum patefaciant. Hyberno contra tempore densiores acervos congrunt, ut quantum externæ figentes frigoris particulæ, illas in hordei granis pro medica germinatione movendas particulas sulphureas figere poterant, tantum ipsæmet sulphuræ particulæ, intra hordei acervum densius conglomeratæ, celeriusque motæ, refarciant.

Dictus verò calor in macerato solum hordeo non verò sicco observatur; in illo enim solutæ sunt particulæ sulphuræ, ut moveri possint, secus fit in sicca. Unde quoque quando liberas satis esse apparet particulas, ut cerevisiæ coctioni in servire possint, leniter torrentur & exsiccantur, sic humido evaporante, colliquantur quasi sulphuræ particulæ & coagulan-

C

tur

tur in reliquis Alcalicis, granaq; indurefcunt, atq; hac ratione ab omni impofterum motu (nifi ars vel alia externa accefferint) vindicatae sunt, neque calorem etiam ullum emittent, manifettissimo certè indicio, *solum* particularum motum in madido hordeo *caloris* sensum excitasse. Humidum enim uti notissimum, Salium solutioni inservit, adeòque & particularum motui, quare humido sublato, ipse simul motus cessabit, & qui motum consequebatur calor, neque enim præter *motûs retardationem* ullum hîc intercessit aliud, à quo *caloris deficientis* ratio peti posset.

Particulæ verò hæ nunc sopitæ, quando aquæ incoctæ fuerint, denuò solvantur, & vel per se vel adjecto tantillo fermenti moveri incipiunt; ex quo *motu* novus prodit *calor* (Germani das Bier arbeitet sich warm) qui tamen sopitâ particularum actione, illicò perit. Idem quæ de uvarum succo dici poterit.

Quid igitur quæso Ignis formaliter aliud, quam motus? Dicta verò si cui nondum suffecerint, consideret hic velim flammam, quantâ celeritate moveatur; ad-

adspiciat liquores ferventes ac bullientes, perpetuò motos, intumescētes ac in bullas exsurgētes ; consideret celerissimum, pinguium particularum in accenso elychnio *motum* ; & nullus dubito quin allatis experimentis ac rationibus motus, *motum* dixerit formalem Ignis rationem obtinere.

Neq; verò hoc ignorābant sapientissimi majores nostri quod luculenter de Promethéo, quæ excogitata fabula est docet. Prometheum enim ferunt, cum prævidisset Ignem ad humanos usus nunquam non commodum & necessarium esse, adeò ut instrumentum sit instrumentorum, auxilium auxiliorum ; consilium cœpisse, furto auferendum è cœlo Ignem, atq; ad homines deportandum. Furti verò modus adeò apte describitur, ut natura Ignis neminem facile ex illa latere possit. Perhibent enim *virgam ex ferula solis currui admotam esse, & accensam*. Quo ipso nihil certè voluerunt indicare aliud, quam Ignem revera nil nisi motum particularum esse, quid enim aliud *Solis Ignei currus* à currendo nomen habens, adeòq; velocissimum motum significans, quo

Sol circa proprium præcipuè axem incredibili celeritate fertur docere poterit?

Atq; hæc circa particularum Ignis motum dicta sufficiant, quando hoc saltem addiderimus unicum, quod particulæ sulphuræ in uno corpore quando velociùs moveri cœperint, Ignemque constituerint, facile alius corporis sulphura ad motum incitare valeant, quæ unica ratio est, quâ Ignis ignem accendat, s. fax facem, quod veteres *virga ex ferula Solis cornu ad mota* docuerunt.

Postquam igitur in antecedentibus demonstravimus, *tò formale Ignis esse motum particularum*; alterum adhuc reliquum est thesis nostræ supra de Ignis natura exhibitæ membrum, in quo diximus, *Materiam motam esse particulas acidas volatiles*. Quod ut demonstremus, in medium afferemus sulphur comūne tanquam exemplum & vulgo notum. Hujus accensi particulæ velocissimè moventur, uti ex præcedentibus sufficientissimè constare arbitror; motæ verò particulæ hæ, cujus saporis sint, si quis scire desideraverit, ad moto vase easdem saltem excipiat, gustet, & aciditatem penetrantissimam experietur.

Hoc

Hoc unicum de sulphure petatum experimentum, etsi aciditatem Ignis abunde testetur, animum tamen induximus eandem pluribus experimentis stabilire, præsertim cum videamus, solidam harum particularum cognitionem, maximam lucem non subsecuturis saltem in hoc discursu meditationibus, sed praxi quoque medicæ allaturam: propterea tantò facilius ab æquo Lectore prolixitatis veniam nos consecuturos confidimus.

Exordiamur itaque à *spiritu ardenti vini generosi*, quem in antecedentibus nihil esse aliud demonstravimus quàm oleum vini per fermentationem in phlegmate solutū, atque ab hujus *particulis acidis volatilibus* præcipuorum spiritus vini effectuum causas, inebriationis nempe, caloris ac saporis, &c. derivemus.

Inebriamur equidem, quando vinum è ventriculo, *volatile* suum *Acidum* ad cerebrū mittit, ubi cum spiritibus animalibus alcalicis subtilissimè effervesceat (ex quo particularum motu ac spirituum animalium actione, hilaritas illa, largiori vini potui indulgentiū, probabili ratione demonstrari posset, præcipuè cum constet, tristitiam illam sic dictorum Melancho-

licorum è sola spirituum animalium ab Acido quodam fixiori fixatione proficisci. Ex quo haud obscurè colligitur animi illam ad actiones promptitudinem, libero spirituum motui tribuendam esse. Experimentiâ quoq; constat, sumos alioquin viros, nunquam gravissimis consiliis dandis aptiores fuisse quàm cum plusculû bibissent. Idem exemplo suo testantur Poëtæ; de his verò cum non adeò hujus loci sint, alibi) qui tandem, copiosiore, ex largissimo potu, Acido accedente, superantur, adeòq; figuntur tunc spiritus animales, motus ac sensus organa sopiuntur, s. quod idem est, somnus ebrios occupat ac torpor sæpè tantus, ut mortuorum instar de loco in locum trahi sine ullo sensu queant, & sæpè morti tradantur. Ita multi notante etiam Cl. Senerto ebrii, securui domum reversuros comisserunt, & pro dormientibus habiti, reversi mortui sunt inventi. Idem Senertus pueri meminit, qui absentibus parentibus, postquam magnam spiritus vini copiam exhausisset, humi prostratus animam exspiravit.

Hoc verò fit ab iis vinis, quorum Acidum fortius est, quale est Gallicum & potissimû Hungaricû, quam plurimis exteris

exitiosum, quæ nō tantum spiritus nostros animales constantissimè figere, verum etiam Acidum sanguinis Vitale s. Calidum Innatum suppressere, tandemq; sanguinē omninò coagulare possunt. Hinc Poëtæ somnum fratrem mortis appellabant; ejusdē enim parentis Acidi scilicet figentis spiritus animales filii sunt. Verum hæc sole meridiano clariora evadent, si ea diligenter rimati fuerimus, quibus vis atq; potestas ebrietatem arcendi tribuitur.

Atq; hîc primas tenent Salia Volatilia Alcalia, Sal volat. CC. ac inter illa maximè celebratur spiritus salis Ammoniaci cum Alcalifato sale factus. Hujus enim aliquot guttis inter vini generosioris potum largiorem absumptis, experti loquuntur ebrietatem arceri, adeò ut spiritus hicce ab aliquibus *der Sauff* spiritus appelletur. Horū verò Alcalium volatiliū operatio in quo consistat, nemini obscurū esse potest, nisi qui rerum naturaliū & operationum Chymicarum omninò rudis fuerit.

Quotidiano namq; in Chymia experimento constat, omnē horū salium vim, in labefactandis spiritibus acidis consistere; nec Sp. salis vitrioli saltē cum iis effervescent, sed ipse etiam spiritus vini ratione

Acidi sui salis in spiritu salis Ammoniaci coagulatur. Quòultimo experimento nescio an evidentius ullum excogitari possit, quo demonstretur vis alcalium volatiliū, ad spiritūsvini acidum debilitandū.

Neq; Alcalia volatilia solūm Aciditatem hancce vini manifestam reddunt, sed fixa etiā. Sali Tartari enim si superfuderis spiritum vini etiam rectificatissimum, Aciditas spiritus vini in sale Tartari remanebit, quod ex pondere salis Tartari clarū est. Abstractus quoq; spīritus vini ante rectificatissim⁹, nunc phlegmaticus redit, atq; exuta in super aciditate dulcis evasit: de quo deinde, ejusq; ratione pluribus.

Præter hæc adhuc alia hanc vini inebriativam aciditatem evincunt. Brassica rubra comesta ebrietatem arcere perhibetur. Eadem quoq; Chirurgorū consensu Vulnerarium, Medicorumq; experientiā antiphthysicum habetur. Jam verò cum vulnera omnia inflamans & dolorificum *Acidum* habeant (quod statim evidentius patebit) adeoq; & pulmonum ulcus, atq; hoc absolvant Vulneraria, specialiter verò brassica; necessariò sequitur, quòd brassica vini vaporosam *aciditatem* corrigendo, crapulam arceat.

Tan

Tandem oleosa crapulam fugantia aciditatem vini testantur. Amygdalas namque amaras crapulæ adversas esse notissimum est, adeo ut vix Logicum reperiās, qui Potentiam naturalem alio quam hoc ab Amygdalis crapulam arcuentibus repetito exemplo demonstrare malit. Hujus verò hæc unica & solida ratio est, quod oleosa omnia *acidum* debilitent ac supprimant. Ita spiritus vini rectificatissim⁹ (quem nihil nisi oleum resolutum esse antea probavimus) quamvis ipse volatile quoddam *acidum* possideat (uti jam demonstratū est) rodentem tamen Aquæ fortis aciditatem ita hebetat, ut etiam intra corpus tutò usurpari possit, cum antea solus Odor atrophiam toti corpori afferre soleret. Eadem ratione Emulsiones seminum frigidiorū (quia causam caloris *Acidum* nempe absorbent) Melonū &c., item amygdalarū, *acidum putredinis* volatile ad sanguinem delapsū motuque suo calorem, febrem ardentem dictum, producentem corrigunt. Quare eadē prorsus neque ullā alia ratione Amygdalas amaras crapulam præcavere existimo, quam oleositate sua *acidum* vini vaporosum inebrians obtundendo, ut ad Cerebrum pertingere nequeat.

Quemadmodū verò vini visinebriativa in particulis acidis quærenda est; ita eadē quoq; in Cerevisia ejusmodi particulis tribuenda erit, præsertim, cūm acidi hujus salis manifesta jam in hordeo post germinationē tosto cernantur vestigia. Acidū enim hoc, cujus supra jam facta mentio; cujusq; motui ratio caloris in acervishordei tributa fuit, post tostionem ex defectu humidi adeoque spatii liberi coagulatur, unde dulcescit. Quod si cui paradoxū visum fuerit, advertat saltem quomodo Acetum aliaq; Acida in Saturno vel Marte coagulata dulcescant, advertat itē, quòd Saccharata omnia nil nisi salia acida sint in aliis particulis coagulata. Hinc nō tantū in spiritum ardentissimum abeunt, citissimè inebriantem; verūm etiam fermentationibus promovendis vel etiam incipiendis aptissima sunt. Quod experientur Syrupi Officinarum, manifestum acorem sapientes, corpora item scorbuto infecta; his saccharū quam maximè nocet: non quod saccharum Lienis sit inimicum, uti & ex hodiernis, autoritatibus potius quàm rationibus fulti, multi opinantur; sed quòd aciditate sua vitiosas efferve-

ve-

vescentias varias excitet, unde viscerum tumores &c. & ventriculi vitale fermentum vitatur. Verumne extra oleas; sufficiant hæc de vini vi inebriativa ex *aciditate* particularum ejus petita, allata. Conferamus itaq; nos ad causam caloris in vino demonstrandam.

Atq; idem hoc, ex iisdem Vini particulis *acidis* evidentissimè demonstrare conabimur. Quare ut hoc citra omnem obscuritatem fiat, provocabimus Bacchi illos continuos cultores, atq; ex illorum facie cadaverosa inflantantis vini aciditatis manifestissima colligemus testimonia. Tubercula namq; illa temulentorū, quibus facies gemmarum instar, ornata conspicitur, quæq; cavitatibus suis materiam albicantem purulentam abscondunt, è sola Vini aciditate profecta sunt, & quidem sequenti ratione.

Aciditas illa vini (quam ex inebriativa vini ratione luculenter satis demonstratam existimamus) volatilis, quando caput ac cerebrum petit, ipsamque musculorum faciei substantiam penetrat, fermentum ventriculorum musculorum manifesta sua aciditate infi-

Inficit, sanguinemq; inibi pro nutritione advectum coagulat, ejusq; colorem purpureum in albicantem mutat.

Quemadmodum idem hoc videmus in abscessib⁹ ex pleuritide, peripneumonia, Hepatitide, &c. profectis, in quibus extravasatus sanguis coagulatur ab acido, putrescit, atq; in pus mutatur, idem docente Hippocrate *S. VI. aph. 20. in ventrem vel alium locum si sanguis præter naturam effusus fuerit, is suppuretur est necesse.* Verùm ne hæc citra rationem aut experimenta dicta videantur, afferemus quædam scopo nostro uti speramus non inutilia.

Notandum itaq; est, quod sanguinis nostri color purpureus oriatur ex mistione partium sulphurearum acidarum (seu calidi innati) cum spiritibus nostris alcalicis (seu humido radicali) quæ mista, motu mutuo resolvuntur, calorēq; intensè rubentem producunt, ut meritò hi spiritus primum sanguificationis instrumentum salutare debeant. Cor verò fermento suo particulas Chylosas adductas ita saltem disponat ac liberas reddat ut cum spiritibus dictis commixtæ, ac beneficio fermentationis per minimas quoq; atomos
cum

cum iisdem conjunctæ, Tincturam suam liberè impertire queant. Confirmantur hæc certissimis experimentis, Spiritus ac Salia Volatilia Alcalia e. g. spiritus salis Ammoniaci vel Sal volatile CC si cum spiritibus sulphureis digerantur, Tinctura exinde prodit rubicundissima, non alia ratione, quam quòd salium horum volatilium Alkali subtile, Acidum sulphur spirituum Vini, cujus ratione inebriant, flammam concipiunt, calorem ac inflammationes producant, adoriatur, medianteq; digestionem cum eo intimè combinetur, ac subtilissimè effervescat; unde tandem sulphur illud spiritus vini resolutum manifestum reddatur, ac tingat vinum colore sanguineo. Quemadmodum Tinctura Tartari nihil aliud est, quam spiritus Vini ab alcali Tartari volatilifato tinctus.

Sulphur commune quando in lixivio salis Tartari vel Cinerum Clavellatorum coquitur, color inde oritur obscure rubicundus propter eandem rationem, quòd Alcalia illa cinerum, sulphuris colorem exaltent. Color autem, ut dixi, obscure rubicundus est, quia Alcalia fixa propter terre-

terrestres suas, quibus alligata sunt, per Ignis colliquationem particulas, particulas sulphureas adeò per minima penetrare haud possunt, ac Alcalia volatilia.

Histandem sanguineis Tincturis si affusus fuerit Acidus liquor alius, protinus lactescunt: unde & pulveri, ex solutione sulphuris Communis in lixivio Cinerum Clavellatorum, mediante Aceto præcipitato, Lactis sulphuris nomen tributum est.

Eadem igitur omninò ratione, dum aciditas ex putrefacto sanguine extravasato orta, sanguinem tingens præcipitat Sulphur, sanguis albescit cum foetore & pus appellatur. Foetorem verò huncce ex particularum sulphurearum præcipitatione ortum esse, docent sulphurum solutiones omnes, Sulphuri enim communi in lixivio quovis soluto, si affuderis acetum, protinus faetor satis gravis nares feriet, cum ante aceti additionem odoris planè expers esset. Idem observatur in præcipitatione Sulphuris Antimonii ex scoriis Reguli ejusdem cum Aceto facta. Pus itaque nihil est aliud

liud quàm sanguis, cujus Spiritus vitales Alcalici ac balsamici ab *hostili acido* suppressi ac subjugati sunt, adeoq; sulphureæ particulæ cæteroquin rubicundæ præcipitantur, & in albicantes mutantur cum fatore uti jam ante explicatum est.

Atq; ex hoc acido sanguinẽ in pus ver-
tente ratio patet, quare Pus nonnunquam
ossa reddat cariosa, nisi a postemata ma-
turè aperiantur. Patet item quomodo
Pus abscessuum cerebri convulsivos ce-
rebri motus excitare possit. Patet quoque
ratio aphorismi illius Hipp. 47. s. II.
*Dum pus fit, dolores ac febres accidunt, ma-
gis quàm confectio.* Dum enim pus fit,
particularum acidarum motus (prout in
omnibus omninò præcipitationibus ob-
servatur) adest, ex quo motu sulphurea-
rum particularum ratio caloris (quod in
præcedentibus clarè satis demonstratum
est) petenda est s. febris illius sympto-
maticæ dictæ, omnibus vulneribus vel
abscessibus, ubi pus generatur conjun-
ctæ. Dolores verò ex iis dein particulis
acidis motis nervosasque partes ac
tendines rodentibus proficiscuntur.
Quan-

Quando verò pus jam confectum est, & dolor & febris minuuntur, quia utriusq; causa tollitur motus nempe particularū. Finitâ namq; præcipitatione omnis particularum motus cessat. Sed redeamus in viam quâ ante egressi sumus.

Evidentissimè quidem ex dictis constare existimo, quomodo ex nimio vini generosioris usu, Tubercula illa in faciebus remulentorum conspicua generentur. Quemadmodum enim ex dictis experimentis patet, quomodo Spiritus alcalici Volatiles sulphureis solutionibus purpureum colorem concilient; Acida verò iis affusa ex rubro in albicantem colorem præcipitent. Ita etiam Volatilis illa vini aciditas ex largiori & frequentiori potu, postquam ad cerebrum & musculos faciei penetraverit, ibi quidē crapulam, uti demonstratum est; hîc verò sanguinem coagulando, eundemque præcipitando, Tubercula illa vulgò Varos producit, & quidem cum calore seu inflammatione.

Quod quidem evidentissimè confirmari potest iis medicamentis, quibus externe applicatis tubercula hæc sanantur. Inter quæ

quæ primas tenent ex saturno præparata. Hæc tumorem minuunt & inflammationem; causam utriusq; volatilem, nempe vini vel alius quoq; inebriantis liquoris *aciditatem* suscipiendo. Quam promptè enim Saturnus omnis generis Acida seu sulphura absorbeat, metallorum quoque, non est obscurum iis, qui docimasticam exercent. Patet idem experimentis aliis quamplurimis. Ita Acetum in Saturno coagulatum, fit saccharum Saturni, vel etiam Cerussa. Immatura Metallorum sulphura, in Saturno coagulata constituunt Lithargium. Laminæ Saturni, ulceribus tibiariû scorbuticis applicatæ eadem sanant, causam ulceris *acidam* rodentem absorbendo. Eâdem ratione Acidum illud vini inflammans faciem, tuberculaq; dicta excitans, in medicamento ex Saturno paratis coagulatur.

Ex his verò omnibus, quamvis meridiano Sole clariùs elucescat; vini aciditatem, caloris illius & tuberculorum faciei unicam causam fuisse; maximè tamen expediet, cæterarum rerum conflagrabilium Oleosorum (quæ resoluta, spiritus vini constituunt) potissimum, intima vi-

scera examinasse, omnemq; illorum vim, calorem, s. inflammationem producendi, particulis earum acidis materialiter tribuendam esse, demonstrasse.

Oleosa quidē & destillata potissimum calida esse, nemini adeò hebes ingenium est, aut sensus, cui non notissimum sit; ast verò hoc, particulis oleosorum *acidis* acceptum ferendum esse, perpauci sunt qui sentiant. Quamvis itaq; ipsum hoc per se verissimum sit, aliquot experimentis tamen, fecus docentes, ad nostras partes pertrahere conabimur. Magnus Helmontius C. 14. de Febribus, conqueritur de vulgo, sinistrè medicamenta Chymica culpante, ac præcipuè in olea destillata Chymica invehente, tanquam nimis calida, docetq; simul, quòd Olea cæteroquin calidiora, adeò temperata, effici possint, ut nemini de eorum noxa, justè conquerendi ansa superesse possit. Modum verò subjungit, docens; quòd olea redigi debeant in sal volatile, medicamentum maximè temperatum. Salium verò horum accipiendi seu parandi rationē, alio in loco docet (*Tria prima Chymicorum*) conjungenda nempe olea esse cum

cum Sale Alkali, & trium mensium artificiosâ occultaq; Circulatione in salem volatilem mutatum iri.

De hac volatilium salium parandorum ratione, ejusque causis, etsi multa dici possint, hîc tamen labore hoc superfedebimus, præsertim cûm de his dicendi commodissimum locum nobis, de Causis volatilisationis fixorum salium quando necessario agendum erit, prævideamus, & hoc saltem notabimus unicum; quâ ratione olea calidissima, mutatione in Salia, temperata facta sint. Hoc verò statim sine ambagibus patet. *Alkali* nempe quo cum circulata sunt, *reddidit illa temperata*. Calidum itaque Oleorum necessario Acidum fuit (quod per Alkali saturatum est, & ad temperiem redactum. Neq; enim ulla subesse potest, ratio alia, quâ Alkali illud in oleum agere potuerit, vel potius Oleum in Alkali (aciditate enim sua Olea rodunt alcalia & in illo coagulantur, more Acidorum omnium) atq; adeò pro indubitato habendum, olea vim suam calefaciendi amittere quando Acidum eorum per additû

Alcali faturatum fuerit, ex quo sponte sua sequetur, particulas illas olei calidas, *acidasse*. Oleosis quidem inesse Acidum, adeò manifestum est quotidianâ experientiâ; ut nefas ferè videatur de illo dubitare. Videamus tamen in gratiam hæsitantium aliquot & quidem obvia experimenta. Observarunt Chirurgi, olea destillata aliaq; pingua, crânii ossiumq; affectibus, maximum detrimentum afferre, præcipuè verò cariem; hæc verò quomodo à pinguibus proficisci posset, nisi iis inesset Acidum quoddam rodens ossa? cum caries nihil sit aliud quam ossis erosio: hæc verò à Solis acidis fiat. Cranium verò quoniam Os est porosum, acida facile suscipit, quare & indictis affectibus Chirurgi à pinguibus rectè abstinent. Sed acidi hujus Oleorum qui plura vestigia quærit, adspiciant lucernas illas ac lampades Orichalceas, observetq; in iis viriditatem illam parietibus adhærentē, quæ nihil est aliud, quàm sal quoddam acidum, ex oleo olivarū, in orichalceis particulis corrosis, Vitrioli instar coagulātū; Adspiciat item Oleum Chamomillæ, quod ex Cupreis vasis destillatum particulas

, quas.

quasdam Veneris, aciditate sua corrodit, atque ex iis cæruleum colorem accipit, quem tanto coloris gradu non possideret, si ex Vitreis Alembicis destillatum fuisset, manifestissimo certè indicio, colorem istum ex atomis auri chalci, *olei aciditate* corrosis, ortum fuisse.

Atq; propter hanc Oleorum ac pinguium aciditatem, Chirurgi (Barbett. p. 215.) pinguium a oleorum crudorum usum, in ulcerum curatione suspectū habent, quòd ulcera reddant sordida, suaque aciditate, rodens ulcerum acidum, augeant. Ex quo per se patet, quam cauti esse debeamus in usurpatione oleorum olivarum, lini &c. pro Clysteribus in dysenteria. In hac enim cum rodens Acidum, ex variis & diversis causis ortum, intestina exulceret, & inflammet, ex Oleis ejusmodi pro Clysteribus intempestivè injectis, non leve detrimentum & periculum, vitæ ægroantis expectandum est. Neq; adeò probandos esse duco Clysteres illos, ex Oleo lini &c. paratos in affectu Iliaco. Cum enim in hoc casu, intestina inflammatione afficiantur, dicti Clysteres non possunt non nocere, quod oleorum acidum

inflammationem intestinorum augeat (quod tamen postea clariùs patebit) unde non rarò in Gangrænâ & sphacelum degenerare inflammatio possit.

Ut verò tantò certius constet, particulas illas Olei *Acidas*, non *corrosionis* tantum, sed & *inflammationis ac caloris causas* existisse, sisto experimentum quotidie obvium, Ardorem Ventriculi nempe (Germanis *der Sodt* / fortè à *Sieden* bullire, effervesce) In hoc affectu, effluvia calida è ventriculo adscendunt ad fauces maximè molesta. Oritur verò ardor hicce, non è vinis solummodò austerioris ac acidiusculis, Gallicis præsertim (quæ ut antè demonstratum est, propterea citissimè inebriant, capitis dolores ac febres Ephemerâs dictas producunt) verum etiam pinguibus assumptis, maximè verò si iis superbibatur (sic enim salia acida solvuntur, celeriusque moventur; quemadmodum si pinguibus vervecinis citius superbibatur, dolores colicos excitant rodendo, salia illa acida soluta) Sive verò è vinis acidiusculis, sive pinguibus proficiscatur, iisdem tollitur mediis, præcipitantibus scil. *Aciditatem*. Ex quo

quo meridiano sole clariùs patet, & pingua, non secus ac vina Gallica acidiuscula, acidis suis particulis, ardorem illum excitasse, præcipuè cum jam demonstratum sit, ejusmodi corrodescentes ac acidas particulas, Oleis ac pinguibus reverà inesse. Plura de his ac præcipuè Aphtharū, tam in infantibus, quàm adultis, febribus ardentibus infectis, dici poterant, forte ad praxin medicam non omninò inutilia; verum ne nimis prolixi evadamus, cogimur hæc in alium locum differre.

Atq; jam solida intelligitur causa, quare Oleosa & pingua affectibus Erysipelatosis illita, tantum periculum, & sæpè partis affectus mortificationem s. Sphacelum afferant. Plurimi ita sentiunt; quod pingua poros corporis obstruant, adeoque insensilem illam transpirationem s. effluvia, ab exitu impediunt. Quæ sententia à verò aliena non est. Effluvia namq; illa poris corporis quotidie exire solita, si impediatur, inordinate moveri incipiunt, motuque suo calorem excitant, & febris augent. Quod testatur, qui balneo egressi, corpore nudo aërem

frigidum excipiunt, & propterea in febrim incidunt, è qua, unicò sæpè sudoriferò, poros corporis denuò aperiente, effluviisq; obice remoto, viam parante, liberantur. Et Clariora hæc fient, si conferantur, quæ supra de formali Ignis ratione seu motu particularum sulphurearum in cæno madidè reposito, & hordeo pro cerevisia coquenda parando, diximus.

Salvis tamen aliorum sententiis, præter illam ab oleosis pororum constipationem, adhuc aliud in pinguibus externè usurpatis reformidandum est, *Acidum* nempe sal illud toties nominatum. Cum enim Erysipelatos; affectus, è sanguinis ab Acido coagulatione profecti sint, sal pinguium acidum, morbosum Erysipelatis Acidum auget: unde putredo crescit, ossa corroduntur, & tandem calor partis naturalis innatus, à peregrino alio omnino supprimitur, s. quod idem est sphacelus partem occupat. Hæc verò cum peculiarem ac propriam sibi meditationem exigant, fusius aliquando si Deo ita visum fuerit, de his in Gangrænæ, sphaceli & spinæ ventosæ Causarum examine, me acturum promitto.

Hoc tamen & hîc demonstrandum erit experimentis aliquot, noxam illam è pinguedinibus illis profectam, salî illarum acido, jure meritoque tribuendam esse. Fiet hoc, quando ostenderimus peculiare omnes illos modos, quibus olea ad inflammationes sedandas apta redduntur, in Acidi salis consumptione, vel correctione consistere. Taceo hîc modum illum, oleorum vim inflammandi corrigendi Helmontianum, per Alkali additionem, cujus jam supra facta mentio est, & affero modos alios, è quibus non est ultimus is, cum spiritu vini qui instituitur. Oleum enim lini e.g, si cum ana spiritus Vini misceatur, & ad Ignem continuè agitatum, coquatur ad spiritus Vini consumptionem usque, redditur medicamentum non spernendum, quò non externè solùm in pleuritide, peripneumonia, Hepatitide, multò securius priori illo crudo, uti poterimus, verùm etiam in dictis affectibus, internus ejus usus non contemnendus est, quod plurium celebrium medicorum experienciâ stabilitum novimus. Confirmat idem ratio. Cum enim in dictis affectibus, potissimum peccet Acidum quod-

D 5

dam

dā coagulans, facile hoc ab oleo, proprio Acido spoliato, suscipitur. Oleū lini enim, dum cum spiritu vini coquitur, Oleo sum spiritus vini evaporans volatilius, Olei lini aciditatem secum rapit. Patet hoc ex supra memorato jam experimento de Aqua forti & spiritu vini. Hæc enim si misceantur & per Cucurbitam in Arena destillentur, spiritus vini prius adscendens magnam aciditatis partem secum rapit, ita ut in residuo gravior aciditas percipiat, cuius internus usus tutissimus; uti cæterorum spirituum, Salis, Nitri, Vitrioli, separatorum, esse potest. Deinde alii sequentem rationem, Olei lini pro usu medico parandi, tenent. Extinguunt nempe in eo Chalybem Ignitū, aliquoties celeriter movendo oleum, ne flammam concipiat, atq; hoc repetunt usque dum sibilus cesset olei; postea miscent illud cum Calce viva, abstrahendo ab illa oleum, servantq; usui Medico. Hujus præparationis ratio omnis, in particularum Olei Acidarum destructione consistit. Chalybs enim ignitus, dum oleo lini immergitur, particulas ejus acidas conflagrare facit (hoc sit tibi nunc quidem obscurum visum fuerit Lector, clarissimū tamen evadet ex sequen-

sequentibus, quando deinde, flammā materialiter, nil nisi particulas Acidase esse demonstrabitur) hinc sibilus cum fumo, Taceo, quod in Marte omnis generis Acida facillimè coagulètur. Repetitur hæc Chalybis extinctio, donec sibilus cesset, tunc enim Acidū olei deflagavit. Si verò quid reliquum sit illud calx viva consumit. Quemadmodum enim hæc, Acidum salis Amōniaci assumit, ita ut urinosum liberetur; ita quoq; *Acidum* olei lini in illa coagulatur. Quanquam Olea, hujusmodi ab Alcalibus destillanda non facile sint. Maximā enim partē destruuntur, & in Aquā Elementalem convertuntur, uti ex subsequuturis patebit. Oleum verò hoc modo paratum, in inflammationibus vel combustionibus aliisq; casibus, ubi usus ejus requiritur, valde laudatur; non aliam ob causam, quam quod acidum suum rodens & inflammans amiserit.

Eodem modo Oleum Olivarum cum calce viva mistum & destillatū, maximis contra inflammationes & combustiones extollitur laudibus. Ratio verò præparationis æquè ac prioris, in particularum olei acidarū, mediante Alcali fixo calcis vivæ, destructione quærenda est. Hinc quoq;
olea

olea cocta omnia salubriora deprehenduntur crudis, quod coctione, magna particularum *acidarum* copia exhalet.

Sed videamus adhuc alium olea præparandi modum, cum lateribus nempe s. tegula rubra antiqua. Igniunt nempe tegulam antiquam in particulas fractam, donec omninò excanduerit: postea exempta fragmenta restinguunt oleo claro veteri, quousque tantum olei imbiberint, quantum capere possint: postea hæc in tenuissimum pulverem contusa Retortæ indunt, oleumq; inde eliciunt, cui singulares vires in Paralyfi, spasmus, Ischiadicis, podagricis, aliisque articulorum doloribus &c. tribuunt, si vero processus hujus sive Operationis causam investigemus, omninò apparebit nihil hîc obtineri aliud, quàm particularum olei *acidarum* destructionem.

Ad quid enim tegula antiqua, nisi ut Solis diuturno calore sit exsiccata, humiditateq; omni privata, quo vacua quasi reddita, tantò majorem olei quantitatem combibere possit? quare & Igni illam exponunt. Hæ tegulae verò candentes dum oleo immerguntur, prout antea ex Chalibe ignito ostensum, particularum olei *acidarum*

Quædã pars cum fumo in auras abit; pars verò illarum in tegula coagulatur; reliquum oleum *aciditate* jam orbatum Retortam transit, & propter solam hanc particularum acidarum separationem; tantã in dictis affectibus præstantiã acquisivit; ut etiam *oleum philosophorum* dicatur. Quomodo verò dictis morbis mederi possit; etsi in promptu sit, solidis argumentis demonstrare, loci tamen limitũq; quos nobis præfiximus angustia, hoc non permittunt. Ex his experimentis ergò luculenter satis patere arbitror, quod olea per particularũ acidarum separationem, demum inflammationibus ac doloribus leniendis apta fiant; secus verò sine his præparandi modis cruda usurpata, dolores ac inflammationes augeant. Ex quo sponte sua sequitur, noxã illã ex oleis intempestivè usurpatis non rarò observatam, *particulis olei acidi* imputandam esse.

Sed accedamus propiũs ad naturã, s. potiũs materiam Ignis, in oleis ac pinguedinibus demonstrandam. Dicimus ergò materiam flammæ oleorum conflagrantiũ esse particulas olei Acidas, jam jam demonstratas. In sevo enim si non esset Acidum, non adheret, Patet hoc experimentis pluri-

mis: potiora hæc sunt. Olea per spiritus vini evaporationem vel abstractionem à calce viva parata, veletiam è lateribus destillata, nō adeò deflagrant ac cruda. Jam verò in antecedentibus pluribus Experimentis confirmatū est, omnē illam oleorum præparandorum rationem, in particularū Acidarum destructione consistere. E quibus non potest esse obscurum, ea idē particulas & flammæ oleorum materiam esse, cū illarū defectus impediat, quò minus adeò ut cruda flammam alere possint. Atq; hinc patet ratio, quare candelæ, è sevo vervecino paratæ citius deflagrent, quam ex alio generis sevo quæ conficiuntur. In sevo namque vervecino major quàm in reliquis pinguedinibus *Acidarum* particularum copiaprehenditur. Hoc etsi ex multis aliis tū verò ex hoc unico luculenter patet, quòd ex comestione pinguium vervecis frequentissimè dolores colici excitentur, qui sine particulis Acidis rodentibus fieri nunquā possunt (quod ipsum ex Curatione dictorum dolorū, seu operatione medicamentorū, invictissimis rationibus evinci potest) quòd verò dolores hi tū oriantur potissimū, quando superbibitum fuerit

dictâ pinguedine, ex eo est ; quod salia pinguedinis corrosiva, humido soluta, potentiùs agant. Quemadmodum è liquato falso butyro aquæ injecto, salia aquæ junguntur, & butyrum dulce scit. Atq; adeò luculenter patet, propter hanc Acidarum particularum copiam, pinguedinem vervecinam citissimè deflagrare.

Et eadem hæc, neque ulla alia ratio est, quare pingua recentia citiùs deflagrent, flammâq; consumantur vetustis. Ita oleum è Ceto pisce paratum (thran Germanicè) recens, vetusto citiùs flammam concipit ac deflagrat, quod notissimum iis est, qui rei familiaris curâ habent. Vetustiora namq; pingua, temporis longinquitate, magnâ volatilium particularum Acidarum copiam perdiderunt, adeòq; materiam seu copiam flammæ amiserunt, quibus cum abundant recentiora, mirum non est, si hæc citiùs flammâ consumantur. *Acida* ergò *particulae* sunt, quæ *flammam* materialiter *constituunt*, quibus consumptis nulla omnino flammæ s. Ignis excitandi spes est.

Verùm antequam alia & potiora pro ignis materiali causa, & quidem acida demonstrâda, experimenta adducamus, tribus saltè verbis liceat hîc explicare rationem illam, quâ pingua accensa itècande-

læ consumantur. Videmus namq; quotidie, longitudinē accensæ candelæ sensim minui, quorsum verò particulæ hæ recedant, multis obscurum. Vulgus quidem, cū corporis oculis particulas has subducere cernit, in nihil planè redigi illas arbitratur: ast verò cū nihil eorum quæ sunt, in nihil abeat, alia subesse ratio necessariò debet. Quam etsi non pauci, ex iis etiam, qui pro eruditis & Philosophis haberi volunt, investigatione non adeò dignam censebunt, neq; tamen hi nos deterrebunt, quo minus hujus rei causas solidè demonstrēm. Liceat ergò ex subsequituris Demonstrationibus hîc duo præsupponere. *Primò* quidem quòd semina rerum in Acido manifesto aut occulto habitent. *Deinde* verò, quòd cuncta corpora ex Aqua, tanquā causa materiali, per semina in varias species coagulata sint.

Cum ergò & pinguedines omnes (lege posterioris postulati & dicti de omni & nullo) ex aqua materialiter, per semen in Acido habitans (lege prioris postulati) coagulatae sint; Flamma verò omnium accensorum (uti in superioribus multis experimentis stabilium est, & pluribus ad
huc

huc confirmabitur secuturis) sit *Acida* materialiter, invictissimâ inde colligendum est consequentiâ, quòd Acidô seminali pinguedinis per flammam consumptô, reliquû Acidô illo seminali jam orbatû, in aquam resolvatur Elementalem, instarq; vaporis insensibiliter dissipetur; quemadmodum Aqua spirituum vini rectificatissimorum accensorum, simul in vaporem abit.

Quod ne cui dubium sit, aliud saltem afferam experimentû, quo pinguedines per acidi seminalis privationem, eodem modo in aquam elementalẽ converti, patere possit. Pinguedines nempe à Sale Tartari crebrius abstractæ, in aquam reducuntur purè Elementalem; sed quâ ratione aliâ, quàm quòd sal Tartari Alcalicû fixum, acidû seminale pinguedinis volatile, Ignis seu flammæ materiã absorbeat, undeneceesse, formâ hâc remotâ, materiã nudam conspici, h. e. nihil præter aquam elementalem reliquum esse. Sive jam Acidum hoc seminale in flammam abeat, sive in sale Tartari absorbeat, utrobique ex Acidi hujus privatione, Aqua Elementalis prodit: quæ quidem ut jam dictum, in pinguibus accensis insensibilis vaporis instar in auras abit.

Sed missis his, progrediamur ad alia experi-

perimenta, pro flammæ aciditate demonstranda. Atq; hæc quidem ex sulphure accenso (quod supra jam innuimus) luculentissimè patet. Flammæ enim hæcce in merum salabit acidũ, quod proinde aquâ exceptũ spiritum acidissimum constituit. Ita & idẽ patet ex acido Ignis Carbonum candentiũ in plumbo coagulato. Quemadmodum enim uti supra jam dictũ, in plumbo omnis generis acida facillimè coagulantur; ita etiam *Acidum Ignis*, lignorũ accensorũ lubenter suscipit, adeo ut juxta rationes Doctiss. Tachenii centum libræ plumbi sola calcinatione decẽ libras ex igne tuerentur, atq; tum minium constituat, cujus purpureus color non nisi sulphuri Carbonum in Saturno coagulato tribui debet, quemadmodũ Sulphur Antimonii in Mercurio coagulatum colorẽ rubicundissimum affert. Hæc verò quod reverà ita sint, probat Analysis. Minio enim si addatur Alkali quoddam fixum, sal Tartari vel etiam Boray Veneta, Acidum hoc Ignis in Saturno coagulatum horum Alcalium auxilio separatur plumbumq; reducitur. Quibus nescio profectò, an quid evidentius ad flammæ aciditatẽ demonstrandã excogitari possit. Nihilominus tamen, quòd jam de Acido flammæ in Saturno coagulato diximus, idẽ quæso in Marte

quoq; videamus. Mars enim Calcinatus in croceum pulverem vertitur, quem non dubitamus eidem Ignis aciditati acceptum referre Marti incoagulatae. Nam eundem plane crocum, iisdemq; virtutibus Medicis imbutū impetramus, cum Spir. Vitrioli vel salis &c. acidis si paraverimus; ex quo patet, utriusq; Croci & Igne & Acidis spiritibus parati, unam aciditatem causam esse. Dictos verò Crocos eandē omninò possidere virtutem medicam plurimis paradoxum videbitur, cūm cōmuniter modò adstringere, modò aperire, pro diversa præparationis ratione dicatur ferrum. Verū cūm jam Doctiss. Tachenius, paucis saltem verbis, at solidis certè, hæc demonstraverit, ut non facile quempiā fore crediderim qui in iis non lubentissimè acquiescat, labore hoc supersedere licebit. Hoc saltem tribus verbis monebo, ipsam limaturam Martis crudam, omnibus illis, sine Acido Ignis sive Acido vitrioli sulphuris, salis, factis præparationibus multis nominibus anteferendam esse. Crocus verò iste nihil omninò differt à rubigine; hæc autem ab acidis fit. Sed mittamus hæc & ignis particulam examinemus ex usu ejus Medico, quæ Hipp. tantè æstimat, ut quæ ignis non sanat,

illa pro immedicabilibus habeat. Usus vero ejus in externis potissimum ulceribus mali moris extirpandis consistere, norunt Chirurghi. Norunt verò & iidem, omnium omnino ulcerum causam esse Acidum quoddam rodens, quo sublato ulcus sanetur. Externa verò quæ ulcus tollunt trium potissimum generum sunt. Operantur enim *Acidum* rodens l. *saturando*; qualia sunt spiritus salis Ammoniaci cum Alkali fixo rectè præparatus; Decoctum item Calcis vivæ Alkali fixo imprægnatum. Oleum Tartari per deliquium. Vel Acidum rodens *absorbendo* & *assumendo*; qualia sunt saturnina omnia. Ita novi, qui solis saturni laminis tenuioribus, tibiis acido rodente erosis applicatis, ulcera sanarunt. Quemadmodum enim Acetum in Saturno facilimè coagulatur, Acidum item Ignis pro Minio (quod jam jam demonstratum est) Sulphura item Metallorum immatura & impura acida pro Lithargyrio: ita etiam Acidum illud musculosam carnem erodens, in illo coagulatur; quò acido absorpto, ulcera sanantur. Vel deniq; *potentiori Acido debilius supprimendo*, uti operatur Viride æris, quod constat ex particulis Veneris & Aceti salibus acidis, coagulatione istâ

concentratis; quarū vis, propter phlegmatis separationem tantò potentior est communi aceto. Hoc Viride æris præstat illa ferè omnia, quæ unguentum illud Isidis Patavinis dictum, quo Chirurgi Nosocomii S. Francisci, in ulceribus omnibus sanandis felicissimè utuntur. Particulæ verò illæ acidæ concentratæ, Acidum illud putredinis ulcerum supprimendo, agunt. Idem quoq; sentiendum de usu Aquæ fortis, spiritu Salis, cæterorumq; acidorum spirituum, quorum non est usus, nisi in acido putredinis exstirpando, aciditate quâdam potentiori. Atq; in horū censum referendus quoq; *Ignis* est, cujus potentissimū Acidum, dum debilius Acidum ulcerum putredinis suppressit, ulcera sanantur. Quem cauteriorum actualium mirandum propè usum noverint illi, qui Nosocomium Patavinū St. Francisci quotidie visitarunt. Germani enim ab hoc auxilii genere, tanquam duriori & asperiori plerumq; abhorrent.

Ut verò tantò certius constet, particulas Ignis acidas esse, hujusq; Acidi salis ratione, Cauteria actualia dicta, operari, videamus tandem illa, quæ combustis opem ferunt medicamina. Hæc verò omnino eadem sunt cum illis, quæ in antecedentibus

Acidum exulcerans corrosivum imbibere experientiâ demonstravimus; saccharum Saturni nempe, Cerussa, Lithargyrium; Olea cum spiritu vini, sive etiam destillatione ex regulis, sive diuturniore coctione correctâ. Quorum quidem oleorum operâdi ratio in quo sita sit, ex antecedentibus non potest esse obscurum, ubi demonstravimus, Olea dictis rationib⁹ parata, acidas suas particulas amisisse; unde vacua quasi reddita, aliud Ignis acidum è partibus ambustis libenter suscipiunt. Atramentum ratione Martis Acidum loci ambusti suscipit. Lixivium ratione salis Alkali ambustis medetur. Fila illota inflammationes Erysipelatosas sedant, propter Alkali salivæ.

Quæ hîc de natura & particulis Ignis nostri culinaris attulimus, eadem quoq; intelligenda sunt de Cœlesti illo *Fulminum Igne*. Neq; enim hîc aliud est quàm velocissimus *motus particularum acidarum volatilium*; quanquam hæc fulguris particulas fortiores ac penetrantiores culinari Igne appareat ex eo, quòd in illis sopiendis & exstinguendis, non occultum Alkali aquæ fontanæ sufficiat, sed manifestiùs illud lactis requiratur. Multa quæ hîc de fulguris natura, ejusq; operatione, dici poterant,

rant, studio prætereo, tùm quòd iusto prolixior futura esset hæc mea dissertatio, tum etiam quod sub finem hujus nonnulla de iis afferendi locus & occasio erunt.

Atq; ex dictis quidem de Ignis natura ejusq; particulis, non difficile erit *caloris* naturam cognoscere. Effluvia nempe illa sensim à corpore incenso discedentia, quamdiu intra flammæ sphaeram continentur, motu suo celerrimo flammam seu ignem formaliter sic dictum constituunt, postquam verò illam excesserunt, sensim tardius moveri incipiunt, adeoq; pro majori vel minori illorum à flamma distantia, velocius vel tardius moventur. Atq; hæc effluvia sunt, quæ temperato suo motu, calorem corpori nostro temperatum & gratū afferunt, quod fit aciditate sua, nervosa capillamēta ad leves spasmos incitādo. Quēadmodū enim ipse Ignis acidis suis particulis nervosas partes rodēdo, gravissimos motus excitat convulsivos; ita particulæ ejus tardius motæ, leviores saltē spasmos excitāt. Quanquā verò *caloris* sensus è motu particularū acidarū temperato dependeat nō tamen inde sequitur, uti nonnullis visum. *Frigoris* rationē ex earū dē particularū quiete petendā esse, adeoq; frigus mere privativā rationē obtinere, cū indubitatīs ratio-

nibus constet, frigus non minus ac calorem positivum quid esse. Quomodo enim aqua pluvialis, in nivē vel grandinē figurā adeo exactē Geometrica coagulari posset, nisi revera sal aliquis coagulans hyberno tempore in Aëre hospicaretur. Testantur idem ulcera & vulnera; quæ nisi probè ab Aëre frigidiori defendantur, in Gangrænam abeunt & sphacelum. Ast dixerit quis, in his Gangrænā ex merè privativa Causa ortā esse? Frigus haud rarò homines, dormientes præsertim, necat; sed quâ ratione alia, quàm spiritus, vitales dictos, figendo. Figere verò, caloremq; nativum extinguere non privativum, sed revera positivum est. Et ex cujus quæso privatione, aqua coagulatur in glaciem, soliusne motus? Nemo quidem hoc dixerit facile; præsertim qui attenderit, posse quoq; certis salibus, entibus omninò positivis, simile frigusexcitari. Sal Ammoniacum enim Nitrū &c. aquis injecta, nivis ad exemplū, frigus satis intensum producant. Sensum Rigoris, paroxysmū febriū intermittentiū præcedentem à causa privativa proficisci, quis dixerit? Sed cum in rebus per se, suaq; luce clavis, nullis vel paucis indigemus & rationibus & experimentis, mitto hæc, & æ ignis naturam revertor. Cūm

Cum igitur plurimis hactenus, & ut speramus invictissimis rationibus æquè ac experimentis, demonstratū sit; Ignis formalem rationem nihil nisi *motum esse velocissimum* particularum; particulas verò moras seu *materiam Ignis, esse particulas Acidas Volatiles*; videamus quæso, quâ ratione & veritate, Ignis inter Elementa vel principia corporis naturalis referri possit.

Peripatetici rogati, ut ignem ostendant, non possunt afferre alium, quàm quem externis sensibus lucentem & comburentem deprehendunt. Hic verò si ita formaliter corporis naturalis compositionem ingrederetur, corpora non tam constituerentur, quàm destruerentur. Formaliter enim Ignis consideratus, sive prout in motu jam existentes particulae, alias sibi homogeneas quiescentes hactenus particulas acidas ad motum excitant: non tam exstructor seminum est quàm illorum destructor; quomodo ergò Corporis Naturalis Principium salutandum erit?

Quamvis verò nunc luculentissimè constet, ignem formaliter sic dictū, nullatenus ad corporis naturalis compositionē concurrere, neq; præterea ulla ratione inesse; videamus tamen quâ ratione Ignis misto

inesse dici debeat. Atq; hoc quidem ex antecedentibus obscurum esse non potest. Infunt enim cunctis corporibus conflagrabilibus particulæ Acidæ (sufficientissimè in antecedentibus demonstratæ) quæ Ignis nomine jure ac meritò salutantur, Ab igne enim culinari sola quiete vel etiam motûs gradibus differunt. Talē ignem habet ventriculus omnium animalium; nec stomachus saltem strictè sic dictus, sed omnium quoq; musculorum animalis ventriculi, omnia itē vegetabilia, lactuca, endivia, non tactu saltem, sed potestate etiā frigida appellata.

Quod attinet ignem illum in ventriculo strictè sic dicto habitantem, quo mediante cibi coquuntur, & ad corporis nostri nutritionem apti redduntur, Acidus ille est, uti patet ex ructibus acidis sanorū, lactis item hausti coagulati evacuatione. Unde etiam Hipp. sect. VI. Aph. 1. *In diuturnis Lienteriis* inquit (propter acidum ventriculi fermentū seu Ignē deficientem ortis) *si ructus acidus qui prius non extiterit, supervenerit bonū est signū*, (fermento enim hoc acido s. Igne ventriculo reddito, cibi ritè solvi incipient, neque uti antea immutati excerni) Ut verò appareat, quā ratione Ignis hicce in ciborum coctione operetur, notandum s. potius supponen-

ponendum hîc est (insequentibus fortè solidius demonstrandum) cuncta nutrienda non vegetabilia solum & mineralia nutrirî Alkali, sed Animalia quoq;. Dum igitur animalia v. g. homo masticat, carnes vel nutrimenta alia, Alkali salivæ. menstrui instar, reliquas in cibolatêres particulas alcalicas sibi homogeneas extrahit, quæ hac ratione solutæ, cum in ventriculum sanum delapsæ fuerint, ab Acido illo Igne vel etiam fermento facilè suscipiuntur: nec suscipiuntur solum, verum etiam seminali quâdam proprietate imbuuntur, quâ determinantur particulæ istæ ad solum hominem nec aliud animal nutriendum. Antequam Alcalicis illis cibi particulis, salivâ solutis, accederet, Acidum illud Stomachi fermentum, indifferentes erant ad hoc vel aliud animal nutriendum. Nam & plura animalia iisdem ferè quibus homo nutriuntur alimentis, quanquam crudis. Stomachi verò seminale fermentum Idem illis imprimit & sigillum quasi, quo ipso ab alimentis in aliorum animalium ventriculis propria idea insignitis, specificè differunt (quare miror quòd Clysteres nutrientes credât) quod ex diversis illis diversorum animalium excrementis facilè colligitur. Ex Alkali illo ciborum & acido ventriculi fit sal-

sum, quod multos decepit, cum Acidum non deprehenderent gustu fermentum.

Neq; verò Ignis ejusmodi, in ventriculo animalium strictè sic dicto solum reperitur, verum etià quàm plurimis aliis animalis partibus. *Quilibet namq; musculus habet suum, ventriculũ*, qui adducta alimenta, æquè ac stomachus, seminali partis acido imprægnat, quò fit ut advectum alimentũ in hanc v. g. tendinis, nervi, arteriæ, hujusve musculi, non alteri, partẽ transformetur.

Idem quoq; in Mineralibus patet, nam & in illis Mercurius, alimentum Metallorum (ut ita loqui liceat) per se, ad hujus vel alterius Metalli formam suscipiendam indifferens, pro seminalis Subphuris Acidi (seu Ignis) diversitate in hoc, vel aliud metallum mutatur.

Neq; igne hocce vegetabilia sunt destituta. Taceo hîc Ignem illum hordei germinantis, pro Cerevisiæ coctione parati, cujus jam in antecedentibus facta mentio est, cuique principiũ motus particularum, caloris sc. ac fermentationis, jure tributum est. Nam & cuncta vegetabilia ejusmodi igne sc. particulis acidis gaudent, quo si destituerentur, omnis motus ac germinationis, fermentationis etiam, omninò incapacia essent, neq; etiam calcinata, vel granum

salis fixi nobis largirentur. Quod si cui dubium visum fuerit, consideret saltem quorum vis vegetabilium, sive frumenti, sive uvarum, pomorū, cæterorumq; fructuum omnium expressos succos, quàm citò illi, post diuturniorem fermentationē nempe acorem sapiant, & confestim omni dubio liberabitur. Sed in horum quoq; Acido vis vegetabilis seminalis habitat, quod vel ex sola fermentatione Tartari crudi, cum Sale Tartari observari potest. Fermentationis quidem principium activum, inter Tartarum crudum, s. Cremorem Tartari & salem Tartari, nullum aliud est, quàm Acidum illud Cremoris Tartari, quod in Sale Tartari ceu foeminam, materiam & principium merè passivum, maris instar agit: semen tamen idea vel etiam Archæus, in Acido Tartari uvæ efformat, illis è vite pendentibus simillimas. Hæc omnia quamvis adeò certa & veritati omninò convenientia esse, certissimus sum; ut ne unicum contrarium exemplū quidem, his opponi possit; in subsequetur istamen hoc majorem forte lucem accipere poterunt. Neq; interea hîc præterire possum, & sapientissimos illos Naturæ interpretes Majores nostros, Ignē cunctorū corporū Principiū salutasse: è quibus est Pythagoras, Heraclitus, Stoici, Phænicesq;

omnes: an verò ulla vel probabilitatis species subesse possit, intellexisse hos per ignem, illum culinarem & comburentem, atq; huic constitutivi principii corporis naturalis rationem tribuisse, quem non nisi corporum destructorem quotidie observassent? credat hoc Judæus Appella. Neq; enim hoc cum aliis ipsorum inventis consisteret. Quare omnino probabile est, intellexisse eos per Ignem, particulas illas animalium, vegetabilium & mineralium acidas, quibus Doct. Tachen ex Hipp. nomen *Ignis mollis* tribuit. In hisce enim particulis cum rerum naturalium semina ac Ideas reconditas esse, longâ experientiâ in numerorumq; singularium observatione acquisitâ & Ratione confirmatâ, deprehendissent; easdemq; particulas omnis motus in corpore naturali autores observassent, ignem rerum esse principium affirmarunt. Neq; cum his pugnant Thales, Homerus, Hesiodus, Orpheus, ipseq; sacre Geneseos scriptor Moses, uno ore omnes ex aqua cuncta primitus producta esse docentes; neq; Phænices cum Phænicibus, qui non Ignem tantum uti antedictum, sed etiam aquam pro principio naturalis corporis habuerunt. Hi namq; aquam principium saltem materiale rerum

naturalium dixerunt, quibus non contrariantur illi, Ignem formale corporū Principium esse, docentes. Veronamq; verum non contradicit. Hoc tamen de particulis illis acidis s. Igne probè notandum, quod principii nomine appellentur saltem ratione illius formæ vel seminis, cujus sunt domicilia, cujus itē sunt organa motus. Semine namq; isto vel formâ separatâ, æquè ac alia corpora in primum Chaos, aquam nempe Elementalem relabuntur. Ita cunctos spiritus, saliaq; acida, Pinguedines, Olea, mechanicè in aquā reduci posse, præter Helmontiū aliosq; quotidiana in Chymia experimenta docent. Sed hîc manum de tabula. Studio enim hic multa prætereunda sunt, quæ multis ad litigia potiùs inania promptis, quàm experimenta facienda, Philosophis nauseam & bilem moverent. Hoc tamen non pigebit afferre; cujus gratia hætenus omnem illum pro ignis natura solide investiganda laborē suscepimus. IGNEM nempe per se consideratum (citra habitam rationē seminis seu formæ specificæ in particulis illis acidis habitantis) nulla ratione Elementum s. Principiū corporis naturalis habendū esse; Quomodo n. hoc Principii rationē tueri posset, quod contra

Prin.

Principiorum leges in aliud prius resolvi potest? At verò omnes illæ particulæ Acidæ cujusvis corporis, quibus, non aliis, rationem Ignis in misto naturali reperibilis tribuendam esse, quam plurimis experimentis in antecedentibus demonstravi: omnes inquam illæ, in aquam Elementalem reduci ultimatò possunt. Quare tandem aliquando hisce circa Ignis naturam investigandam, occupatis meditationibus finem imponemus, iisdem verbis easdem claudentes, quibus auspicati sumus, *Ignem nihil esse aliud quam motum particularum acidarum volatilium velocissimum*. Cum velocissimum dico, exclusos volo motus totius mixti tardiores, quibus nec Ignis, nec calor producitur, sed tùm demum, quando singulæ, minimæ quoque salis acidi particulæ s. atomi, velocius agitantur, quod in mistorum fermentationibus manifestè patet.

Atque nunc citra omnem obscuritatem intelligitur, quomodo Ignis misto naturali, citra misti destructionem, inesse possit; quod Peripateticì valde semper admirati sunt. Cum enim Ignem cuncta conflagrabilia destruere, quotidie advertebant, in maximam delapsi sunt difficultatem, quâ se extricare hætenus non

potuerunt; quomodo scil. Corporum hicce destructor citra tumultum in misto habitare possit. Difficultas verò hæcce ex antecedentibus facile superatur; ubi demonstratum, Ignem formaliter sic dictum s. Culinarem quem videmus, nihil nisi motum particularum acidarum velocissimum esse. Qualis cum non observetur in particulis illis Acidis, cuivis misto conflagrabili insitis, mirum non est, corporis compagem non destrui, si ipsi motus & dissolutionis autores quieverint; s. brevissimè ita. Particulæ Acidæ quiescentes Ignis sunt corporum, quæ nisi ad motum velocissimum incitatae, corpora non destruunt, sed perficiunt potius.

Hæc de Natura Ignis dicta sufficiant, jam paucissimis saltem de *Aëre*, cujus plenam historiam qui expetit, adeat alios, præcipuè verò Helmont: qui s. 3. *Gas* aquæ, Cælum pro *Aëre*, accipit, locaque alia. Hoc saltem unicum notabimus; Rationes illas, quibus Peripatetici Aërem ad Corporum naturalium constitutionem concurrere, probare conantur, minus solidas esse. O-

mnium verò evidentissimum arbitrantur esse experimentum, si Vegetabilia cumentur: v. g. ligna, è quorum combustionem fumus, qui adscendit, loco Aëris ab iis habetur. Quod quidem quam falsissimum sit, nemini dubium esse potest, qui fumum in fuliginem coagulari salinam observârit; quæ profectò immane quantum distat à natura Aëris. Neque adeò fumus incenso ligno superiora petens magis testatur existentiam aëris in misto, quàm sal fixum in cineribus relictum existentiam Terræ, tanquam Elementi ad compositionem misti pertinentis. Cum igitur nullo potiori argumento Peripatetici nixi, existentiam aëris in corpore naturali demonstrare possint, haud ægrè ferent: Aërem Principiorum naturalium ordine exclusum esse. Neque enim ex eo quid constare dicendum est, in quod resolvi oculisque exponi non potest.

De Terra & Aqua quæ supra dixi, nolo hîc cum tædio repetere.

Cùm igitur satis, uti arbitror, demonstratum sit, Quatuor sic dicta Elementa

menta nulla ratione pro principiis Corporum Naturalium habenda esse, inutiles planè sunt quæstiones & disputationes; an Elementorum dictorum formæ integræ, an verò refractæ mixtis inesse dici debeant; cùm præterea falsissimum sit, è quatuor Elementorum conjunctione, formas naturalium corporum specificas proficisci, cui formæ Elementorum propriæ subordinentur. Quibus enim argumentis aut experimentis hunc specificarum formarum ortum demonstrare poterunt? Ast verò si naturam seminum ac Idearum, solidius cognitam atque perspectam haberent Peripatetici, de ratione formarum longè aliter philosopharentur. Et quomodo quæso, quâve probabili aut saltem tolerabili ratione, mirabilem illam Vegetabilium, tum à se invicem, tum verò a mineralibus & animalibus differentiam, virtutes, ex Elementorum dictorum mistione explicabunt? Cadentibus itaque quatuor hisce Elementis, Principiorumque ordine exclusis, sua quoque sponte ruunt illa, quæ iisdem superstructa erant; omnis

nempe doctrina Peripateticorum de Temperamentis & quatuor humoribus, nunquam in lucem revocanda.

Examinatis igitur Peripateticorum Principiis f. Elementorum Quaternario; videamus nunc quoque Principia illa Paracelsi, ejusque asseclarum. *Sal* nempe *Sulphur* & *Mercurium*, quibus tanquam primis initiis cuncta composita constare, omnium naturalium rerum generationes, alterationes & corruptiones, inniti contendunt; adeò ut vix hodie vel Chymici cujusdam famulum Carbonarium, vel etiam barbitonforem reperire liceat, qui non ubique, *Sal Sulphur* & *Mercurium* crepet. Videamus (inquam) quid tribus istis Genuini Principii nomine dignum insit.

Mercurium itaque quod attinet, antequam videamus, quo jure quâve injuria titulum veri Principii obtinuerit, explicandum hîc erit, quid per nomen *Mercurii* intellectum velimus. In hoc enim demonstrando auctores ipso Mercurio inconstantiores observantur.

Metallorum quidem & Mineralium *Mercurium* omnes concedunt esse illum, quem vulgò vocamus; de cujus præparatione, ut Philosophorum Fiat, videri possunt Philosophi Adepti. Quomodo item è metallis iterum separari possit, hodie adeò ignotum non est, disceptantibus licet inter se, de rei veritate, acriterque digladiantibus Clariss. Viris.

In animalibus saltem & vegetabilibus, quid *Mercurii* nomine appellandum sit, multum semper negotii facessit Philosophis. Haud pauci, inter quos *Beguinus* in *Tyrocinio Chymico*, *Mercurium* dicunt esse liquorem acidum, permeabilem, penetrabilem, &c. à quo omnis nutritio, sensus, motus, &c. Verùm dum Acidum, liquorem de natura *Mercurii* esse arbitrantur, haud parum à via aberrare videntur; cùm citra omnem dubitationem constet, Acidum ad Salia pertinere, adeòq; *Mercurium* istum à salino principio nulla ratione differre, quin etiam hâc ratione Principii rationem sustinere non posse, dummodò cuncta Salia

Acida, in aliud prius, aquam nempe Elementalem, reducibilia esse, manifestum sit.

Alii *Mercurii* nomine salutant illas particulas animalium & vegetabilium, quas cæteroquin spiritus appellare solemus, quos inter est Excell. *Senner-tus* l. de *Cons. & Diss.* c. II. qui tamen ipse citatô loco non diffitetur, *Mercurium* huncce, à sale volatili vix ac ne vix quidem separari posse; in subsequentibus autem si non Re, saltem Ratione Sapientum, eundem à sale volatili separabilem esse, arbitratur; Sed pace tanti viri, salvâque ejus & aliorum sententiâ, *Mercurius* hoc modo acceptus, nec Re nec Ratione à sale volatili distingui potest. In antecedentibus enim sufficienter credo demonstratum est, Spiritus illos, tam vegetabilium quàm animalium, revera nihil nisi sales in phlegmate solutos esse.

Neque verò hâc ratione, *Mercurius* Principium corporum naturalium appellari poterit. Nam quod in antecedentibus quoque ostensum, quam-

vis è vegetabilibus opè fermentationis, particulæ spirituosæ separari possint, illæ tamen naturaliter citra artificiosam fermentationem, formaliter in mixto non præexistierunt, nisi quod materialiter saltem in oleis latuerint. Cui & hoc accedit, quod dicti Spiritus & olea vegetabilium, revera non Principia sed Principiata sint cum in aliud prius, aquam nempe Elementalem, ultimatò resolvi possint. Et quod potissimum est, Mercurius hicce omninò idem cum Salino Principio esset; quod non facilè concessuros credo Paracelsi discipulos.

Prætereo hîc infinitas ferè Mercurii differentias, quæ apud *Scheunemannum* videri possunt, & ad illos me confero, qui *phlegma* seu *Aquam* in vegetabilibus & animalibus deprehensam, *Mercurii* nomine appellant; qui quidem quàm proximè rem acu videntur attingere. Nam si quid in corpore naturali *Mercurii* nomine appellandum, certè aqua erit seu phlegma: cæteræ particulæ ferè omnes corporis naturalis, quamvis & ipsa materialiter

nil nisi aqua sint , sub aliis tamen formis, Sulphuris nempe vel Salis, latent. Atque huic Phlegmati revera illud competit , quod Philosophi æque ac Astrologi *Mercurio* tribuerunt. Philosophi equidem Mercurium versipellem appellârunt *Proteum*, quivé ejus rei cui se adjunxerit, colorem suscipiat, Quo significare voluerunt, *Mercurium* pro formarum ac seminum varietate , in varia ac specie diversa corpora coagulari , adeoque per se indifferentem esse ad hanc vel aliam formam , vel etiam innumeras, successivè recipiendas, Quod revera in aqua Elementalī meridiano Sole clarius videmus. Hæc enim virtute seminum diversorum & formarum, modò in hoc , modo aliud vegetabile transmutatur; uti ex subsequeturis facile clarius patebit. Unde elegantissimè quoque Magn. *Helmont*, *Mercurialem vegetabilis*, vel *animalis partem*, *phlegma* vocat sive *aquam*, a *Semine* nondum maturatam seu formâ seminêve partis imbutam.

Astrologi quoque *Mercurium* suum *cœlestem*, illius planetæ viribus affici, quibus jungatur, docent, adeò ut cui planetæ jungatur, ejus vires augeat, & pro Planetæ diversitate modò beneficis evadat, modò maleficis. Idem quoque in phlegmate seu aqua elementalī manifestum est, quæ cui Planetæ seu semini juncta fuerit, ejus naturam suscipit. Ita aqua juncta semini *vegetabili* fit vegetabile, juncta verò semini *animali* aut *minerali*, & horum naturam amplectitur. Neque hoc solùm, verùm etiam pro ratione seminis, modo beneficam, corporique nostro salutarem, modò malignam & deleteriam naturam suscipit. Ita in Napello v. g. planta, nostræ sanitati perniciosissima, & Rore Marino, vel Majorana, insignibus morborum medelis, juxta se in uno solo positis, aqua cunctorum nutrimentum, in Napello, Napelli vim venenatam; In rore Marino, Majorana, salutarem venena depellendi virtutem induit. Quæ hîc de

vegetabilibus dicta sunt, eadem quoque in animalibus & mineralibus ita se habent. Nam & animalia *aqua* nutriuntur. Præterea enim quod aquam potent (cui contra omnem certè rationem a quibusdam celebribus cæteroquin Medicis, vis nutritiva omninò denegatur, quasi nutrimenti saltem vehiculum quoddam foret) nutriuntur vegetabilibus; quibus præter aquam nullum aliud nutrimentum est. Adeoque aqua, quæ jam v. g. à femine graminis in graminem mutabatur, nunc in homine v. g. pro fermenti cujuslibet partis, in musculorum ventriculis habitantis diversitate specificâ, in diversas partes mutatur. Idem etiam in Mercurio Metallorum stricte sic dicto observamus; nam & hic materialiter nihil nisi aqua est (docentibus omnibus rectè philosophantibus) quæ saltem à femine quodam Metallico in siccum illum humorem, sive aquam, manus non madesfacientem, primò coagulata est, (ita natura à simplicibus semper ad
magis

magis composita progreditur) quæ deinde indifferens est, ad variorum Metallorum formas suscipiendas. Unde Mercurius hicce rectè omnium Metallorum materia & mater salutatur.

Verùm, cum in subsecuturis plura de his differendi ansa futura sit, hæcce de Mercuriali illo Principio dicta sufficiant; Nihil scilicet in misto naturali reperiri posse, cui nomen *Mercurii*, tanquam veri & non in alia priora reducibilis principii, jure competere possit, præter Aquam Elementalem. Hæc sola in aliud prius naturaliter resolvi nequit; cætera omnia, quas vulgo Chymicorum Mercurialis principii rationem habere videntur, ad Salia pertinent. Neque adeò peculiare à salibus principium constituere possunt, cum & præterea quod contra naturam veri principii est, in alia priora resolubilia sint.

Progrediendum itaque est, ad alterum Paracelsi Principium *sulphurnem*. pe examinandum. Verum cùm in antecedentibus sulphuris natura, cùm loco proprio, tùm de natura *Ignis* quando prolixè salis egimus clarè fatis expli.

plicata sit, atque demonstratum, quo jure *Sulphur* inter ptincipia corporis naturalis stare possit, nolo hic dicta repetere, sed benevolum lectorem ad præcedentia remitto.

Tertium igitur nunc reliquum est Principium, *SAL* nempe, cujus naturam, induximus animum, paulò solidius (faxit DEus feliciter) explicare. Cùm verò infinita sint quæ de natura salis afferri possunt (Nulla enim est, nec minima Naturæ operatio, quæ absque salium ministerio perficiatur) certos illos tamen limites ab *Illust. Societate Britannicâ* mihi præscriptos, non facilè excedam. Quod adeo varias illas Salium distinctiones in Alcalia, Acida, vel Neutra, attinet; præsupponimus illas hic potius, quàm ut in iis ab Excel: *Boyle Helmont: Tachenio &c.* clarissimè demonstratis, recensendis, multum laboremus.

Salem quidem, naturaliter citra ignem accedentem, mistis inesse, quamvis adeo verum sit, ut nihil magis, non tamen defuerunt, qui terrestribus partibus hoc saltem accidere arbitrati sunt,

sunt, ut per ignem in falsum conver-
tantur : prout opinati sunt *Schegkius* &
Riolanus, ducti forsan hac ratione, quod è
multis rebus, v.g. lignis, silicib. post cal-
cinationem salia separabilia esse obser-
varent; quæ tamen ante calcinationem
omnis saporis (cujus principium sali tri-
buebant non immerito) expertia erant.
Verùm hi observare debuissent; quam-
vis rerum sapores, rectè à Sale derivan-
tur, non tamen inde necessario sequi,
cuncta insipida sale carere. Possunt
enim particulæ salinæ impediri, ut sa-
porem conciliare non queant, quod
potissimum in lignis & silicibus fit, ar-
ctissimâ particularum concretione,
quâ fit, ut particulæ salinæ non facilè
moveantur. Ut enim saporem rei per-
cipiamus, necessaria est sapidarum
particularum seu salium solutio. Nisi
enim solutæ sint particulæ istæ, illa-
rum actiones & punctiones, ab orga-
no gustûs non percipientur. Quod
adeoque mista quædam ante incinera-
tionem insipida, post illam salinum
saporem habuerint, ex eo solummodo
est, quod salia per ignem solvantur, &
quæ

quæ per totam mixti compagem sparsa erant, colliquantur; adeoque particularum harum solutarum virtus unita, tanto potentius se exferat.

Salia vero hæcce, à particulis terrestribus multis parasangis distare, non obscurum esse poterit illi, qui salia in aquis solubilia esse; terras minimè, adverterit. Et, si salia nil nisi particulæ terrestres sunt per ignem in falsas mutatae, quæ quæso ratio est, quare cineres semel elixiviati, denovoque calcinati ne granum Salis fixi largiantur, aut quare particulæ terrestres quævis igni expositæ falsum non induant saporem.

Quamvis itaque nullum dubium sit, quin particulæ salinae reverà citra calcinationem in misto præexistent, non leve tamen dubium oritur, an Salia illa Alcalifata per calcinationem v.g. lignorum producta, formaliter ita ante calcinationem in misto præextiterint, an verò non. Atque hoc primùm argumentum est, cujus solidam rationem à me exegit *Illustr. Societas Regia Britannica*. Cum enim ante annum ferè

in E-

in Epistola mea ad Præcell. Dn. Joëlem
LANGELOTTUM exarata, Cau-
sas volatilisationis Salis Tartari expli-
caturus, circa fixorum Alcalifatorum
Saliū naturam monuissem nulla ra-
tione hæc formaliter ante calcinatio-
nem in corpore naturali præexistere,
paulo durius hoc dictum visum est Il-
lustrissimæ Societati Regiæ, ut etiam
ad hæc fusius solidis rationibus atque
experimentis demonstranda, gravissimi
juxta atque humanissimi autores exti-
terint. Ut verò tanto promptius in-
ceptum Iter aggredi, ac absolvere
possimus non abs re facturum me cre-
do, si quid per *Sal fixum* hoc loco in-
tellectum velim, præmoneam.

Sal fixum quidem illud dicitur,
quod per se superiora non petit, sed
aërem, ac pro gradibus fixitatis,
etiam ignem tolerare potest, neque
adeo ullum odorem de se spargit, atque
hæc Salia non sunt, unius Generis.

Reperitur enim v.g. in succo uva-
rum ejusmodi *Sal fixum*, quod Subli-
mia non petit, aërem tolerat, odorem
vero nullum largitur, quod uno nomine

Tartarum vocamus, qui in cunctis vegetabilium succis reperitur; quem celebres ceteroquin Viri, *Sala* ac *Zwelferus* nescio quo ausu, *Salium* ordine excludere non erubuere; alii verò plus nimio eidem tribuentes *Salium* volatilem essentialium, è vegetabilibus parandorum, titulum concesserunt. Hæc verò *Tartari* fixitas ex eo est, quòd *Alcali* in illo cum *Acido* ad punctum Saturationis usque commistum sit, & propterea *Alcali* ab *Acido* figatur. Quam Naturæ operationem sequuntur illi, qui *Sali* volatili v. g. *Cornu Cervi*, *Urinæ*, *Spiritum Salis* acidum affundunt, quò *Salia* volatilia figuntur, ut superiora impofterum non petant, atq; etiam quadantenus ignem tolerant. Ita *Spiritus Salis*, *Salibus* volatilibus *Urinæ* fuliginis affusus, producit *Sal armoniacum*, quod, uti notissimum, omnis odoris expers est, & propterea non immeritò *Fixum* appellari potest.

Præter hoc verò *Fixorum Salium* Genus adhuc aliud est, quod per vegetabilis nempe calcinationem producitur, qui-

quibusque particulæ terreæ figentes commixtæ, qualia sunt fixa Salia, Tartari, Absinthii, Centaurii minoris, quæ ad differentiam à cæteris, Alcalisata dicuntur, &c. cinerumque omnium.

Quibus præsuppositis igitur, quando quæstio movetur; An Salia fixa ante calcinationem in misto præexistent, an verò per ignem demum fiant, probe notanda est Salium fixorum, antea demonstrata diversitas, ne Fallacia decipiamur plurium interrogationum (uti scholis dicitur;) Quod si enim quæstio mota accipienda erit, de priori salium fixorum acceptione, omninò dicendum est, eadem ante calcinationem formaliter in misto præexistere. Tartarum enim cunctis vegetabilium succis, reverâ & formaliter inesse, adeò manifestum est, ut jure de illo nemo dubitare possit; Sit tamen sequens non obscurum ejus testimonium, Fermentatio scilicet succorum è pomis, pyris expressorum, quæ absque Tartaro illo, seu constitutivis ejus principiis, *Acido & Alkali*, nulla esse posset. Neque aliter credo se intellectum vult, Excellent.

Charleton, dum certam scorbuti speciem, è sale fixo profectam, docet; variis namque in locis haud obscurè fert, sal, non Alcalisatum, seu strictè fixum dictum, sed Tartarum potiùs intelligendum esse.

Quod si vero Quæstio ante allata, de sale fixo alcalisato Tartari v. g. Absinthii, an hæc formaliter ante calcinatio, nemin mixto præextiterint, intelligenda sit, omninò hoc negandum existimo, siquidem Sal alcalisatum, demum per salium volatiliū colliquationem cum terrestribus particulis per ignem factam producitur.

Quando itaque in subsequituris, Fixi Salis mentionem fecero, de Sale Alcalisato hoc acceptum velim. De hoc verò Alcalisato sale, tria potissimū demonstranda mihi proposui, prout ab Illustr. Societate mihi demonstranda injuncta sunt. *Primò* quidem ostensurus sum, Sal illud Alcalisatum nullatenus in mixto præextitisse. *Secundò* fixum redditum fuisse, per particularum terrestrium commistionem; & *Tertiò* denique illius figentis terræ separationem,



nem, unicam Volatilisationis fixorum salium, causam esse.

Quod itaque primam attinet thesin, Salia fixa, in misto formaliter non præexistere sed per ignem primum produci; videamus quibus rationibus potissimum ac Experimentis nitatur.

Constat verò sibi veritas, Experimenti illius Tacheniani docentis, quâ ratione, ex herbis, ac vegetabilibus incineratis ritè factis, triplo vel quadruplo major salis fixi copia impetrari possit, quàm ex iis vulgari modo quæ comburuntur.

Quod ut tantò clarius constet; tribus saltem verbis, aliquot vulgares salium fixorum, ex vegetabilibus parandorum, rationes, afferam; non quod hæc ignorari existimem, sed ut ex præparationis horum observata diversitate, thesis nostræ veritas, tantò clarius eluceat.

Maximè autem vulgaris omnium modus hic est; quo herbæ vel vegetabilia prius exsiccata in cineres igne aperto rediguntur, quibus aqua affunditur, quæ sale fixo è cineribus imbuta, decan-

tatur, calori exponitur, ita phlegmate largiori exspirante, quæ per totâ aquam hinc inde sparsæ erant particulæ salinæ, propter amplioris loci defectum (fixæ verò sunt particulæ salinæ istæ, ut cum aqua simul evaporare non possint) coëunt, & pro seminalis Acidi diversa ratione, hanc vel aliam, Geometræ quasi circino ac regula, delineatam figuram, induunt.

Huic planè affinis est iste, quo Extracta herbarum, v. g. Absinthii, leni calcinatione, in cineres rediguntur; exque iis affusa aquâ sal fixum educitur;

Deinde alii sunt, qui Plantam non adeo valido igne incinerant, quique cineres Retortæ indunt, spiritumque quendam Acidum inde separant, quo tanquam proprio & seminali Acido, reliquum in Retorta sal, elixiviatum & inspissatum, in crystallos redigunt.

Quos imitantur alii, dum loco seminalis illius acidi, tantillum sulphuris extremè calcinato sali injiciunt, cujus acidæ particulæ, proprio semine gravidæ, formam quandam sali fixo imprimunt loco illius, cujus fortiori calcinatione

tione jactura facta erat. Atque hujus novæ formæ accessione præcavetur, ne in primum Chaos vel aquam Elementalem resolvantur salia, quod necessariò fieret, si omni Acido inque iis habitante semine ceu parte Formali privata essent.

Dictis vero hisce modis, jure ac merito anteponendus est ille Tachenianus, qui plantas recentes non exsiccatas, lenissimo quantum fieri potest incinerat igne, ut nunquam luculentam flammam concipiant, sed in nigros saltem cineres convertantur, qui in olla super ignem subinde agitando, leniter calcinantur, donec albescant, sicque aqua simplici eluuntur, Lixivium ad mellis consistentiam inspissatur, lenique denuò igne ad brunitiem usque urgetur; quo facto tandem solvitur, & crystallisatur; Atque hic omni studio attendendum, quod lib. i. cinerum ultima ratione paratorum, Salis alcalifati purissimi IV. ferè uncias præbeat, cum quatuor libræ cinerum prioribus modis calcinatorum vegetabilium, vix unciam unam Salis fixi largiantur.

Cujus tam insignis diversitatis, è sola calcinationis, vel præparationis ratione varia, profectæ, causas si diligenter rimati fuerimus, maxima quadam animi voluptate innotescet nobis, quid de salis fixi ante calcinationem in mixto præexistentia, habendum sit.

Præparationis vero hæc diversitas in solo ignis temperamento consistit; præter hanc enim, nulla alia hic intercessit actio, à qua tam insignis diversitatis ratio peti posset. In vulgaribus namque præparationum modis, vegetabilia aperto incinerantur igne, in hoc Tachenii verò, ita incinerantur leni igne nempe, ut manifestam flammam nunquam patiantur. Præter hæc quoque, in prioribus & vulgaribus modis vegetabilia exsiccata prius incinerantur; in posteriori vero hoc, non siccata sed recentia, in cineres rediguntur. Sed quare hoc? Exsiccatione quidem Salium volatiliū ab aëris ambientis actione jacturam fieri, in superiori Epistola mea aliquot Experimentis demonstratum reperitur.

Particulas vero nonnullas, reye-
ra

ta abiisse, aque ista quam vehiculo immixtas, non potest esse obscurum illi, qui propter harum factam jacturam, salis fixi in calcinatorum cineribus deprehensi copiam, valde imminutam attenderit. Majorem enim v. g. Absinthium recens combustum, salis copiam largitur, quam idem exsiccatum; unde invictissima consequentia consequitur, particulas illas exsiccatione è vegetabili discedentes, ejusdem cum cineribus, Salinæ nempe naturæ fuisse: quomodo enim aliâs pro harum vel præsentia vel absentia, copia Salis major vel minor esse posset, cum non ex quolibet fiat quodlibet.

An vero fixæ vel volatiles fuerint particulæ istæ, neminem dubitare finit natura fixorum, quæ adeo sponte sua superiora non petunt, ut etiam pro fixitatis gradibus fusionis ignem ferant. Volatiles ergo sint necesse est particulæ avolantes istæ.

Quibus præsuppositis igitur, cum ipso Sole meridiano clarius constet; particulas volatiles, vel Salia volatilia, fixorum salium incineratione facto-

rum materiam esse, neminem latere poterit natura fixorum salium, seu potius, an formaliter ita ante incinerationem in misto præextiterint. Cum enim videamus, salia cæteroquin volatilia, igne mediante, fixam naturam induere quid poterit dici aliud, quàm sal fixum in cineribus repertum, non præextitisse ante incinerationem formaliter in vegetabili, sed ex volatilibus demum productum fuisse.

Quod quidem tantò patebit clarior, quantò accuratius rimati rationem fuerimus, quare vegetabilia, aperto igne incinerata longè minorem Fixi Salis quantitatem præbeant, iis, lento lenique igne quæ calcinantur; Non verò ideò lenis hic ignis requiritur, quod fixorum salium in aërem abiturorum fuga coërcenda sit; salia fixa enim, v. g. Tartari citra sui jacturam ignem fusiones etiam, (h. e. intensissimum, ut instar soluti auri fluant) tolerare possunt; verùm ut Salia volatilia fuliginem constituentia, intra mixti compagem conserventur. Manifesta enim aperta que flamma, si vegetabilia attingeret, hujus
par.

particulæ acidæ volatiles (quàm plurimis in præcedentibus & Rationibus & Experimentis ostensæ) celerrimè motæ, illas in vegetabili delitescentes volatiles particulas, ad motum celeriorē incitando, in auras abigerent.

Quod si verò reverà & formaliter ita in vegetabili præextitissent, nulla calcinationis varietate, copia ejus augeri vel minui posset: Non augeri; sic enim necessariò præsupponenda esset materia, ex qua generetur primum, neque adeò naturaliter & formaliter in fuisse citra calcinationem dici posset, utpote quod calcinatione mediante demum fieret; Neque minui etiam, sic enim naturam fixi salis amitteret; sed necesse foret, ex Absinthio v. g. diversis licèt calcinationum modis accidentibus, eandem semper salis fixi copiam produci.

Verùm ut quæ dicta sunt, tantò evadant clariora, inspiciamus quæso experimentum è Tartari calcinatione petitum; Quod si enim fuliginem è Tartari calcinatione adscendentem, (spiritum Tartari alioquin appellatam)

exceptam, capiti mortuo reddamus, copia salis fixi valde augetur, quod quæso quâ fieri ratione posset, nisi particulæ istæ volatiles, materiam salis fixi constituerent.

Cum itaque mechanicè jam demonstratum sit, quasdam particulas cæteroquin volatiles, ignis calcinatione, in fixum alcalisatum mutari, (quod certè citra violentam calcinationem in misto præextitisse dici non poterit) quis jure non suspicabitur; eâdem prorsus ratione & illud sal fixum, quod citra particularum volatilium additionem in cineribus deprehendebatur, pervolatilium colliquationem productum fuisse?

Particulæ volatiles, è Tartari v. g. calcinatione discedentes, si conservari possent omnes, omnes quoque naturam salis Alcalisati induerent. Et quod si, eâdem particulæ omnes, è misto calcinato discederent, ita ut nulla illarum conservari posset, ne unicum quidem salis fixi alcalisati granulum, inde nobis promittere possemus.

Et si verò in violentis v. g. Tartari,
Absin-

Abſinthii calcinationibus, magna ſatis volatiliū jactura fiat, adeòq; Fixi Salis quantitas tantò, pro ignis gradibus, minor evadat; omnium tamen, ut nullæ omnino in miſto reliquæ maneant, amiſſio ſeu exhalatio contingere non poteſt. Particularum enim harum volatiliū fuga, non fit in inſtanti, ut ſimul uno momento evolarent omnes, quotquot ineolatuerunt. Sed ſenſim aliæ alias fugientes, ſequuntur. Quod ipſum exemplo ſuo quotidiano docet tuli-go, quæ quod nihil ſit aliud, præter volatiliū particularum, mutuò coagulatarum congeriem analyſi illarum conſtat. Fumus verò fuliginem produ-cens, ſenſim, è vegetabili accenſo diſcedit, unde fit; ut quæ poſtremò fugam moliebantur particulæ, pro-pter longiorem in igne moram, colli-quentur, adeòque figantur, & quidem duplici ratione; vel ab ipſis nempe par-ticulis acidis, mixtorum partibus, flam-mam accenſorum (uti ex naturâ ignis tradita patet) alentibus, quæ eædem faciunt, fumum coagulari ſeu figi in fu-liginem; vel etiam à particulis terreſtri-bus

bus, coagulatis in igne salibus volatilibus, incommixtis, sed de his in subsequendis; Hoc saltem hic notare lubet; Cum fieri aliter non possit, quin violentâ illa vegetabilium calcinatione, quædam, ac ultimò quæ deserturæ mixtum erant particulæ, in se invicem & cum particulis terrestribus colliquantur, & figantur; neque etiam fieri aliter posse; quin ex cunctis vegetabilibus combustis, Sal fixum alcalisatum impetretur. Quod quidem tum primum inde accipere licet, quando in rerum incinerationibus fumus, seu volatilium salium fuga cessat. Hâc enim cessante, innotescit nobis, reliquas particulas jam coagulatas & fixatas esse, ut evolare non queant; Si verò nondum defuerit fumus, vel minimus etiam volatilium particularum motus, qualem in carbonibus ignitis deprehendimus, reliquus sit, frustra Sal alcalisatum inde expectamus.

Is enim magnus mihi erit Apollo, qui ex carbonibus, seu lignis, nondum omninò in cineres redactis, vel unicum Salis Alcalisati granulum, prolicere noverit.

Neque

Neque etiam carbones, lignaque leniter ustulata, sub terris & aquis tot secula durare possent, si Sal alcalisatum formaliter ipsis inesset, utpote quod ad primum quoque aquæ aut humidæ attractum illicò liquefcit.

Tantum igitur abest, Sal fixum alcalisatum, in misto formaliter ante calcinationem præexistere, ut ne unius grani vestigium, vel ipse Argus investigare possit.

Hæc quamvis per se verissima sint, incredibilem tamen lucem ex subsecuto sibi lucrabuntur. Quod si enim ullum vel mente concipi Experimentum potest, quo fixorum Salium generatio, evidenti ratione ostendi possit, certè illud est, quod ex *Fuligine* habemus. Hæc enim calcinata, copiam Salis alcalisati satis magnam largitur. An verò dicemus, Sal hocce alcalisatum in fuligine citra calcinationem præextitisse? absit; neque hoc permittet natura fixorum salium, quæ adeò in igne constantia sunt, ut instar vaporis vel fuliginis nunquam adscensura sint. Unde igitur ortum illorum derivabimus?

In fuligine quidem Salia inesse, nulla indiget demonstratione, cum nulli credam super hac re scrupulum subesse. Quod verò salia fuliginis sint volatilia, præter celerem ex accensis vegetabilibus discessum, & hoc docet; quod mediante spiritu Salis in Salarmoniacum abeant, acido verò hoc Salis spiritu per alcalifati salis additionem separato, in merum sal volatile urinosissimum solvantur. Quare, si materiam quæramus, è qua sal fixum producat, erunt certè salia illa fuliginis volatilia, *Acidum* unum, alterum *urinosum* ambo ex vegetabilis calcinatione profecta;

Modum verò, seu formalem fiendi rationem, si desideramus, manifestum est, esse illum, *colliquationem volatiliū Salium*, inter se, ac cum particulis terrestribus. Cum enim præter ignis actionem hic nulla sit alia, quæ Efficientis causæ Physicæ rationem tueri possit, ignis verò proprium sit, Salia colliquare, (per horum enim cum terrestribus particulis colliquationem vitra producuntur) omninò affirmandum est, & ipsum Sal alcalifat, per particularum colli-

qua-

quationem, ab igne factam, productum fuisse. Quod tandem ipsum, intensiori ignis gradu, in vitrum transit. Sed ut dictorum veritas, tanto clarius pateat, videamus quæso Experimentum ipsum.

Fuligo quidem aperto vase calcinata, aliquam Alcalifati Salis quantitatem largitur; Sed longe majorem, si sequentiratione rem aggressus fueris, copiam impetrabis. Calcinetur, nempe fuligo vase clauso, igne in principio intensiori; postea teratur, denuòque igni commissa, baculo ferreo agitetur, usque dum colorem cineritium induat.

Sed quare hic requiritur vas clausum? ut nempe fuga volatilium, ceu materialis causæ fixorum Salium, impediatur. Quare item intensus statim ab initio ignis gradus urgetur? Sic enim eò citius colliquantur particulæ volatiles, & figuntur antequàm fugam adornare possint. Quid quæso colligi inde aliud potest, quam & in fuliginis calcinatione, Sal fixum, è volatilium colliquatione, productum fuisse? Cùm iisdem mediis, Fixi Salis copia augeatur, quibus volatilium Salium jactura præcavetur.

Si

Si verò cuiuslibet volupe fuerit suscipiari, ac si Sal illud alcalisatum, à fuligine productum, mediantibus volatilibus fuliginis salibus, ad superiora evectum fuerit (cum Fixa volatilium ope superiora petere communiter credantur) atque adeò Sal hocce formaliter in fuligine præexistiterit ante calcinationem; huic quid respondendum sit, in promptu erit. Et quidem ut dubio huic tanto solidius satisfieri possit, consideranda paucis hic est Veritas & Ratio illius axiomatis; *Quomodo Alcalisata Salia à volatilibus in sublime rapiantur.*

Conjungatur igitur e. g. Sal Tartari alcalisatum, cum proprio Sale Tartari volatili, vel alio etiam Cornu Cervi, Urinæ, sublimentur; ita quidem non negaverim, volatilium horum auxilio, quasdam Salis Tartari alcalisati particulas, simul elevari; hoc tamen omnino studio notandum, non posse Salibus huiusmodi volatilibus, omnes fixi salis, & singulas particulas, seu *Sal fixum* formaliter sic dictum, evehi, ita; ut sublimatum sal, definitionem salis fixi, conservare possit. Separantur enim sublimata-

limatione ista, salinæ salis fixi particulæ, à terrestribus, quæ conjuncta *Formam* salis fixi constituebant, quam adeoque separatione ista perdunt.

In dicto igitur exemplo, quamvis, sal Tartari volatile, quasdam salinas fixi salis Tartari particulas, separatas, secum in sublime rapiat, non tamen ipsum Sal Tartari fixum, formaliter sic dictum, evehit. Quod ne obscurius dictum videatur, alio videamus rem experimento.

Vini Spiritus, Sali Tartari superfus, cum eo digestus, & destillatione abstractus, particulas quasdam, Salis Tartari alcalisati, secum rapit (de cujus solidis causis, in subsequendis dicendum erit, quando causas volatilisationis fixorum Salium, volente DEO explicaturi sumus) unde etiam *Spiritus vini* appellatur *Tartarisatus*. Hæ verò particulæ, mediante spiritu vini sublimatæ, non retinent Salis fixi alcalisati definitionem, cujus formalis ratio erat, *conjunctum esse cum particulis terrestribus*; Particulæ enim terrestres nullæ ibi simul sublimantur, sed in fundo cucurbitæ relinquuntur, neque adeo dici potest,

H ipsum

ipsum sal Tartari fixum, simul sublimatū fuisse, cum quædam saltem particulæ ejus, salinæ nempe, evecæ deprehendantur. Sed properemus jam ad rem ipsam.

Ponamus igitur; præter salia volatilia, Salia etiam fixa alcalifata, in vegetabili ante calcinationem præexistisse (quod tamen in antecedentibus demonstratum est, à rei veritate quam longissimè abesse) nunquam tamen fieri poterit, ut alcalifatæ illæ particulæ, à volatilibus fuliginem constituentibus, integræ eleventur; & quamvis nonnullas fixi Salis particulas, sublimari, inficias eundem non sit: illæ tamen tunc fixorum salium naturam exuerunt, ac volatilitatem induerunt.

Atque his, si fortè cui assensum præbere non placuerit, hunc rogatum volo, ut modum afferat ac rationem, quâ Sal illud alcalifatum, formaliter in fuligine existens, citra novam accidentem & quidem violentam calcinationem, inde separari possit, quod commodissimè omnium per aquæ affusionem fieri deberet; in hac enim alcalifata

ta Salia citissimè solvuntur. Quod ipsum verò quemadmodum frustra, & facilius è punice aqua expectatur, ita & frustra laborabunt illi omnes, qui in fuligine, sal quoddã alcalisatum formaliter præexistens quæsierint.

Et, si Alcalisatum fuliginis Sal, per volatiles particulas evectum fuisset, quanta volatilium copia, ad hoc opus fuisset? Cum enim Fixi Salis ad volatile, subtripla ferè debeat esse ratio, consideret quæso quis copiam Fixi Salis, è calcinatione fuliginis ritè instituta, profecti; ipsamque conferat ad pondus fuliginis, unde colligere poterit, an tanta volatilium copia in fuligine existere potuerit, quæ tantæ Alcalisati salis copię elevandæ, ac præcipuè ad tam excelsa loca, fuerit.

Cui & hoc accedit, quod ipsa fuligo è fuliginis calcinatione adscendens, capiti mortuo reddita, in Sal alcalisatum mutetur. Sed nolumus rem ipso meridiano sole claricrem, longiori explicatione obscuram reddere, cum res ipsa loquatur in tam subtilissimis, adscendentis fumi particulis, fixas il-

las Alcalifati Salis particulas, ne utiquam latere potuiffe.

Quæ cum revera ita fint, quid de falis fixi è fuligine calcinata, productione dicemus? Nonne ultrò fatendum nobis erit; ignis demum ope, illud ipsum productum fuiffe, neque adeò formaliter ante calcinationem in fuligine præexstitiffe. Atque hoc est, quod potissimum nobis demonstrandum erat; Sententiam verò hancce tamdiu nobis tenendam esse duco, quamdiu allata jam Experimenta ac rationes, firmo stabunt talo, neque ab ullo mortalium modus afferetur, quo Alcalifati salis, unicum saltem granulum, citra calcinationem produci possit; quod certè nunquam fiet, nisi quis Tartarum in herbarum succis latentem pro sale Alcalifato habiturus sit; Quem errorem ne quis erraret, in antecedentibus, Fixum Sal Tartari, ab Alcalifato cinerum, probe distinguendum esse monui.

Circa dicta verò, unicum præ cæteris dubium superest, ac experimentum non negligendum, cum videam Celebrissimum *Willisum* è *Reg. Soc.* hoc ipso Alca-

Alcalifati Salis, in misto, ante calcinationem præexistentiam, indubitato demonstrari posse, existimare. Cum enim cineres Plantarum semel elixiviati, denuò licet calcinati, nihil omninò salis fixi exhibeant, colligit inde Vir Clariss. Sal fixum, non per calcinationem primum, productum fuisse, sed reverà in mixto præextitisse, alioquin terram elixiviatorum cinerum, calcinatione accedente, Sal fixum, concessuram fuisset. Verùm quod pace tanti Viri dixerim; res hæcce longè alio fundamento nititur. Nemo enim unquam dixerit, solo igne Alcalifatum Sal productum fuisse. Ad rerum namque productionem præter externam causam Efficientem (Finalis enim, mores potius, quàm Naturam spectat) internæ quoque; *Forma* requiruntur & *Materia*. *Materiam* verò Alcalifatorum Salium, in antecedentibus jam plurimis Experimentis demonstravimus, esse salia volatilia, *Formam* diximus esse colliquationem seu fortissimam unionem, volatilium salium inter se & cum particulis terrestribus; *Efficientis* causæ rationem habet

H 3

ignis;

ignis; hic enim colliquando Salia formam alcalifato fali concedit. Hæc verò saltem externa causa est, neque mixti compositionem ingreditur, neq; adeò quicquam producit nisi *materia* adfuerit *ex qua*, quid producendum sit: Ex nihilo enim negativo naturaliter nihil unquam factum est. Cùm igitur in antecedentibus demonstratum sit; *Materiam* fixi Salis, esse Salia volatilia; sequitur, quod iis omnibus in fal fixum mutatis, semelque elixiviatis, nullum fal fixum denuò per ignem produci possit, ob materiæ scilicet defectum.

Neque adeò quæ ignis beneficio è misto producuntur, omnia formaliter eidem infuisse, dici potest. Quamvis enim, quæ, ex quo eliciuntur, eidem infuisse negare nemo ausit, cum quod quis non habet, hoc dare non posset, multa tamen ita sunt comparata, ut materialiter saltem in misto præextiterint, formam verò suam, quâ nobis se conspicienda præbent, in violenta ignis calcinatione demum consecuta sint. Quod præter alcali-

fatum

fatum fal quâ tale, vitri è vegetabili-
um Salibus productio testatur. Quis
enim dixerit vitrum formaliter in ve-
getabili præextitisse? Quamvis mate-
rialiter eidem infuisse jure meritoque
dici debeat. Quod ipsum quoque de
Spiritus *vini* in antecedentibus no-
tavimus, neque hi enim ante fermenta-
tionem *formaliter* in vegetabilibus
reperiuntur, sed *materialiter* saltem
sub oleorum forma latent. *Formam*
verò spirituum, oleorum demum re-
solutione ope fermentationis factâ,
nanciscuntur.

Alcalisatum itaque fal, cum forma-
liter in misto citra violentam calcinati-
onem, non existat, non video, quâ ratio-
ne inducti, viri cæteroquin Clariss: lixi-
viale, fixum, alcalisatum fal, in animalium
ac hominis præcipuè corpore fin-
xerint. Infunt quidem & humano corpo-
ri salinæ particulæ, quæ in hoc cum lixi-
vialibus conveniunt, ut acidis contra-
riæ sint, eademque saturent, communi-
terque Spiritus apellantur Animales
(quamvis corporeæ omninò sint sub-

stantiæ, adeoque improprie Saltem spiritus appellantur) Hi enim varia morboſa acida, auſtera, acria, & ſexcenta hujus generis alia vel ſuperant, vel ab iis ſuperantur, unde ſanitas vel morſ proficiſcuntur. Atque hoc ſenſu ſpiritus hi, ſalia lixiva appellari poſſent, quia lixivialium more, varia acida corrigunt. Quo ſenſu & Bili lixivum Sal ineſſe, concedi poteſt. Habet enim hæc, alcali quoddam, quo omnis generis putredines, earumque aciditates arcet, quæque ideò ſummo jure Baſamus vocatur totius corporis. Hæc enim deſiciente, Chylus puerorum in vermes tranſit, ſeu lumbricos, febres excitantur, adeò ut dubitari poſſit, utrum deſectum potius bilis, an abundantia ejus, ardentium febrium cauſa repetenda ſit. Et ut fatear quid ſentiam, potiori certe jure videntur gaudere illi, qui deſectum bilis, quam, qui ejus præſentiam accuſant; quæ tamen quod ab hoc loco paulo alienora videntur, hic non dicta volo, dabitur ſi DEO ita viſum fuerit, alias aliquando de hiſ dicendi

di locus, revertamur itaque ad rem.

Dicta verò salia, in humano corpore demonstrabilia, quamvis quandam, operationis ratione, cum alcalifatis convenientiam, habeant; multistamen parasangis, ab iisdem differunt. Tò formale enim Alcalifatorum salium, consistit in conjunctione cū particulis terrestribus, per violentam ignis calcinationem facta, qualis in animali corpore cum nulla dari possit, neque ipsa etiam alcalifata salia in illo generari potuerint,

Neque ex cibus, vel vegetabilibus comestis, proficisci possunt, utpote quibus formaliter ne granam Alcalifati Salis inest.

Neque etiam ipsa alcalifata Salia, ore accepta alcalifati naturam conservare possunt, contrâ ac suspicatus est, Vir quidam Clariss. propterea ab Alcalifatorum salium usu in certa scorbuti specie, abhorrens, quod scorbuti causa, quam Alcalifatis Salibus in sanguine habitantibus tribuendam arbitratur, hoc ipso augeatur. Delapsa enim ad Stomachum, quando fuerint

Acidum ventriculifermentum seminale, aut putredinis; illorum salinas alcalicas particulas arripit, & terra figens præcipitatur, adeoq; Alcalifatorum naturâ exuta; volatilem induunt. Quod ipsum quàm sit verissimum statim patebit; Quando de causis volatilisationis, Alcalifatorum Salium, dicendum erit.

Formaliter itaque etsi Alcalifatium sal *animalibus* non insit, quæstio tamen moveri posset, anne materialiter saltem, prout vegetabilibus, insint; ita ut ignis calcinatione inde separari possint. Atque hîc notandum; quod Animalia calcinata vix Alcalifati Salis vestigium quoddam ostendant. Cujus hæc ratio est, quod Animalium Salia penè omnia, nil nisi urinosa sint, volatilia Alcalia, & paucò admodum' Acido manifesto scateant. Stomachi enim fermentum & Pancreaticum succum si excipias, vix manifestum Acidum in animali sano reperiēs, cætera singulorum partium fermenta, quamvis cuncta acida sint, occulta tamen sunt, & vulgi sensus fugiunt. Cum verò Alcalifata

lifatata salia fiant ex Acidi & Alkali volatilium colliquatione cum particulis terrestribus; propter manifesti Acidi in animalibus defectum, fit; ut Salium illa colliquatio fieri non possit. Tantillum igitur Alcalisati Salis est, quod è viperarum licet magna copia, vel sanguinis humani sani, impetratur. Reliqua omnia Alcalia sunt volatilia urinosa. Quod si verò sanguis calcinaretur, scorbutico Sale Acido infectus, valde probabile est, hunc plus Alcalisati salis daturum, propter Acidum sal manifestum Alkali urinosum figens.

Verùm hæc de Alcalisati Salis ante calcinationem in misto formali præexistentia dicta sufficiant. Sufficientissimè ex his constare arbitror, quomodo Alcalisatum sal non Naturâ, sed arte potius; ignisque adminiculo productum sit, adeoque *Formaliter* in misto non præextiterit, sed *materialiter* saltem eidem infuisse dicendum sit. *Atque hoc primum fuit circa salia alcalisata demonstrandum.*

Progrediendum igitur nunc esset, ad
alte-

alterum membrum de Sale Alcalifato demonstrandum; quòd nempe unio, volatilium Salium cum terrestribus particulis, tantæ Alcalifatorum Salium fixitatis causa sit. Verùm cùm in tertio & subsecuturo membro, demonstrandum sit; Volatilisationis Alcalifatorum Salium rationem, in terrestrium particularum separatione sitam esse, satiùs nos facturos arbitramur, si hoc præmittamus. Quod si enim solidè demonstraverimus, terrestribus partibus separatis, Fixitatem omninò sublatam, & Volatilia facta esse Salia; per se, suâque luce patebit; ipsam terrestrium particularum unionem cum Salinis, unicam Fixitatis causam fuisse.

Aggrediamur itaque rem ipsam, manifesta que inspiciamus experimenta & rationes fortissimas, quibus sententiæ nostræ veritas invicta, elucere valeat. Primò verò locò producemus experimentum, quo terrestrium particularum apertissima separatio, & post separationem, facilis Fixi volatilifatio, constare possit.

Fiat igitur Lixivium Salis Tartari,
sive

sive alius Salis Alcalifati. satis forte, huic per vices infundatur Spiritus Salis, eâ ferè quantitate, ut Punctum Saturationis inter hunc & Sal alcalifatum appareat: quod inde cognoscitur, si particularum motus s. effervescentia lenior observata fuerit. Ita enim nulla erit Salis Alcalifati particula, quæ non saturata fuerit à Sale fixo.

Quod si ritè attenderis, videbis Terram quandam è sale Tartari præcipitari, in ipsum vasis fundum: Tum filtra supernatantem salinum liquorem. Sic *Terram* salis Tartari in filtro relictam videbis; Liquorem salinum expone calori, ad humidi evaporationem, salium-que Crystallisationem; Crystallifatam sal in mortario lapideo teratur cum ana salis Tartari alcalifati, sic volatile sal quoddam urinosum inde adscendere naribus deprehendes.

Hæc est tota *ἐγχειρήσεως* ratio, cujus quæso, causas liceat accuratiùs inspicere, ut quid pro nostra sententia afferenda obtineat, patere possit.

Quòd verò spiritus salis ope, Terra salis Tartari præcipitetur, è præcipitationis

tionis natura, Acidi item ad Alkali concursus ratione, causa petenda est. De quibus hîc saltem præsupponemus; (nam integram præcipitationis doctrinam hîc afferre velle, prolixum nimis foret) Nunquam observatum esse *Acidi & Alkali* solutorum concursum, absque intestino particularum motu, s. effervescentia. *Deinde*, ex mutua ista particularum actione, præcipitari quicquid in alterutro istorum continebatur heterogenei. Ita si quid in Alcalino quodam solutum fuerit liquore, hoc Acido liquore affuso exinde præcipitabitur. Et si quid contra in Acido solutum fuerit menstruo, Alcali beneficio inde dejicitur. In nostro Experimento, Terrestræ particulæ Alcalino sale adhærentes, ab acido spiritu salis præcipitantur. Dum n. acidus salis liquor, cum sale Alcali Alcalisati salis conjungitur; Terrestræ particulæ, diversæ planè à sale Alcali naturæ, necessario inde præcipitari debent.

Cum igitur Terra ista alcalisati salis, adeò manifestè sensibus quoque externis pateat, neminẽ puto tanto laboraturum

raturum studio contradicendi, ut hæc negare aufit.

Terrâ hâcce præcipitatâ, supernatans liquor salinus, bina continet falia; alterum *Alcali*, cujus jam Terra præcipitata; alterum *Acidum* quo mediante præcipitatio facta. Acidum verò hocce Alcali, per Terræ separationem volatilifatum, denuò figit.

Quod ut appareat, necessaria est acidi spiritus figentis, ab Alcali falis Tartari volatilifato separatio; quod commodissimè fit; additione novi falis Tartari alcalifati. Sic enim Acidus spiritus, Alcali volatile citissimè deferit, & cum fixo Alcalifato conjungitur; quare Alcali volatile liberum redditum, superiora petit more omnium volatilium. Volatile verò hocce Urinosum, an ex fale Tartari; an verò ex spiritu falis profectum sit, quis dubitare poterit?

Ne verò cuiquam videatur, particulas hæce terrestres præcipitatas, externè saltèm fali Tartari ad-

adhæsisse, neque adeo intimè per particularum colliquationem, eidem conjunctas fuisse; experiatur quæso quis dictum experimentum, loco Salis Tartari Alcalisati Oleum ejus p. d. substituendo: Oleum hocce (impropriè quamvis dictum) instar aquæ fontanæ limpidum clarumque conspicitur, adeo ut non facilè quis suspicari possit, tam pellucidarum particularum poris, alias maximè opacas, contineri: nec tamen non continentur. Ope enim ejusdem spiritus salis, in lucem producantur. Neque tamen ante, poris suis, loculisque excidunt, quàm saturationis illud punctum attigerint salia. Quod valde miratus, cum primâ vice de hac Terræ præcipitandæ ratione cogitarem, periculumque facerem, an prout mente conceperam, experimenti veritas apparitura esset. Cum enim aliquot vicibus aliquam Spiritus Salis partem, Oleo isti p. d. affunderem, câ spe, fore ut tantum particularum terrestriû præcipitaretur, quantum Spiritus Acidi à fale Alkali saturatum esset, eventus voto non respondebat, ut etiam spes illa

illa terrestrium particularum è Tartari Oleo præcipitandarum, firmiter licet ante concepta, me fefellisse visa fuerit. Sed tamen, non omni abjectâ spe felicitis successûs, perrexî in spiritu isto Acido affundendo, tandemque observavi; liquorem, alioquin crystalli instar clarum, turbari, repositoque vitrô albicantes particulas, ad vitri fundum, properare conspexi, supernatante liquore claro. Hocce igitur per filtrum penetrante, terrestres particulæ hospitiiis suis nunc depulsæ, in filtro relictæ sunt, adhærentibus illis ex præcipitatione aliquot salinis particulis, Aquæ beneficio, separabilibus. Supernatantem istum, filtrumque penetrantem liquorem salinum, si in Crystallos redegeris, additione novi Salis Tartari Alcalisati, Acidum Salis Spiritum imbibentis, dividere poteris, ut Tartari Alcalisati Sal volatilifatum, nares feriat: quamvis hoc ex Oleo p. d. Sal volatile separatum, debilius futurum sit illo, quod è Sale Tartari sicco separatum fuerit, propterea, quòd

I

Salia

salia quò facilius p. d. solvuntur, eò propius ad simplicis aquæ naturam accedant, uti ex subsecuturis volente DEO pluribus patebit.

Occasionem verò, hanc Terræ præcipitandæ methodum experiundi, dedit mihi Sal Ammoniacum, vel potiùs Caput mortuum ejus, post volatilis spiritus urinosi separationem relictum. Cùm enim (quod pace tua B. L. hùc afferre liceat: nulla enim est jucundior, quàm circa rerum naturalium causas, quæ occupatur meditatio) in sale Ammoniaci Acidum quandam spiritum fixiorem, sal item urinosum quoddam volatile, ex urina vel etiam fuligine profectum, apprehendi mente voverem, adverteremque; Sal illud volatile, ab Acido spiritu, omnium commodissimè, Alcalisato Sale addito, separari posse, ita ut Acido salis Ammoniaci spiritu, Alcalisati salis beneficio absorpto, urinosum Volatile separetur; cæpi simul cogitare, quid ergo cum Capite mortuo istius salis Ammoniaci agendum esset; in quo itidem duo salia reperiri notabam. Alterum *Acidum*
ex

ex fale Ammoniaco relictum, *Alcalisatum* alterum, è fale Tartari s. Cineribus clavellatis additis, profectum. Et cum superiori epistola mea ad Cl. Langelottum monuissem, ex spiritu Vitrioli & fale Tartari commissis, *Terram* quandam præcipitari, quæ, uti & in præcedentibus dixi, principium fixationis sit in fale Tartari, ineptèq; magisterium Tartari Vitriolati dicatur; cæpi suspicari, & hîc Naturam prout in omni re similem esse, adeoque ex commistione illa Spiritus Salis Acidi, ex fale Ammoniaco, & Alcalisati Tartari, *Terram* hujus, prout in tartaro Vitriolato præcipitatum iri, atque Alcalisatum Tartari hâc ratione, post particularum terrestrium separationem volatile redditum esse: neq; requiri quicquam aliud existimabam, præter Acidi Salis Spiritus, ab Alkali volatilifato separationem; quam ut impetrarem addebam Capiti mortuo salis Ammoniaci, novum Sal Tartari alcalisatum, & statim extra Ignem, adscendebat sal quoddam volatile urinosum, adeò penetrans, ut nullum magis; atque hoc, nil nisi sal Tartari volatilifatum esse certò confidebam.

bam. Unicus tamen nihilominus animo obrepebat scrupulus. Metuebam namque, ne sal hicce volatilis, profectus esset, è reliquiis quibusdam salis Ammoniaci, propter minorem fortè Alcalifati salis quantitatem additam, haud ritè dissoluti; quod tamen vix fieri posse censebam; quòd pro spiritu salis, Ammoniaci conficiendo, salis Tartari addendi ad sal Ammoniacum subdupla saltem ratio necessaria sit, cùm dimidia saltem salis Ammoniaci pars, Acidus nempe spiritus, ad Alkali Urinosum anaticam rationem habens separari debeat, & præterea Alcalifata salia magnam Acidorum Salium partem absorbere queant. Quibus & hocce accedebat, quòd nonnunquam anatica Salis Tartari ad Sal Ammoniacum ratio observaretur, qualis in isto Capite mortuo Salis Ammoniaci, quod tùm tenebam, observata fuerat. E quibus omnibus haud obscurè colligi posse existimabam; nihil in dicto Capite mortuo Salis Ammoniaci non dissoluti reliquum esse potuisse, adeoque Salem istum volatilem pene-
tran-

trantissimum , è Capite mortuo isto adscendentem , revera uni Sali Tartari Alcalifato , per novi Alcalifati Salis additionem, ab Acido figente, post particularum terrestrium præcipitationem, liberato, acceptum ferendum esse. Ut tamen scrupulo hocce omninò liberarer , sequenti rem aggressus sum via.

Cum addito novo Alcalifato Sale Tartari ; è Capite mortuo Salis Ammoniaci , subtilissimum illum Salem , naribus percepissem , calori exposebam liquorem omnem , pro Salium volatilium omnigena evaporatione ; quâ factâ in residuo liquore falsi saporis , non aliter ac in Capite mortuo Salis Ammoniaci, duo habitare Salia colligebam. Acidum Ammoniaci nempe ; quo mediante Alcalifatam Tartari, in priori Capite mortuo à Terrestribus particulis liberatum , adeòque volatile redditum erat ; & novum deinde Sal Tartari alcalifatam , cujus auxilio, prius illud Alcalifatam , à figentibus particulis Acidis, in libertatem vindicatum erat. Quare huic posteriori Capiti mortuo ,

I 3 novum

novum addebam sal Tartari alcalifat-
tum, & prius illud Alcalifatum, sepositis
particulis terrestribus, ab Acido figente
liberatum, nares feriebat penetran-
ter. Atque ita omnem mihi exemptum
circa hanc rem scrupulum arbitrabar,
meque securum esse posse, confidebam,
sal illud volatile è capite mortuo salis
Ammoniaci adscendens, reverà pro sa-
le Tartari volatili habendum esse.

Ast verò, cum hancce volatilisan-
di Salis Tartari, rationem, solius Acidi
salis spiritus, in sale Ammoniaco con-
tenti beneficiò, perfici cernerem, ut tan-
to labore supersedere possem, securior-
que; redderet nihil prorsus salis vola-
tilis è sale Ammoniaco eidem commi-
stum esse, solo spiritu salis, experimenti
certitudinem tentare decrevi. Feci ut
decrevetam, & ex voto felicem experi-
menti sumus secutus successum, quan-
quam primâ fronte propter neglectum
(uti antea monui,) punctum saturatio-
nis, res non adeò uti speraveram suc-
cessura videretur, cujus ἐγχειρήσεις, ope-
rationisque rationes, in proximè præ-
cedentibus exhibuimus.

Atque

Atque hoc experimentum unicuique tanti æstimandum arbitramur, pro sententia nostra asserenda, ut (nisi plus justo nostra nobis placeat causa) nullum magis clarum aut evidens cogitari possit. Nam quod cæteroquin obscuritatem quandam asserere posset; terrestres particulas, revera è sale Tartari separatas videmus, manibusque tangimus. Easdem verò Fixitatis unicas causas fuisse, non minùs manifestè ex eo patet, quòd facillimo labore, solaque Spiritus Acidi denuo figentis separatione, Alcalisatum sal volatile reddi queat.

Sed tamen hocce adeò manifesto experimento præsupposito, paulatim ad obscuriora progrediamur, quibus tamen ex jam allatis tantùm lucis accedet, ut nullus omninò obscuritati locus futurus sit.

Non prætereundus verò modus iste est sal Tartari volatilifandi, cum Aceto, qui instituitur. Affundunt nempe sali Tartari acetum, abstrahunt hocce, ita Acidus sal in sale Tartari relinquitur, merumque phlegma è Retorta stil-

stillabit; postea novum acetum sali in Retorta relicto affundunt, & phlegma abstrahunt; repetunt hoc toties, donec acetum eadem aciditate quâ affundebatur, per Retortam destilletur, quin hocce signum erit; tantum salis acidi aceti, à sale Tartari absorptum esse, quantum capere possit. Sal hocce Tartari, acido aceti sale saturatum, Terra appellatur nonnullis Tartari foliata; alii verò Salis Tartari volatilis nomine idem insigniunt. Et revera ipsi titulus hicce competit, quòd particulæ terrestres, Alkali Tartari figentes, additione aceti, præcipitatæ sint. Quod ipsum evidentissimè conspicitur, si Lixivio Tartari affundatur acetum, ad punctum saturationis usque, ita illicò Terra Tartari fundum petit; Atq; adeò & hocce satis manifestum est experimentum, pro terrestriū particularū præcipitatione demonstranda.

Quid dicemus verò de occultiori illo modo Helmontiano, volatilisandi Alcalisata salia, beneficio oleorum destillatorum. Verba Tr. prim, Chym. sunt. Quando inquit Helm. Oleū Cinnamonomi &c.

Suo Sali Alkali miscetur, absque omni aqua, trium mensium artificiosa occultaque circulatione, totum in salcm volatilem commutatum est. Verè essentiam sui simplicis in nobis exprimit & usq; in prima nostri constitutiva sese ingerit.

Cujus operationis rationem veram, non crediderim hætenus à multis explicatam : plurimi acquiescunt in eo : si audierint, sal hoc componi ex oleo destillato, & sale fixo, quorum ab altero, alterum volatile redditum & utrumque Ignis adminiculo associatum. Verum salvis aliorum sententiis mihi nec non satisfaciunt. Neque enim dixisse satis est, unum ab altero volatile redditum esse, nisi ipsa volatilisationis causa solidè afferatur. Quæ etsi difficilis admodum prima fronte videatur, facillima tamen evadet si eorum quæ in antecedentibus jam demonstravimus, quædam hîc præsupponantur, & spontè patebit, hujus volatilisationis unicam ac solidam rationem esse, *terrestrium particularum figentium separationem*. Unum verò ut dixi hîc ex antecedentibus repetendum

I 5

dum

dum est, quòd nempe oleis destillatis prout inflammabilibus omnibus insint particulæ Acidæ. Quod cum fusè satis ibidem de natura ignis, & Rationibus & Experimentis ostensum sit, citratædium hîc repeti non potest.

Hocce igitur Oleorum *Acido* præsuppositô ; totum negotium perfacile erit. Quemadmodum enim uti jam jam ostensum, beneficio spiritûs salis Acidi, vel etiam Aceti, horumque conjunctione cum Alcalifato sale, Terra fixorum Salium præcipitatur, atque propterea, Alcalifatam sal volatile redditur : ita & idem hoc de Oleo Chymicorum *Acido* accipi debet, præsertim cum nulla ratio subsit, quare huic oleorum acido denegetur, quod aliis acidis concedere cogimur.

Olea igitur, dum cum sale fixo diligeruntur & circulantur, illorum particulæ Acidæ, hujus Alcalicas arripiunt, arreptas à particulis Terrestribus liberant, adeoq; volatiles reddunt. Neq; opus est, ut ante Acidum illud Oleorum ab Alkali volatilifato separatur,

retur, quã volatiles particulas percipere possimus, prout in Experimentis cum spiritu salis, aceto, paratis fieri debebat, quorum Acidum, additione novi Salis Tartari, ab Alkali Volatili separabatur. sed ipsæ quoque oleorum particulae Acidæ, volatilifato Alkali incoagulatae, volatilitatem ejus non impediunt. Horum enim Acidum volatilius est: Salis verò & Aceti fixius. Adeoque, quod ostendendum erat, omnis hujus volatilificationis ratio, in terrestrium, æquè ac priorum Experimentorum, particularum separatione consistit. Ita etiam de Oleo Tartari cum proprio sale circulato sentiendum.

Hisce valde affinis est modus alius Sal Tartari volatilifandi, per Spiritus Vini sæpius reiteratam abstractionem, qui instituitur, iisdem quoque fulcris innititur: quod tamen operæ præmium erit solidius ostendere, ut & hoc loco terrestrium particularum separatio appareat. Vocatur aliàs communiter *Balsamus samech*, Sal Tartari illud, Spiritu Vini imprægnatum, cujus ἐγχειρήσεις hæc sunt,

Ab-

Abſtrahunt à Sale Tartari Spiritum Vini rectiſſimum ſæpius, donec æque rectificatus, à Sale Tartari redeat ſpiritus vini, quam fuerat affuſus. Et ſi enim primâ vice ſummè Alkaliſatus affunderetur, maximeque igneus, ut deflagrans ne unicum aquæ guttulam poſt ſe reliquerit, quæ pyrium pulverem contra exploſionem defendere potuiſſet; ſemel tamen ſaltem abſtractus, maximam Igneæ ſuæ virtutis jacturam paſſus deprehendetur Phlegmaticusque factus erit. Cujus rationibus oſtendendis, hîc locus haud ſatis commodus eſt; erit tamen in ſubſequentis uberrimè de his dicendi campus. E quibus tum pluribus dicendis, hic ſaltem unicum hocce mutuabimur; ſpiritum vini, per Acidi ſeminalis ſalis, ab Alkaliſato Tartaro abſorpti privationem, in Aquam converſum eſſe. Quod quidem tanto majori jure mihi conſeſſum arbitror, quantò pluribus in doctrina Ignis oſenſum eſt experimentis, ſpiritui vini revera particulas acidas in eſſe, quibus ratio caloris ſeu inflammationis & inebriationis tribuenda ſit.

Qui-

Quibus præsuppositis constare potest; quasdam spiritus vini particulas acidas in Sale Tartari relinqui; cujus quoque non est obscurum indicium, quod pondus Salis Tartari, per erèbriorem novi spiritus vini rectificati abstractionem, auctum deprehendatur. Atque de hisce spiritus vini acidis salibus, eodem jure, quo de oleorum destillatorum in antecedentibus aciditate, dici potest; quòd horum beneficio, & cum Alkali Alcalisati salis conjunctione, Fixum volatile reddatur, per terrestrium particularum separationem.

Atque hujus volatilifati salis, vestigia quædam, in spiritu vini Tartarificato observantur. Dulcedo namque in illo gustûs sensu perceptibilis, arguit; particulas spiritus vini acidas, coagulatione sua, in sublimatis simul alcalisati salis particulis, in dulces conversas esse; qualis contingit conversio in Aceto; saturno, vel marti, incoagulato.

Cum verò hâc ratione non plus volatilifetur Salis Tartari, quàm mediantibus Acidis illis, spiritûs vini particulis, à terre-

terrestribus liberatum fuerit, sequitur, quòd creberrima spiritûs Vini abstractio hîc requiratur, si quis copiam quandam salis Tartari volatilifandi, animum induxerit. Plena enim & omni-modâ salis Tartari, à particulis acidis separatio, hîc requiritur, usque dum spiritum Vini, integris viribus, nullâque acidarum factâ jactura, redditum esse, advertatur. Quod ipsum, quàm sit futurum difficile, illi constare potest, qui attenderit; quanta fortissimi etiam aceticopia, ad sal Tartari saturandum requiratur, cujus tamen aciditas manifesta & fixior est, quæ in spiritibus Vini occultior est & volatilior. Plura quæ de his dici possent studio prætereo, cùm præterea nihil hîc aliud nobis demonstrandum sit, quàm & modum istum, Volatilifandi fixa, per *Samech* appellatum, æquè ac priores, in terrestrium particularum separatione situm esse.

Neque alia ratio est, in fermentatione salis Tartari cum proprio fermento, Tartaro scil. crudo, cujus Acidum dum cum Alkali Alcalifati salis Tartari
con-

conjungitur, *Terra* præcipitari debet figens, quam se deprehendisse non diffitetur *Cl. Langelottus* insipidam, *epist. suæ* p. 6.

Quamvis verò sal Tartari Alcalifat-
tum, cum Tartari crudi acido conjun-
ctum, amissione Terrestrium particu-
larum, Alcalifati salis formam exuat,
Volatile tamen ejus nondum innotescit;
quòd sub jugo hætenus Acidi
Tartari contineatur, prout in superio-
ribus experimentis, volatilifatum sal
Tartari sub jugo spiritus salis Acidi s.
Aceti. Volatile ergò illud Urinosum,
quod impetratur, non tam è sale Tartari,
quam Tartaro crudo profectum esse
existimandum est: cum sal Tartari, hoc
loco se habeat ad Tartarum crudum, pro-
ut ad sal Ammoniacum; de cujus capite
mortuo, quæ supra dicta sunt, si cum his
conferantur, restantò patebit clariùs. Ac
præterea probabilitas quædam his ac-
cedit ex eo, quòd è solo Tartaro crudo,
absque sale Tartari, solius Aluminis cru-
di, anaticâ proportionem, additione, te-
stimonio *Cl. Daniel. Ludovici*, impetrari
possit, sal Urinosum penetrantissimum.

Dein-

Deinde cum Sal Tartari volatile *Excell. Langelotti*, prorsus inodorum sit, uti ipse corâm fassus est, manifestissimum hoc indicium est, volatile ejus, à particulis quamvis terrestribus liberatum, ab Acido tamen Tartari, hætenus fixatum esse. Cæpi ergo cogitare, an non volatile illud, Tartari crudi potius soboles sit, quàm Alcalifati Tartari. Neque ideo in epistola mea ad *Cl. Langelottum* obscurè tuli, in dicta fermentatione, primariò quidem non ipsum Alcalifatam Tartari volatilifari omnimodè, sed Tartarum potius crudum. Quod cùm paulò duriùs dictum visum fuerit *Illustriss. Societati Regiæ*, volui hîc paucis sententiam meam clariùs explicare.

Ex allatis igitur experimentis, æquè ac rationibus manifestò satis patet; quod per *solam Terrestrium particularum separationem*, Alcalifata Salia fixitatem suam exuant, & *volatilia* reddantur; Unde simul innotescit, sponteque sua fluit; *terrestres particulas*, Ignis vehementiori colliquatione, Alkali Sali conjunctas, tantæ

tæ Alcalifatorum salium *fixitatis* causas fuisse.

In hac verò fixorum salium volatilisatione, ac præcipuè salis Tartari, cum tot Celebres etiam Viri dies sæpè ac noctes consumpserint, paucis quæso de usu ejus liceat monere, cujus spe inducti, tot labores susceperint.

Maximi ingenii *Helmont*, c. xv. de Febribus, præter alia loca, maximis hoc Sal extollit laudibus, & cum de usu ac nobilitate liquoris *Alcabeſt* quædam attulisset, addit: *Quod si verò ad hoc Ignis arcanum non pertingatis, discite saltem Salcm Tartari reddere volatilem, sic intimas nacti eritis rerum essentias.* Alia elogia, videantur apud alios; quibus tamen, nescio quantum tribuendum sit. Ego certè liberè fateor, ut sentio; aut majores nostros Philosophos, sub nomine Salis Tartari volatilis, aliud occultare voluisse; aut certè exitus promissis non respondere. Nemo namque credo (aliorum salvis sententiis) experimentum afferre poterit, Metallum cuiusdam

K

dam

dam, ope volatilifati falis Tartari radicaliter soluti; aut aliam quoque, è vegetabilibus saltem paratam essentiam, quæ ope aliorum Alcalium Volatilium Urinosorum parabilis non foret: quid ergò peculiare à cæteris Volatilibus salibus possidebit, cum æquè Urinosum sit ac illa?

Neque Cl. *Langelottus*, satis sufficienti jure, prærogativam ejus præ cæteris salibus, inde derivasse videtur, quòd idem deprehenderit in affectibus externis, tum præcipuè Gangræna extinguenda, insignem opem attulisse; cum eosdem planè effectus ipsi promittere ausim, ex aliorum Urinosorum salium usu; cujus haud leves reddi possent rationes, si hujus loci foret; quò ipso tamen interno ejus usui nihil detractum volumus, quem, convenienter, convenientibus morbis applicati, satis egregium esse, utraque manu, & Ratione & propria Experientia edocti largimur: præcipuè quando obstructæ viæ aperiendæ erunt, aut variæ peregrinæ ac
hosti-

hostiles corpori aciditates, saturandæ. Verum ut dixi, eadem commoda, & alia Urinosa salia præstare possunt, & præterea, sal volatile ex Tartaro, ab illo è Sale Tartari, non differt.

Quod quandoque advertens, cœpi cogitare, anne inter tot volatilia salia, specifica quædam & seminalis interesset differentia, cujus ratione in operandi etiam viribus, quodammodo differant, an verò ejusdem omninò cuncta speciei essent? & recordatus sum loci cujusdam *illustr. Boyl. in Chymist. scept.* docentis; figurarum quandam in volatilibus salib. reperiri diversitatem, ita ut sal volatile CC. parallelepipedum figuram, sal volatile sanguinis humani cum spiritu vini digestum, Rhombi ideam referat. Cujus diversitatis aliquam causam esse debere ratus, non dubitavi, eandem seminum s. Idearum diversitati acceptam referre. Quemadmodum enim, ut in subsequendis demonstrabitur, in rerum naturalium generationibus semen s. Idea se habet, ut Regula vel norma, cujus ductum mechanica ejus instrumenta Acidum &

Alcali fequantur; ac præterea ostendetur, femina rerum in Acidis habitare, atque omnis soliditatis & coagulationis causas, ex Acido Sale petendas esse; figurarum istam diversitatem, diversis feminalibus acidis tribuendam effeduxi.

Confirmabar verò non parum, quòd sanguinis humani Sal, cum Spiritu Vini digestum, talem figuram referret, qualem alioquin in Sale Tartari Crystallifato observare licet. Cujus non est ratio alia; quàm quòd Acidum illud Salis Tartari, & hoc Spiritus Vini, Sal volatile sanguinis humani coagulans, specie eadem sint; adeoque Alkali sanguinis humani quamvis propriâ formâ gaudeat (nullum enim, adeò purum est Sal Alcalinum, quod non feminali quâdam aciditate imbutum sit; alioquin, uti in subsecuturis, ostendetur, in aquam Elementalem relaberetur) à potentiori Spiritus Vini aciditate feminali tamen, superetur. Quemadmodum si sali Tartari Alcalifato, affundatur Spiritus Nitri, potentior hujus Spiritus, aciditas feminalis, Cry-

Cryſtallos format, non Rhombi, cryſtallis ſalis Tartari competentis figurâ, ſed Nitri potiùs oblongis ſtiriis conſpicuas.

Adeoq; figurarum hæc diverſitas, diverſitatem ſeminum indicans, docet nos, ipſa etiam Alcalia Urinoſa, ſpecificam quandam à ſe invicem obtinere differentiam.

Hæc tamen ſeminalis alcalium volatiliſ differentia, in Curatione morborum non adeò attendenda videtur, cùm Alcalia omnia tantillum ſaltem ſeminis poſſideant, quo impediri poſſit, ne ſpontè in aquam ſeu principium ſuum reſolvantur, adeoque vacua ſint, ſeq; ad certorum morborum cauſas habeant, ut materia ad formam, h. e. indifferenter, ad hoc vel aliud hoſtile acidum abſorbendum.

Neque proinde audiendus videtur *Helmontius*, hanc docens inter Spiritum Urinæ, & ſanguinis humani, differentiam; quod poſterior Epilepſiæ medeatur, prior non; cùm Experienciâ conſtet; ſpiritum ſalis Ammoniaci, Urinæ ſo-
bolem, in convulſivis motibus præcavendis, vel ſedandis, non adeò ſpernendum eſſe,

Quare alcali Tartari urinosum, ex Alcalifato Tartaro per terrestrium particularum separationem profectum, quamvis à cæteris urinosis salibus specificè differat, ratione feminis nempe, quod in Acido Tartari, à cæterorum Acidorum feminibus diversum est. Neque ideo tamen tanta præ cæteris urinosis salibus ipsi Prærogativa debetur, cum nullum hætenus allatum sit, tam egregiæ virtutis ejus experimentum, five in corporum solutionibus, five morborum curationibus, propter quod aliis volatilibus salibus jure anteponi debeat.

Atque hæc, de Alcalibus volatilibus quæ dicta sunt eadem quoque de vegetabilium Alcalifatis accipienda sunt. Neque enim tanta revera est inter ista differentia, uti plurimi opinantur, ut propterea magnus illorum delectus habendus sit. Ita frustrâ in Alcalifato Absynthii quæritur, quæ in Absynthio ante Calcinationem fuit virtus; neque Alcalifato Euphrasie, ulla inest specifica oculos sanandi vis; neque Rutæ Alcali aut Lavædulæ, eæ, quæ herbæ inerant insunt

infunt virtutes; sed cuncta, quemadmodum sapore non differunt, ut nec peritissimus parandorum salium artifex eadem distinguere sciat, ita nec operandi rationem diversam obtinent, cuncta nempe variis vitiosis fermentis corrigendis inserviunt; neq; Rutæ Alcalisatum aut Lavendulæ, minus Stomachicū est quàm Absinthii. Cum enim præterea à veritate valde alienum sit, dari certa vegetabilia, certis humani corporis partibus Idiocratica quâdam facultate dicata (de quibus hîc dicendi locus non est) minus decebit; illas virtutes in Alcalisato, seu violento Igne, exusto sale, percontari, quas recenti Vegetabili inesse, affirmare non audebamus. Seminales enim vegetabilium Virtutes, Ignis violentiâ non possunt non in auras abiisse, minimâ saltem illarum quantitate superstita, quæ impedit, ne sponte in aquam resolvantur salia; quod fieret, si omni feminali Acido privarentur.

Verùm tantilla feminis pars, quamvis specificam quandam Alcalisatorum salium differentiam causetur, medi-

camentitamen operationem non faciat diversam, ut e. g. in Intermittentibus Febribus, Alcalisatum Absyrthii, Alcalisato Centaurei minoris, sive Hyperici præferendum sit.

Quæ cum reverà ita sint, non possum admirari satis curiosi tatem illorum, qui Clysteribus, apoplecticis applicandis, non verentur admiscere sal rutæ, aliorumque pro Cephalicis vulgò habitorum vegetabilium. Sic error errorem parit. Dum enim falso sibi persvadent, Rutam Cerebri morbis medelam afferre specificam; ruunt in alium; Rutæ nempe Alcalisato sali easdem, quæ ante calcinationem aderant, inesse specificas Virtutes; & tandem in tertium; Possesse nempe Alcalisatum Rutæ, putatitias Virtutes, laboranti cerebro, etiam Clysteribus (quorum tamen ultra valvulam intestinalem nulla operatio) communicare. Rutæ certè ad Cerebrum, non est magis specifica virtus, quam talorum leporis, ad Cerebri convulsivos modus sedandos; nemo verò facile dixerit; ossiculis pedum, cum cerebro tantam intercedere affinitatem, ut

ut huic medicaminis rationem tribuere aufit. Quomodo enim hoc modo Cranium humanum Cerebro medicamentum esse, Jure affirmari possit? aut cujuslibet vegetabilis, vel alius rei, cum qualibet humani corporis parte, specificam congruentiam fingere licebit. Certè si Ruta v. g. eandem morbi causam, quam in cerebro offendit, offenderet in sinistri pedis pollice, mederetur ipsi, adeoque non minori jure cum pollice pedis sinistri affinitatem habere dici posset, quàm nunc cum Cerebro. Sed de his obiter. Hæc enim peculiarem sibi postulant operam, quia brevibus explicari fatis non possunt: sufficiat saltem notasse paucis; Alcalifatorum salium tantum delectum habendum non esse, neque etiam Fixorum, v. g. Salis Tartari volatilifata salia, præcæteris quid obtinere, quod prærogativâ dignum sit.

Atque hæc de Alcalifatorum salium volatilifatione allata, adeò arbitramur esse evidentia, ut nullus dubio locus esse possit. Neque excogitari unquam modus poterit, Alcalifata salia

volatilifandi, qui non in terrestrium particularum separatione consistat. Quod ipsum quoties cogito, non possum satis admirari, *Zwelferum*, Virum, in Pharmacopolarum erroribus emendandis, satis strenuum & felicem, in Alcalifati Tartari volatilifatione tamen, adeò graviter lapsum, ut cùm hæc scriberet, omnis ferè Philosophiæ oblitus fuisse videatur. Quod invitus scriberem (neque enim defunctos jam Cl. Viri manes turbare animus est) nisi & hodie quosdam Viros, Clariss. etiam, hoc ipso seductos adverterem. Ita verò ille Pharmacopææ Regiæ p. 247. *Tartarum Calcinatum, & in Cella collocatum, sponte suâ in liquorem limpidum, ponderosum, & salinum, resolvendum vel liquandum est (Oleum Tartari aliàs dictum) Liquor hic, in Retorta, seu Alembico vitreo humili, super Ignæ aræ, abstrahatur ad siccitatem Salis in residuo manentis: Relictus hic Sal, porrò in cella collocatus, nonnunquam astris etiam expositus (ô inutiles curas!) ab humiditate aërea attracta liquetur, quæ denuò in Arena ut factum antea, abstrahatur, eoq. liquo-*

liquore abstracto, semper asservato, Salem in Cella & aëre denuò per se liquefieri facito & destillato; quod toties, donec omnis Sal Tartari, hoc modo à Volatili illo attracto Sale universali aëris, volatilifatus, transierit per Alembicum, repetendum. Et hac demum ratione, certior esse poteris. B. L. Virtutes Salis Tartari per Alembicum transiisse, teq; accepisse succincto sermone Secretum magnum. Tuae & proximi Saluti destinatum, quo felix utere. Verùm B. L. potiori jure certus esse poteris, Alcalisatum Tartarum hâc ratione penitùs destructum, adeoque nihil ejus virtutis per Alembicum transiisse, Teq; accepisse succincto sermone Aquam Elementalem.

Hoc ipsum verò non facile demonstrari poterit, nisi quæ in subsequuturis de natura seminum & Calidi innati dicenda erunt, huc afferantur. Quod ipsum tamen cum paucis absolvi nequeat, quædam saltem monēbimus, deinde uberiùs explicanda; *Salia*, nempe *Alcalisata*, nihil reverà aliud esse fundamentaliter, quàm *Particulas Aqueas*, à Tantillo *Acido* semi-

Seminali, in rigidas seu salinas mutatas; quo feminali acido destructo, illicò in aquam mutantur. Unde fit, ut quo pauciori Acido gaudeant Alcalifata, eò citiùs p. d. fluant, & in aquam abeant. Violenta verò ignis actio, magnam Acidi hujus (per se volatilis) jacturam causatur; adeoque quotidianâ videmus experienciâ, quò gradu Ignis fortiori calcinata fuerint Alcalifata, eò citius p. d. eadem resolvi. Atque hoc per Acidi coagulantis defectum fieri, manifestissimè inde patet, quòd aliud Acidum, sulphuris v. g. loco amissi redditum, fluxum istum p. d. impediat.

Salia igitur fortiter Alcalifata, humido aëri si exponantur; tantillum quod de Acido Seminali reliquum est, amittunt, Aëre, menstruali sua virtute idem solvente; adeoque tantum Alcalifati Salis in aquam Elementalem resolvitur, quantum feminalis Acidi ablatum fuerit; cui aquæ, reliquæ semine nondum orbatae particulæ salinæ innatant. (Salia namque quia fundamentalis suo puncto Aqua sunt, & ad ejus natu-

naturam proximè accedunt, in aquis promptè solvuntur) quæ si abstractâ aquâ, Aëri denuò expositæ fuerint, feminalibus particulis consumptis, ipsæ in aquam resolvuntur. Atque hoc repetitur toties, donec Acido seminali omni, penitus destructo, ceu parte formali, nudam materiam h. e. Aquam elementalem conspiciamus. Cui quæso quænam insignes in esse poterunt virtutes medicamentosæ? Mirum profecto est; virum, adeò in veterum, aliorumque erroribus aperiendis sedulum, sal Tartari volatile, ab elementali aquâ distinguere non potuisse. Et reverâ hîc videmus, quantum obsint Experimenta, citra Rationem, Causarumque investigationem considerata. Nubem nos faciunt accipere pro Junone, ut interdum ea æstimemus, quorum postea, si cognoverimus, nos pœnitere possit.

Præter hoc igitur, quod in præcedentibus de Alcalisato Sale jam demonstratum est; non præexistere illud formaliter ante Calcinationem in misto, patet nunc in dicto experimento

mento Zwelferiano , eadem in aliud prius , Aquam nempe elementalem reducibilia esse ; quô ipsô veri principii rationem amittunt. Neque hoc de Alcalifatis tantùm Salibus ; sed & aliis , è quorum colliquatione Alcalifata produci , in antecedentibus demonstravimus , accipiendum est. Adeoq̃ue Tria illa Chymicorum , *Sal*, *Sulphur* & *Mercurius* , propter rationes allatas , nullo modo principia naturalium rerum , vera & genuina , dici possunt.

Postquam igitur in antecedentibus ostensum , nec Quinarium Modernorum ; nec Quaternarium Peripateticorum ; nec Ternarium Paracelsistarum , Principiorum numerum , sibi constare posse : Videndum nunc erit , quid Binario nostro , Veritatis ac Soliditatis insit : cùm non sufficiat , quæ pro veris hætenus corporum principiis haud meritò habita sunt , indicasse , nisi & quænam pro veris habenda sint , explicetur. Quod quidem expedivisse nos arbitrabimur , ubi cuncta sublunaria ex *Aqua* & *Seminibus* beneficio

ficio *fermentorum* s. *Spiritus Universi* conjunctis, composita esse demonstraverimus.

Qui rerum generationem, progressionem dicunt à Non-Ente ad Ens esse maximum certè errant errorem, si per Non-Ens intellexerint *Negativum*, ac non potiùs tale quoddam, quale cæteroquin *Privativum*, Scholæ appellare consueverunt; quod, etsi reverà quid positivi sit, nondum tamen est id, quod esse debebat & poterat. Ex hoc enim rectissimè rerum Generationes incipere dici possunt, cùm contra ex Nihilo negativo, nihil unquam naturaliter quicquam productum sit.

Prima quidem rerum productio fiebat, citra ullam præexistentem materiam, ex Nihilo negativo, ab Omnipotenti Ter Opt. Terq; Maximo Deo, virtute verbi sui efficacissimi FIAT. Ita enim dicit Geneseos scriptor Moses; cùm dixisset Deus *Fiat Lux*, factam esse lucem, &c. quam productionem, *Creationem* appellare solemus. Cùm verò; pro absoluto suo arbitrio & Voluntate, creâset Deus creaturas, non simplices, fed

sed compositas , ex ejusmodi Principiis; quorum intestinis diffidiis , individuo, non quidem necessaria annihilatio , sed mixti dissolutio tamen & interitus imminere posset , quò tandem individuis singulis extinctis, species ipsæ omnes (utpote quæ extra & citra individua non existunt) ad interitum festinâssent ; adeoque mundus hicce universus, adeò affabre in Sapientissimi , Optimi & Potentissimi Creatoris gloriam exstructus, ante corruisset , quàm Creatoris Bonitas , Sapientia, Potentia , exinde cognosci potuisset : placuit ei , pro immensa sua Sapientia , rebus corruptioni obnoxiiis , Virtutem infundere sese multiplicandi , sibi quæ simile generandi , ut quam individuis perpetuitatem dene-gârat, eandem species possiderent. Hoc ipsum clarè fatis explicat Moses , dum Universi Creatorem absoluto sex dierum Opere dixisse scribit , *Crescite & multiplicamini*. Quorum prius *Crescite* individuorum conservationi dictum videtur, ut illa augmentum capere ac nutriri possent : posterius verò *multiplicamini* ipsas

ipsas rerum species concernere credo, cuius beneficio, rerum generationes expediantur, ut idem ex seipso renasci quasi, & simile procreare possit, generatione verâ & univocâ. Clarioribus verò verbis ipsum expressum legimus vers. II, c. I. Gen. *Germinet terra germen, herbam producentem semen; arborem fructiferam facientem fructum juxta speciem suam, cui insit semen suum.* Atq; ab illo ipso temporis, quo hæc dicta erant, articulo: in hunc usq; diem, hæ naturæ leges obtinuerunt, ut cuncta individua sui in specie conservationem quærerent.

Generatio itaq; rerum creationem secuta, certè ex non-ente nullo modo initium sumit, sed illis particulis; quibus virtute verbi benedictionis, illa sese multiplicandi vis insita est; entibus reverà positivis & realibus.

Hæ verò particulæ, Generationū principia, non insunt omnibus eadem; sed quælibet species, in producendo sui generis individuo, specificum, à cæterarum specierum omnium semine, distinctum semen possidet. Ita in semine hominis nulla deprehenditur potentia producen-

L

di

di Leonem, neq; contra Leoni semen erit, homini producendo aptum. Neq; in ipso v.g. Homine, semen propriè unicum est & omninò simplex: sed prout ad humanum corpus efformandum variæ concurrunt partes Organicæ, tam internæ quàm externæ, quarum conjunctione humani corporis fabrica exstruitur; ita necesse erit, singulas partes, propriam sibi virtutem formatricem agnoscere, adeoq; hanc formatricem virtutem compositum quid esse; non quidem in ordine ad subiectum v. g. Hominem producendum, cujus intuitu reverà simplex est, quia potentia, quæ ipsi inest, particularis est, & determinata ad unicum actum; hominem solum, nec aliud animal Leonem, equum, canem producendum; sed in se considerata, ad diversas partes individui, quarum ratione, compositam dicendam esse videtur. Neq; enim, eadem numero formatricis virtutis particula, quæ cerebrum exstruxit; & brachio vel manui producendis apta erit. Neq; stomachum, Cor, Hepar, aut pulmones, quæ fabricarunt particulae, externis corporis differentibus musculis, vel etiam intestinorum convolutionibus figuram largi-

entur. Aut singulis his, universalē quandam potentiam, ad tam specie diversos actus, inesse dicendum erit. Quo concesso, sponte sua sequetur, ex uno eodemq; humano quoq; semine, diversa specie animalia produci posse. Nam si singulæ formatricis virtutis particulæ, adeo indifferentes sunt, ad actus specie diversos producendos, quid prohibet, quominus integrum semen, cujus partes sunt particulæ istæ, indifferenter quoq; se habeat ad animalia specie diversa producenda? ita ut perinde sit, quod nam sive equi sive canis semen, ad alterius animalis generationē concurrat. Hoc verò quemadmodū contra omnem rationem est, & quotidianam experientiam, non sapientū tantū, sed ipsius vulgi etiam: quibus constat; non fieri ex quolibet quodlibet, adeoq; illa quæ fiunt, in proprio semine ante delituisse: Ita quoq; absurdissimū erit, & ab omni ratione alienū, tot diversarū figurarum usumq; partium, corporis v. g. humani, particulares generationes, unicæ ad omnes partes indifferenti virtuti plasticæ tribuere. Quod ut clariùs innotescat, videamus unicum saltē nutritionis exemplum, quæ species quædam generationis est. Bos v. g.

varias diversæ naturæ partes integrales habet; *cor, hepar, pulmones, lienem, stomachū, intestina renes, venas, arterias, nervos, membranas, tendines, ossa variè figurata, cartilagine plurimas, cutem, cornua &c.* quibus singulis, virtus insita deprehenditur augmentum capiendi: (Neq; enim bos sed vitulus nascitur) Quod fit sæpius reiterata alimentorum exhibitione, quâ cessante & ipsa cessat tandem animalis nutritio. Adeòq; ipsa alimenta, singulis bovis partibus incrementum afferunt.

Ast verò nutritur bos, & incrementum suscipit, quoad singulas partes, solius graminis & aquæ simplicis beneficio. Quod mirū profectò videretur, & fabulæ quàm vero similis, nisi hoc ipsum quotidie ferè videre licitum esset. Unde fit, ut plerumque oculis ac animis hæc vilescant, & ut res nullius aut certe parvi momenti, omninò non advertantur; cùm tamen hæc res, investigatione haud intermissâ, dignissima sit pariter & jucundissima, quæ solidè intellecta, incredibilem lucem affert sapientissimorum majorum nostrorum placitis, de natura Formarum, Idea Platonica, Metempsychosi Pythagorica, obseu-

obscuritatibus alioquin gravissimis, immerfis, ac propterea à posteritate, in alienum à tantorum virorum sententia, sensum detortis, intelligendis.

Quod ergò dicendum erit, de nutrimento & augmento bovis, è gramine & aqua simplici, quod accepit? Numquid dicere licitum erit, tot diversas partes bovis dissimilares, in gramine & aqua formaliter ac reverà existisse, *Osseas, Musculosas, Cartilagineas*, &c. ita, ut particulæ graminis carneæ, musculosæ, bovis carni appositæ saltem, cartilagineæ cartilagineis, tendinosæ tendinosæ &c. nutrimentum, propter particularum quoad substantiam similitudinem, præberent? Nemo quidem hoc dixerit, qui præsertim attenderit, non solum bovem graminibus vesci, verum & oves, equos, insecta varia, ipsumq; hominem. Nam & jantiquissimis temporibus, ante plenam fructuum, frumentorumq; copiam, horumque commodam præparationem, homines radicibus ac herbis variis spontè nascentibus, enutriti fuerunt, hodieq; Indiæ Occidentalis Incolæ, è radice certa panem coquunt, *Cassaba* ipsis dictum, quotidianum cibum; nosq;

nosq; Europæi, frequentissimè lactucis, variisq; graminū generibus vescimur; & adhuc acerrimè disputatur, quisnā cibus vegetabiliū an animalium, nobis magis propius & competens sit. Ast in dictis animalium speciebus, maxima partium difformitas est. Quamvis enim iniis, quoad partiū integralium comūnem naturam, quā v. g. ossa brutorum, non minùs ossa sunt, quàm hominis, cæterorumq; animalium, & caro ovilla, à bovilla conceptu communi non differat; Ossā tamen, ab ossibus diversorum animalium, proprio quodam conceptu, Aliud quippiam & Propriū obtinent. Et ipsam ovillam carnem, à bovina, vel Gallinæ, multum differre sapor & odor docent. Tum verò præcipuè Insecta, viridantes frondes & prata depascentia, à cæteris jam allatis animantibus immane quantum, & naturæ proprietate, & organorum formatione distant, & tamen eadem hæc communi cum cæteris animalibus nutrimento, conservantur.

Quòd si igitur, tot diversarum figurarum & proprietatū causas, è gramine repetere vellemus, quid quæso de gramine fiet?

fieri? nonne dicendum esset; in gramine lateret tot animalium non similes saltē partes, verum etiam Organicas, *brachia, pedes, cor, hepar, pulmones, caput, &c.*? quod valde sensuum & Rationis testimonio absurdum foret. Quis enim nescit, quot distet parasangis natura plantarum, ab animalium.

Vim ergò hanc animalium, ac v.g. bovis formatricem, non tam extra corpus bovis, in gramine quærendam esse, quàm potius in ipso animalis corpore, & quidem singulis ejus partibus, diversam collocandam esse, Ratio suadet: ut diversæ animalis partes, contineant quiddam, quod in aliis partibus reperire non liceat, cujus beneficio alimentum adductum in naturam hujus v.g. Renum non verò Pulmonum mutetur; Quò ipso alimentum per se cæteroquin indifferens, ad hanc vel aliam partem nutriendam, ita determinetur, proprioq; quodam partis sigillo, ita insigniatur, ut non possit non, hanc partem necessariò nutrire.

Atq; ejusmodi sigillo proprio insignitū alimentū, alterius partis sigillū vel etiam Ideam nunquam suscipiet, nisi à potiori

quodam & potentiori fermento, debilius suppressum fuerit. Quod potissimum contingit in ventriculis animalium, strictè sic dictis.

In ventriculum hominis, si descenderit Caro musculosa, v. g. ovis, proprio fermento & Idea instructa; sed debilior, quam ut fermento stomachi potenti & manifestissimo resistere possit; superatur, & quæ ovilla caro erat, fit humana. Eodem modo Ventriculus canis, ossium commestorum fermentum, & Ideam superat, ut & musculosæ carni nutrimento esse possint. Neque alia ratione gramen propria Idea & fermento (quid per fermentum intellectum velimus in subsecuturis pluribus explicabitur) insignitum; à fortiori v. g. bovis ventriculo subigitur, talique Idea notatur, quâ ad solum bovem, non aliud animal nutriendum, determinatur. Idem gramen si in equi vel Insecti ventriculum, vel huic quandam analogam partem, delapsus fuisset, & horum naturam induisset.

Neque novâ Idea saltem in stomacho strictè sic dicto, vestiuntur alimenta, sed quilibet etiam musculus, tendo, nervus,

arte

arteria &c. brachium, item pulmones, renes, hepar &c. propriam virtutem possident, quâ ex communi cæteroquin alimento, proprium faciunt.

Atq; hujus formatricis virtutis natura, quàm admiranda a cominô Divina est; ita nihil à priscis etiam Philosophis, cognitu magis habitum est difficile; quàm quid sit in ovo, quod ipsum reddat fœcundum; quid in conceptu, quid in semine, quod iis fœcunditatem afferat? Ipse Galenus libro de fœtus formatione, frustra se id, à sui seculi Philosophis discere conatum fuisse profiteatur, nec quo animus sciendi cupidus satiaretur, apud eos invenisse; atq; adeò tristitiâ magnâ affectum se fuisse, conqueritur, & proinde investigare cœpisse; anne certam quandam, circa animalium generationem rationem invenire posset; invenisse autem nullam; atque ideò omnes Philosophos rogat, ut si quid veri invenerint, hoc citra invidiam secum communicent.

Ex iis verò, qui in tam mirando opere, quantum quidem humano ingenio concessum est, cognoscendo, acutissimi ingenii sui nervos intenderunt; quamvis fue-

rint, viri aliquot nunquam satis laudati, quorum industriâ & indefessis laboribus, maximæ circa hanc rem obscuritates sublatae sunt, quorû caput esse potest, incomparabile illud & inmortale Britanniae decus Harvejus, cujus de Animalium generatione & circulatione sanguinis, qui scripti sunt libri, clarè satis loquuntur, quis quantusq; fuerit. Virutem tamen illam, formatricem (aliorum salvis sententiis) semen in utero explicantem, foetum formantem, formatum & in lucem editum, in statutæ magnitudinis, terminum extendentem, felicissimè omnium affectus fuisse videtur *Marcus Marci*, in aurco illo de *Ideis Operatricibus* libello, Cujus saltem fragmentum quoddam, octo tantum Capita continens, ad nos pervenit; cætera libri secundi capita, hominum invidia ac veritatis odium suppressit, ut lucem non viderint, digna cæteroquin quæ omnium Philolophorum manibus dies noctesque tererentur. Quanquam & hodie sint, quide hac Marci Marci hypothefi, admodum sinistrè sentiant, quam fortè ne intelligunt quidem, atque propterea vitio mihi vertent, si è subsecuturis,

ris, Marcianæ, circa virtutem formatricem sententiæ, me in aliquibus favere adverterint. Ast de his parum ero sollicitus, quid de me, vel de Marco Marci sentiant. Adeòq; cum natura seminum mihi explicanda sit, vestigia sequar & hypothese tantiviri, nobilemque illam de Ideis doctrinam, obsoletam ferè, & densis tenebris obvolutam, in lucem producam, si fortè in aliorum animis, quoddam ulterius in illas inquirendi desiderium, & ardor excitari possit.

Cum igitur in antecedentibus vestigia quædam collegerimus; è quibus cognosci possit, cuilibet corporis animalis particulæ, non organicæ solùm, verùm etiam similari, propriam quandam virtutem inesse, adductum alimentum commune, in propriam substantiæ partem commutandi; neque adeò diversitatem partium, è principiis materialibus, seu alimentis, tam in utero quàm extra uterum constitutum fœtum nutrientibus, petendam esse; verùm ex virtute formæ Opificis, quæ figuram, soliditatem, magnitudinem, & ordinem ac nexum, singulis à se formatis membris, tribuat; faci.

facilè nunc explicari poterit, quid per Ideas vel potiùs semen cujuslibet animati, propriiſſimè ac ſtriçtiſſimè ſic dictum, intelligendum ſit,

Quemadmodum enim cunctorum animatorum organa, ventriculis ſuis abſcondunt ideam ſui corporis, ad cujus normam ſeu regulam alimenta apponantur, ut non poſſit figura alia membro accidere, quàm quæ ſit Idea membri, neq; magnitudo etiam major vel minor, aut nexus alius; atq; nutritio æquè competat foetui intra carceres hætenus uterinos conſtituto quàm in lucem edito. Nutritio enim generatio quædam eſt, & Ideæ explicatio, & eadem quæ format virtus in utero, nutrit etiam, ita ſequetur, quod ſemini, humano v. g. neceſſariò ineſſe debeant omnium illarum partium Ideæ, quas poſtea in homine ex iſto ſemine humano pro ducto, obſervaverimus. Atq; adeò ſi liceret nobis, corporis æquè ac mentis oculis, inſpicere ſemen Leonis vel alius animalis, videremus certè in illo ſenſibiles ſignaturas, radicales Ideas & eſſentiales adumbratas, ſeu integram Leonini corporis Ideam; ita ut ex hoc, Leonis
ſe.

femine tale organicum corpus, quale Leoni & non bovi competat, necessario debeat perfici.

Quare non ejusmodi intelligimus Ideas, quæ revera & realiter nō existant, & objectivè saltem in animo concipientis radicentur, extra hunc autem nullâ existentia gaudeant, uno nomine Entia rationis dictas, verùm ejusmodi organicarū partiū signaturas, quæ realiter citra ullius cogitationem in femine præexistunt. Neq; enim à meo arbitrio vel ullius dependet cogitationibus, ut Leoni aliud organicum corpus contingat quàm bovi, vel equo, nisi realis Leonini corporis signatura præexiterit.

Atq; hanc rerum Ideam, alioquin *semen* etiam appellare licebit, cum semen v.g. hordei, propriè non habeat integrū, veram seminis rationem, sed capsula saltem quædam ejus est, quâ custoditur verum semen, ne externis aëris vel ventorum pateat injuriis; adeò ut omnium ritè Philosophantium sententiâ, semen 2800 saltem sui corporis habeatur pars, de quibus in subsequendis fortè pluribus.

Non immeritò quoq; *Formæ* nomen ipsi
com-

Competit, cum quod Formali causæ communiter tribuitur; quod nempe *unione sui cum materia det esse rei, & rem à re distinguant*: huic jam dicto semini, vel etiam Ideæ competat, & soli quidem; ut nihil unquam in naturali corpore vel cogitatione etiam comprehendi queat, cui nomen istud potiori jure tribui debeat. Hæc enim Ideæ est & seminalis Virtus, quæ Unione sui (partis formalis) cum aqua simplici, seu parte materiali, dat esse rei; quæ destructâ & separatâ, corpus naturale in aquam Elementalem denuò relabitur (uti in subsecuturis volente Deo demonstraturi sumus. Et eadem quoque, rem facit à re distinguere. Quod enim rosam v. g. à lilio distinguere nobis liceat, vel ex animalibus, bovem v. g. ab equo, præter propria interna, externi quoque explicatæ Ideæ termini faciunt. Seminis igitur, Ideæ vel formæ in posterum si quæ mentio facta fuerit, pro synonymis hæc haberi velim. Cujus natura si paucis verbis sit explicanda, non displicent illa *Severini* octavo ca-

pitæ quæ habet. Semen est *vitale principium*, in se continens *spiritus mechanicos*, & *Tincturas universæ anatomie propriæ speciei*, quibus suum sibi fabricant corpus, colores, sapores, qualitates, magnitudines, figuras & reliqua officiis consentanea.

Cujus *Ideæ*, tam in animalibus quàm vegetabilibus explicationem, antequam pluribus aggrediamur; de *Formæ* hujus origine, tribus saltem verbis monere liceat unde proficiscatur; cùm inter celeberrimos quoque viros acerrimè super hac re disceptetur. Quorum sententias recensere omnes, & tedium tibi afferret Lector, & inutilis esset labor, quùm ab aliis hoc ipsum factum præstitum sit. Neque tamen præterire hoc possum, quam non admittenda sit sententia illorum; qui cœlum sine ullo femine, multas proferre tum animantes, tum stirpes; semen, gignendis rebus materiam concinnè duntaxat apparare, & instruere, Cœlum verò in apparatus illam speciem, summam perfectionem immittere, vitamque suscitare in omnibus, docent. Cujus sententiæ

Dux

Dux præcipuè ac Autor est, *Fernelius* in lib. de abditis rerum causis; qui clarius adhuc mentem suam alio in loco explicat, dicens: *Animantium stirpium lapidum & metallorum omnium, quaecumq; & fuerunt & esse possunt formas, una Cæli forma potest ate comprehendit, & innumerabilibus illa graviora formis, omnia gignit & fundit ex sese.*

Verùm, si virtus ista formatrix ab externo quodam, semini communicaretur, neq; adeò in semine generantis revera existeret, sequeretur, semina v. g. hominis, lupi; recipere saltem formas, adeòq; potentiam illorum passivam esse; cum solius formæ sit agere. Unde manifestissimè colligeretur; corpus illud hominis, lupi, semen appellatum indifferens esse, ad cujuslibet animalis, bovis vel canis formatricem virtutem s. Ideam suscipiendam. Adeòq; quid impedit, quominus è semine quandoq; humano, bos aut canis productus fuerit; aut contra è semine bovino, vel canino, homo prodierit? cum cunctis his materialem saltem rationem habentibus, indifferenter quævis, non animal tantum sed vegetabilis etiam Idea, à Cælo imprimi potuisset. Quibus

bus si quis regeret; obstare aptitudinem
materiæ, ad hanc potiùs, quam aliam for-
mam suscipiendam, ut hoc bovis se-
men, contineat quiddam præparans, i-
dem ad determinatam Ideam suscipien-
dam; confiteretur hicce formam quan-
dam, & virtutem formatricem reverâ in
homine præexistere, ante illam infun-
dendam à Cœlo formam. Et cùm sub infi-
nitis ferè Cœli locis, innumerarum quo-
tidiè specierum, innumera individua
producantur, necesse foret, aut universa-
lem quandam cunctarum v. g. bovis vel
canis formam, per terrarum orbem uni-
versum, ubi boves vel canes generantur,
esse diffusam. è qua singula harum speci-
erum individua semina, determinatio-
nem sui & formam caperent; aut singu-
læ formæ singula quotidie comitarentur
individua. Atque hoc quidem poste-
riùs, si ita revera esset, formæque extra
individua existerent, quid ad hominis
vel canis generationē opus esset homine
vel cane (ut jam monui) cum formæ sit
soli agere & determinare materiam,
neque ullum contra materiæ in formam
jus competat; neque homo generaret

hominē, vel bos bovem, generatione univocā vera & cōpleta. Neuter n. produceret effectū ejusdem speciei, quòd formam, speciem constituentē, non largiretur, sed tantillum materiæ saltem, principium ad rerum generationē. incompletum. Si prius verò, species totidē & universales formæ omni tempore in hunc inferiorē globum infundi per Aërem deberent, quòd immediatus agentis cum patiente debeat esse nexus, & singulis momentis prolificum semen effundatur; adeòq; aër quem haurimus innumeris formis plenus esset. Quæ si ita sint, nō culpandus adeò erit Pythagoras à brutorum |carnium esu discipulos suos dehortans, quòd defunctorū separatas formas in illas emigrare crediderit, modo ab aëre quoq; ipsos abstinere docuisset, cui formæ nondū, cum materia conjunctæ insint, ne cum aëre attracto, lupi vel vulpis forma simul attrahatur.

Superiorum quidem Cœlestium corporum in hæc sublunaria & inferiora, magnam vim esse, mirandumq; consensum, negari non potest. Videmus enim quotidie, pro varia Lunarum corporis, ad solem facie, non aëris saltem variare tempesta-

pestates, maris item fluxus ac refluxus tardiores fieri aut celeriores; verùm animalia etiam modò incrementũ capere, modo detrimentum pati, corpora item quædam in primam materiam reduci. Sole verno tempore ad nos redeunte, quæ prius sopita & mortua videbantur, non vegetabilia solùm | sed | animalia etiam, novam vitam accipiunt, novosq; generationis motus, seminaliumq; Idearum explanationes moliuntur. Ast verò propterea ipsas formas à Cœlo rebus naturalibus infundi, dici non poterit.

Cœlum, res ortas jam propriaque formâ & Idea imbutas promovet saltem, non verò ipsam speciem constituit. Et si omnem Cœlorum in rerum generatione virtutem, paucis exhibere libuerit, dicendum est; infundi ab iis, & conservari motûs quoddam vitale instrumentum, quod torpescences cœteroquin Ideas motu suo excitet, explicet, nutriat. Cujus jam particulam quandam, cuncta prolifica & fœcunda semina possident, per traducem acceptam; quâ si essent destituta semina, sterilia es-

67 sent cuncta. Hoc à *Cosmopolita* vocatur occultus illæ vitæ cibum quem (secundum *Hermetem* in *Tabula smaragdina*) *ventus portat in ventre suo; cujus sol pater, Luna mater, Calidum innatum* uno nomine dictum. De hoc verò, quia in subsequendis plura dicenda sunt, sufficiat hoc loco illud notasse unicum, non ipsas formas specierum è Cœlo in hæc naturalia semina infundi, sed illorum saltem motus instrumentum. Adeoque quod erat ostendendum, formæ non ab extra, five Cœlo infunduntur, sed revera jam in semine proprio præexistunt.

Et quòd formæ rerum non à Cœlo infundantur, aut extra semina existant, ipsi non diffitentur Peripatetici, dum de Formarum interrogati origine, respondent, educi illas è *potentia materie*; quanquam hoc ipso rem nondum satis explicent, quin à verò longè aberrant. Cum enim in materia, quâ tali, nulla præter passivam potentiam alia sit, quomodo ex ejus potentia, produci poterit Forma. Principium purè activum, totâ essentia, à materia distans, ipsâque longè nobilius.

Et cum hæc *Forma* è potentia materiæ
eductio; absque *Efficiente causa* exter-
na fieri non possit; explicare debe-
bant Peripatetici, quomodo hæc in
materiam, & in quas potissimum mate-
riæ partes agat: & deinde quid sit in ma-
teria, quod determinet Efficientem cau-
sam, ad hanc & non aliam formam è ma-
teriæ potentia producendam. Cum enim
unius Causæ Efficientis, plures possint
consistere effectus essentialiter diversi,
quid impedit, quòd è semine humano
nunquam possit produci Leo. Idem ca-
lidum est, quod coquit in hepate, quàm
quod in corde, vel musculorum ventri-
culis, &c. singulæ verò hæ partes,
singulas & proprias habent *formas*, qui-
bus à semet invicem differunt, quas si
cum Peripateticis è potentia *materia* edu-
ctas supponamus (quàm, prout cuncta-
rum rerum, aquam esse Elementalem in
subsecuturis demonstraturus sum) quid
in materia quâ tali fuit, quod calorem mu-
sculorum, aut hepatis, ita determinave-
rit; ut alimentum, ad diversas partes nu-
triendas indifferens, ad Hepar vel certos
musculos allatum, Hepatis, vel musculi

formam induere debuerit? Quibus, per se satis apertis, diutiùs immorari necessarium non erit; cùm quòd Peripatetici, verâ Dei Creatoris cognitione destituti, apprehendere non potuerunt, quin obscura, & impossibili ferè ratione, formarum originem è materiæ potentia (mundum existimantes fuisse ab æterno) repeterent; hoc nobis, de naturalium rerum initiis longè meliùs edoctis, ab alio Principio arcessendum erit. Statuendum itaq; omninò erit, quòd, quemadmodum Creator hujus universi in principio, varias non Animalium tantùm, sed vegetabilium etiam produxit species; ita idem quoque creatis à se speciebus, semina indiderit propria, quibus eadè conservari possent, individuis licet intereuntibus. Atq; hoc quidem, virtute verbi sui omnipotentis *Multiplicamini.* it. *Germinet Terra Germen, herbam producentem semen* &c. Atq; ab illo temporis momento, factum est, ut cuncta generantia individua, postquam justam & definitam, corporis sui figuræ extensionem, assècuta essent; in circulum quasi redirent, & quam à parentibus acceperât, seminalis Ideæ particulam, hanc & posteris suis cõmunicarent. Quod in ani-

malibus æquè ac vegetabilibus toto die observamus, quætum demũ ab Aristotele perfectæ dicuntur, cum semen illorum aptũ est, simili substantiæ producendæ. Quæ igitur species cunctæ ab universi huj⁹ creatore creatæ in principio sunt, illæ hodie per Idearum seminaliũ traducẽ, in individua, conservantur. Rationalis verò animæ propagationẽ, an sit ex traduce, an verò creetur quotidie, tot sunt nō Philosophorum tantum, sed Theologorum quoq; Excellentium, à se invicem dissidentium opiniones; tot utrorumq; non spernendæ rationes, ut cujus in sententiã descendendum sit, non adeò facilè sit, judicatu; utatur híc quisque suo sensu, modò divino verbo non contrario; cùm hæc disceptatio non sit hujus loci, ubi Formatricem saltem, non humani tantum, sed brutorũ quoq; corporum, & vegetabilium, virtutem, explicare animus est. Atq; hæc de Natura seminalis Ideæ in genere dicta sufficiant, videamus igitur his præsuppositis eandem paulò intimũs, accedendo propiũs, ad tria ista diversa Regna, *Animalium* nempe *Vegetabilium*, *Mineralium*.

Ex *Animalium* igitur ordine unicũ nobis

proponemus *Hominem* tanquam cuncto-
rum nobilissimum. Cujus in utero gene-
rationem, & in lucem editi nutritionem, si
rectè ostenderimus, Ideamq; seminalem
humani corporis, clarè explicuerimus,
quid de cæterorum, animantium genera-
tione dicendum sit, obscurum esse non
poterit. Brevitati verò, quantum citra ob-
scuritatem fieri poterit studebimus, ut B.
Lectori ansam saltem concedamus, inti-
mius ac penitus hæc inspiciendi.

Quemadmodum itaq; cunctæ animalium
species, peculiarē, sibiq; propriam, ac
specificam Ideam seminalem possident, à
cæterarum specierum seminalibus I-
deis essentialiter differentem; ita quoq;
in *Hominis* semine, talem specificam Ide-
am, soli homini generando aptam agno-
scemus. Cùm verò ad humanum foetum
producendum, (quemadmodum nec ad
reliquorum animalium generationem) uni-
us sexus, vel masculini vel foeminini ope-
ra non sufficit, sed conjunctio requiritur
maris & foeminæ; operæ pretium, imò ne-
cessarium erit hîc inquirere, quid quan-
tumq; uterq; sexus maris & foeminæ, ad
humani foetus formationem conferat.

Mari

Mari quidem, in generatione, vim activam, nemo haëtenusq. ad sciam adeo audax fuit, ut denegare ausus fuerit. Quid verò activi foëmina ad generatione conferat, acriter haëtenus disputatū est ab iis, qui patientis instar & recipientis ad agens illam se habere, seu ut *Arist.* dicit, instar materiae saltē ad formam contenderunt, ita ut foëmina præter locum calidū s. uterum, & sanguinem fætui nutriendo aptum, nihil ampliùs largiretur. Verūm injurii isti sunt in sexum fæmineum licet sequiorem, cū & Activa ad generandū vis ipsis non desit. Quamvis enim fæminæ, ad fætūs nutritionem in utero, sanguinem afferant; malè exinde concludunt adversarii; nihil ipsas ad generationem quoq; ejusdē conferre posse. Nulla enim in his contradictio, aut dubium ullum, quin in foëmina simul stare possint; quanquam, quæ Efficientis rationem habent particulæ, eadem materialis causæ vicem non sustinere, ultrò largiendum sit.

Neq; ullius roboris argumentum est illud, quòd eòdem tempore quo mas pubescit, semenq; possidet, prolificum, in foëminis etiam menstrua solvantur, tanquā

virili semini respōdentia, adeòq; hæc fæminea menstrua tanquam materia, cum masculino semine tanquã formali causa ad generationẽ sufficient, neq; fæmininũ semen adsit aut requiratur; cùm menstruus iste in juvenculis solutus sanguis, signũ saltem quoddam sit fœcunditatis, quo innotescit nobis, viro maturam esse virginem, non quòd præter hoc materiale, nullum in fæmina & formale generationis principium, s. seminalis Idea reperiatur. Hæc enim seminalis sui sexus Idea, quamvis revera ante mensiũ quoq; fluxum fæminis reverà insit (ut statim patebit) ad sui tamen pro fœtu generando explicationem, hætenus planè inepta est, nisi à masculini seminis ejusque Ideæ motore (de quo postea) moveatur s. fœcundetur; & præter hoc menstruus sanguis versus uterum rapi observetur. Cum enim ad fœtus productionem non sufficiat Ideam ejusdem seminalem utero concepisse, nisi nutrimentum quoq; adfuerit, quod trinã ipsi dimensionem *Longitudinem*, *Latitudinem* largiatur & *Profunditatem*, quam ex se Idea non habet. Soluti in juvenculis menses maturitatis indices sunt, eâ ratione

tione, quòd significant præter Ideam fæminei sexûs, nutrimentum quoq; fœtus adesse, adeòq; masculino semine accedente fœcundo, perfectè fœtum nutriri posse. Sed relictis his disputatiunculis ostendamus; fæminas præter nutrimentum, ceû materiam fœtus reverà virtutem quandā plasticam & activam, ad generationem conferre, haud secus ac mares. Plurimæ quamvis partes sint fæminini corporis, quarum situs, nexus, & conformato à masculini corporis partibus nihil ferè omnino differat, multæ tamen nihilominus sunt, quarû cum masculini corporis mēbris, nulla ferè cōvenientia. Organa enim generationi dicata fæminini sexûs, haud parum à virilis sexus organis, differunt, docente illorum anatome. An verò credi poterit, harum à virilibus differentium partium Ideas, in masculino semine præexistere potuisse? Quomodo semina partialia mēbrorû genitaliû v. g. *viri* & *Ideæ*, aptæ esse poterunt, utero cæterisq; partib⁹ fæminei sexus formandis. An ex quolibet fieri poterit quodlibet? Ponamus verò in-fuisse, quid tum fuit in fœtus formatione, quod sexus diversitatē effecisset aut quare
non

non in omni viro utriusque sexus organa generationis comparent, quod aut semper, aut certè, plurimum fieri deberet, si utriusq; sexus organorum Ideæ in masculino semine existerent. Quare omninò dicendum erit, differentium horum Organorum Ideas in fæminino sexu delituisse, adeòq; & hunc activè ad generationem concurrere, sive semen possidere.

Fæminam partis quadam deformitate laborantem, nonne videmus vitium hocce partis in fætum transferre? Anne Arthritica generat Arthriticum, Epileptica Epilepticû? quod quæso quomodo fieri posset, si nulla fæminarum, in generatione plastica & activa vis adesset? Neq; enim in masculini seminis unquam potestate erit, quæ vitiosæ fuerint in fæminis membrorum conformationes, easdem in fætum transferre, cùm nullum agens excedat potentiam suam adæquatam. Asini semen in uterum equæ delapsum, mixtam producit speciem, Quod si ergò fæmina, uterum saltem s. locum fætui concedit & nutrimentum sanguineum; qui fit quod è semine Asini non unica & simplex Asini species prodierit? quomodo-

modo, quæso locus fœtus seu uterus, & nutrimentum, ad nutriendum fœtum merè passivè se habens, specificam corporis Asinini Ideam mutare potuerit? Quare & ultrò hîc concedendum erit, & in equa non minùs ac semine Asini, formatricem quandam sui corporis ideam seminalem præextitisse, quæ cum asini semine Ideali conjuncta, in mixtam speciem abierit.

Fortissimum verò pro fœminino semine demonstrandò argumentũ, peti posset è bovis v.g. vel alterius bruti, cum fœmella alius speciei congressu, si tam detestadæ ac planè nefariæ Veneris mentionẽ, paceretua, B. L. afferre licitũ fuerit. Observatum enim quandoq; est, scelestissimos homines mares eò processisse nequitia, ac nefandæ libidinis; ut cum fœmellis alius speciei coirent, fœtumque monstrosum generarent ex utraq; specie mistum. Quale narrat exemplum M. M. c. 8. propè oppidum *Bitterfeld* accidisse. Repertum ibi fuisse Vitulum in agro ait, oculis, auribus, & naribus humanis instructum, rictu & pectore vitulino, cruribus anterioribus vitulinis, posterioribus humanis. Idem eodem capite ex *Erasmo Roderodamo* refert,

refert, Mulierem quandoq; in locis desertis, à fociis abeuntibus derelictam, lamentis ac ejulatibus omnia cōplevisse quibus, latebris suis excitatum inusitata magnitudinis Simium, ad mulierem accessisse, illamque non reluctantem, quod vitæ potio rem quàm pudicitia curam haberet compressisse; mulieremq; sobolem enixam, patri quamvis magis similem (unde tamen constat; quandam etiam matris similitudinem, minorem quamvis, in foetu observatam) Idem ex *Plutarchi symposio sapientum* refert, in ædes *Periandri* illatum infantem, ex homine & Equo natum, cujus Caput, collū & manus hominis essent, cætera equi, ejulatus infantis. Cui Similis est illa, quam de adolescente narrat *Caprario* ex *Æliano*, qui cum elegantiori capræ se comiscuisset, monstrum inde editū caprina habens crura, & faciem humanā.

Equibus omnibus haud obscurè patet, & fæminino sexui, seminales inesse Ideas, Si enim solis hæ inessent maribus, quomodo ex humano semine, in Equæ, Capræ vel vaccæ uterum delapso, foetus prodire posset, & humanis & caprinis equinisve membris instructus; aut dicendum foret

foret, humanum semen ad diversas species producendas, indifferens esse; aut in solius caloris uterini capræ vel equæ potestate esse, membris figuram dare: quod utrumque, quàm contra omnem rationem est ac experientiam, tam erit verissimum, fæminas non secus ac mares activè ad fœtus formationem concurrere,

Quæ cum ita sint, solùm virile semen, ad utriusque sexus propagationem non sufficit, sed fæmininum quoque requiritur. In masculino quidem semine, omnium organorum, quæ ad perfectum hominem requiruntur, Idæ continentur, sed non nisi proprii sexûs, uti in antecedentibus iam monitum, quemadmodum pariter in fœminino semine cunctorum perfecti hominis organorum Idæ includuntur, sed fæminini sexûs.

Harum verò seminalium Idæarum propria loca, si in utroque sexu inquirantur, utroque eundem videntur tenere locum proprium, testiculos nempe, quamvis externa capsula s. folliculo, quo se nobis videndas præbent, non parùm discrepent. Virile equidem semen liquidum est
s. flui-

f. fluidum, testantibus iis, qui pollutionibus tentantur nocturnis. Quæ forma ipsi concessa videtur, ut ad locum generationis remotiorem, f. uterum tantò faciliùs penetrare possit; quod in fæmininis necessarium non erat; utpote quæ intra se generant, adeòq; quod ad fætus generationem conferunt semen, in alium extra se locum ejaculandum non sit. Non desunt, tamen, è viris etiam doctis, qui & fæmininum semen, liquidi instar ac ferrosioris humoris fluidi esse hætenus arbitrati sunt. Persuasum hoc ipsis est; ab humore illo, in fæminarum testiculis repperito, quem coeuntes mulieres, in uterũ nõ sine insigni voluptate descendere fætentur, atq; hunc pro vero semine habuerunt, cùm virili in utero conjungendo. Quam sententiam secutus quoque est Celeb. *Veslingius*, fæmininum semen a quo solo lacti conferens; & *Riolanus* idem fero lactis paulò crassiori comparandum esse docens. Alii inter quos *Guintherius*, cùm inter disseccandum humorem huncce, copiosius prorumpere ac fundi conspicerent, ut copiâ suâ sectionem impediret, verum semen fæmininum se observasse rati

rati sunt. Ast verò, quod tantorum virorum pace dixerim, fæminini seminis longè alia ratio est. Humor namq; dictus ferosus, non circa testiculos saltem fæmineos reperitur, sed in ipsa quoq; Vagina uteri; cujus glandulosæ partes, perpetuo liquorem adent, tùm congressus tempore præcipuè; ut quandoque uxoratos audierim, liquorem hunc copiosius prorumpentem, pro fæminino semine, à se in coitu percepto, habuisse. Tantum verò hunc à veri seminis natura abesse existimo, ut saltem pro lymphæ quadam, membranosas uteri partes humectante, habendus sit, easdemque ad extensionem aptas reddente; quod propter varias rationes, tùm verò præcipuè faciliorem foëtûs in lucem editionem, necessarium erat.

Neque alium usum esse putem illius liquoris, in ipsis testiculis reperti, quàm ut ova humana, testiculis, tanquam capsulis (de quibus statim) contenta, integri-que fæminini corporis organici Ideam, continentia, perpetuò humectet, illorumque vigorem conservet, ne continuo internarum partium ac præcipuè u-

tericalore tandem arefacta, ad generationem in idonea reddantur, quin loco moveri nequeant. Quem usum ipsa ostendit Natura nil frustra agens, dum satis copiosa vasa lymphatica, per uterum, Testes & Tubas uterinas errantia fecit,

Quare fæminini seminis si veram aliquam desideramus cognitionem, alia via incedendum erit. Recentiorum namq; Anatomicorum industria, ac inter illos Cl. *Regneri de Graaff* in fæminini corporis organorum penetralibus perscrutandis sedulitas, docuit nos, muliebres testiculos, nil nisi Ovaria esse, maximam ovorum copiam complectentia, ad singulos fœtus formandos destinatorum, adeò ut vivipara non minus ab ovo originem ducere, quàm ovipara dicenda sint. Testiculorum horum muliebrium seu ovorum, qui plenam anatomen desiderat, legat anatomicos recentiores: neque enim hujus loci est hæc recensere, quæ toties ab aliis dicta sint.

Hoc saltem hîc notabimus unicum, non reperiri in fæminis semen aliud, quàm quod in vesiculis illarum seu ovis continetur Testiculorum. Hæ enim li-

quo.

quorem quendam continent limpidum, & sperma, quod theca quædam est, ac proprius veri seminis locus. Hic limpidus liquor, Ideam in se continet, organorum foeminini corporis omnium, integram. Quod profectò vix fidem mereri videretur, posse tam angustis spatiolis, tot partium integras signaturas contineri, nisi satis constaret; verum & genuinum semen, minimam saltem particulam esse sui corporis ac omni ferè corporea mole carere.

Quibus probè consideratis, facile erit explicatu, quid quantumque, uterque sexus ad foetus generationem conferat, & quomodo utriusque seminis conjunctio s. foetus conceptio fiat. Fæmina nempe verum & genuinum largitur semen ovo contentum. Mas autem semen confert nullis externis tunicis munitum, sed fluidum terminisq; solutum, instar lactis candidum.

Conjunctio verò ac foetus conceptio hoc modo fit. Masculinum semen in muliebrem uterum delapsum seminalem suam ac vitalem auram, cunctarum partium Ideam continentē per Tubas Fallo-

pianas ad Ovaria sive Testes muliebres mittit, quæ cum ovo, uno vel pluribus conjuncta, eadem fœcundareddat. Ovum hoc fœcundatum Testiculis exclusum, Tubarum extremitate excipitur, ac per internam earum cavitatem, in uteri cavum deducitur. De quibus ovorum ductibus plura videri possunt apud *Regn. de Graaff* Anatomicum Præclariss.

Antequam verò explicemus, quâ ratione hæc conjuncta semina, illorumque Ideæ evolvantur, paucis saltem investigare liceat, ortum illarum, non primùm quidem quem in antecedentibus à solo hujus universi creatore petendum esse dixi; sed è quibus potissimum humani corporis partibus, Ideæ seminales decerpantur; neque hæc creantur hodiè, sed per traducem propagantur. Et deinde paucis quoq; videamus, quare neutrum semen, neque fæmininum, neque masculinum sibi soli ad generationem sufficiat, sed utriusque conjunctio requiratur.

Quod itaq; prius attinet, fuerunt quandoque; qui semen è cerebro in spinalem medullam secundùm aures deferri dicerent, quos inter fuit ipse *Hippocrates*; pro-

pre-

pterea meretricum aures amputari docens, ut lascivia earum exstinguatur, pessimorumq; hominum posteritas deleatur meatibus circa aurem cicatrice obductis, & transitu semini præcluso. Verum hoc quicquid est à Cl. *Sennerto* jam tunc rejectum, neque ulteriori refutatione indiget, cui quotidiana experientia contradicit. Alii; ultimialimenti superfluâ, utilem tamē quandam portionē, in genitalibus partibus collectâ, Semen dixere. Alii aliter dixerunt; quorum quidem hîc sententias recensere omnes, non constitui. Hoc certè, vero quâm simillimum quin verissimum est, non ab unâ, sed omnibus ac singulis humani corporis partibus, decerpi semen, adeò; ut nulla etiam organica pars reperiri possit, cujus non integra Idea & signatura in semine contineatur. Quod quidem nemini mirum videbitur, qui consideraverit, parentum morbosas constitutiones tanquam per raducem in fœtum transferri. Ita quotidie videmus parentes, Epilepticis motibus obnoxios & proles iisdem laborantes generare; Arthriticos, Calculosos Phthisicos, hæreditate quadam in posteros, suum

morbū trānsferre. Et quod majori admiratione dignum est, ipsæ externæ parentū maculæ, certis partibus corporis inhærentes, in eandem foetus partem propagantur, veluti Olera, Pīsa, Lentesc, à quibus integræ familiæ Cicerones, Pisones, Lentuli, nomina sua mutuata sunt, quod fieri nunquam posset, nisi partis ejus cui macula affixa, Idea simul in foetum derivaretur.

Inopinato foedioris rei ad spectu perterrita prægna, si quod sui corporis membrum percussit, maculam inde quandam in foetum transfert; & quidem non promiscuè in quamvis partem, sed illam quæ percussæ matris parti exactè respondet. Ita si tetigerit, luculentiori & inopinata flamma perterrita mater, partem quandam faciei, foetum dabit, cujus facies rubra quadam macula imbuta sit. Eandem si fortè mus terruerit, foetus in lucem prodibit, notam possidens, muris cuticulam exactè referentem, pilis quoque vestitam, eâ quam mater imprudenter etiam tetigerit parte. In quibus similibusque quamvis fortissimæ matris Idearum impressioni s. imaginationi multum tri-

tribuendum sit (cujus ratio deinde affertur) quod tamen certa quædam foetus pars, nec & non alia afficiatur, non aliunde reperendum videtur, quàm quòd *Ideæ* membrorum foetûs, particulæ sint, *Idearum* partium matris, unde fit, ut quæ prægnanti exteriùs contingunt, eadem & foetus sentiat.

Cùm enim semen humanum omnium partium signaturas continens, in homine generetur, neque verò *Idea* v. g. brachii; *Cordi*, vel alii membro formando, apta sit, sequetur; non esse proinde, è qua humani corporis parte semẽ cujuslibet partis generetur; sed necesse erit, ut seminis particula, è qua brachium v. g. in foetu formatur, sit particula *Ideæ* & seminis habitantis in brachio parentis, & *Idea* cordis in foetu, particula sit *Ideæ* cordis parentis & sic deinceps.

Existimem verò, has singularum partium particulares *Ideas*, per universum corpus perreptãti sanguini imprimi, atq; hujus auxilio, tanquam vehiculo quodã ad generationum organa testiculos deferri. Cui fidem facit, quòd in humano san-

guine, reverâ ejusmodi Ideas existere aliquoties deprehensum sit, ab iis præcipuè, qui eundem recentem & calentem spiritibusq; adhuc turgidum, cucurbitâ exceperant, ad spiritum aliudve medicaminis genus inde parandû. Observarunt namq; in eo varias humani corporis ineffe Ideas, ac tandem quoq; phantasma quoddam humanum, mugitum quendam edens non sine terrore adstantium, quale Exemplum in *Borelli Observ.* legi poterit, aliorumq; Neq; verò fieri hoc unquam potuisset, nisi hæc Ideæ revera in sanguine exstitissent; nisi quis præstigiis Dæmonû hæc accepta referre malit. Quod quotidie ab ignara naturalium plebecula, fieri videmus, ut quorum rationes ac causas non statim assequuntur, hæc Diabolo tribuant; cum tamen reverâ naturales Causæ adsint. Injurii certè in universi Creatorem, cujus opéra quæ nobis in sui cognitionem investiganda dedit, turpi quâdam desidiâ, aut negligunt omninò, aut superficies saltem externas, nulla interiorum penetralium ratione habitâ, contemplantur.

Easdem in sanguine existentes Ideas demon-

monstrant & alia. Memoriâ namq; digna est historia, quam refert *Beckerus in Microc.*, ex *VVeinrichio*, de puella quadam *U*ratislaviensi; quæ mollior & Junior, cum à carnifice latronem publicè capite truncari spectaret, rei foeditate territa, in Epilepsiâ incidit; cui tollendæ cum plurima hinc inde comportata remedia nō essent, quispiam ex vulgo auctor erat, ut felinum sanguinem biberet: bibit misera; ast in felicissimo eventu: felis enim naturam ac mores, simul cum sanguine hausisse visa est, ut paroxysmo ingruente, voce, saltu, gestu feles imitaretur, mures in silentio venaretur, angustissimisque foraminibus murium adstaret. Quod quidem solis *Ideis* felini sanguinis tribuendum erit. Quamvis enim in hac puella, mores saltē felini observati sint, nullâ cæteroquin partiū mutatione factâ (unde quis colligere posset, non ab *Ideis* & signaturis corpus formantibus, hujus rei causam repetendam esse, sed anima potius quadam in felino sanguine latente) constat tamen, omnium, quæ ab animalibus ratione carētibus fiunt, rationes, ab organorum varia formatione & dis-

positione fluere: ita ut si feles eadem cum canibus respirationis ac oris organa haberent, latraturæ essent canum instar, aliasque canum actiones imitaturæ. Quorum organorum, cum formatrices causas Ideas esse demonstraverimus, rectè me facere confido, si operationum, organorum beneficio peractarum causam, in ipsas Ideas referam tanquam priorem seu mediatam causam. Præsertim, cùm & tale & quid observemus in hominibus, quorum mores & ingenia mirum in modum à se invicem discrepant, ut alii planè stupidi sint, alii contrà ingenio valeant, Non quod hujus aut illius anima rationalis perfectior sit aut sapientior cæterorum animabus (minimè gentium) sed propter solam organorum perfectionem aut vitium. Si enim senie ejusdem essent perfectionis Visûs v. g. & auditûs organa, non minùs accuratè videret & audiret ac juvenis: quod quidem adeò verum est, ut & ipsos hominis mores ac ingenium è vultu quis legere possit.

Quæ cum ita sint reverà, & organorum Ideæ in ipso sanguine observentur, probabilis ratio reddi poterit, quare

Fausti-

Faustinas M. *Antonii* Philosophi uxor, filium enixa sit in omnem ferociam ac crudelitatem proclivem. Cum enim, gladiatoris cujusdam hominis crudelis quem deperibat, sanguine calido hausto, statim cum marito concubuisset, *Commodus* peperit, crudelis ac gladiatorii animi hominem, qui gladiatoris cruentisque pugnis Romanam Rempublicam ferè attrivit. Neque alia erat ratio *Caligulae* Imperatoris, scelerum crudelitatisque immanitate nulli secundi, cujus morum nil à patre, nil à matre profectum erat, sed à sola quæ ipsum lactaverat, Nutrice.

Hæc enim præterquam quod ipsa crudelis esset & barbara, sæpissimè oras mammillarum sanguine tingebat, infantemque; ex fugere permittebat, quo ipso tantam in illo sanguinis sitim excitaverat, ut ætate provectior, ne infinitâ quidem multorû hominum cæde expleri posset, quin desica etiam & gladio, sanguinem lamberet, sæpiusque optaret, ut unum toti orbi Caput esset, ut sic unico ictu truncari posset.

Quare nō omni periculo carere videtur

Chirur.

Chirurgia illa Transfusoria dicta (quod obiter hîc saltem adverti potest) quod metuendum sit , ne præter occultorum morborum semina , pessimorum simul morum vestigia imprimantur. Neque frustra certè est, quod D E U S ipse adeò severè prohibuerit populo Israelitico commestionem sanguinis brutorum. Hæc enim Lex per *Moysem* lata est, ut *quicumque sanguinem gustaverit, eradicetur*. Levit. cap. VII. vers. 27. Quod repetitur c. XVII. ejusdem vers. 10. additâ hâc ratione, quod *vita animalis sit in sanguine*. Item Act. XV. v. 29.

Certum itaque est, & indubitæ veritatis; ejusmodi Ideas reverà in sanguine existere, adeò ut sanguis vehiculum quoddam videatur, cujus beneficio, particulares organorum Ideæ seminales, ad testes deferantur, ibi colligantur & spiritu quodam calido motore imbuantur, qui fœcundet illas & in utero explicet (de quo in subsequituris volente Deo pluribus). Neque obstat huic, prout opinatur Ingeniosiss. *M. Marti*, quòd tamèn claudi, & parte quadam mutilati, perfectos habeant fœtus: quod fieri non posset, si se-

minales particulæ à propriis sibi, singulisque partibus decerperentur. Carere enim & foetus debebat illa corporis parte, quâ pater, quòd quæ non adest corporis pars, illa Ideam sui communicare non possit. Regeri enim ad hæc potest, quòd ad foetus productionem, non maris tantum, sed fæminæ quoque semen requiratur (de quibus jam in antecedentibus monitum) quod utrumque, tam Masculinum quam fœmininum, perfectam & integram, totius organici corporis signaturam contineat & Ideam sui sexus. Ponamus igitur Patrem dextro esse truncatum brachio; non tamen inde necessariò generabitur foetus dextro destitutus brachio. Quia quæ Idea partis, in Masculino semine desiderari poterat, non statim in fæminino quoque semine desideratur; adeòque hujus beneficio qui propter masculini seminis defectum mutilus in lucem proditurus erat foetus, perfectus prodit. Quod si verò uterque Pater & Mater dextro brachio carent, quid tum de foetu fieret, an etiam & hic dextro brachio cariturus esset? Quod certè futurum puto; quanquam non

non omninò hoc necessarium fit, quia, fieri potest, ut uterque parens, ante dextri brachii amputationem, omnibus numeris perfectum semen, loculis suis reconditum possideant, ex quo nonnisi perfectus fœtus: quemadmodum nonnunquam observatum est, exsectis testibus Eunuchos tamen prolífico semine sibi concreditas fœminas imprægnasse, fortè in vesiculis feminalibus residuo, ante testium exsectionem generato.

Ast verò, si, prout diximus, in utroque semine integra hominis Idea continetur, quare neutrum sibi soli ad generationem sufficit; sed utriusq; Conjunctio requiritur. Quod quidem ova illa fœminea, perfectum semen continentia, attinet; accidit nonnunquam, ut stimulo quodam libidinis ad uterum delabantur, citra congressum cum mare; quod idem quandoq; etiam contingit, quibus menstrua fluunt, ut foràs excernantur ova. Hæc tamen quamvis ad uterum delapsa, locum generationis proprium, intumescunt quidem & extenduntur ovi pelliculæ, Chorion & Amnios cæteroquin dictæ; fœtus tamen inde nus; sed tum in Gallinis

ova

ova fiunt subventanea; in fæminis *Mole*. Ratio verò, quare foetus horum ovorum non perficiantur, hæc est; quòd hiscè Ideis desit Motor explicans, & nutrimentum singulis partibus apponens, tantæ virtutis & actionis, quanta ad hoc negotium requiritur. Ideæ enim quamvis partibus figuram dimetiantur, semetipsas tamen evolvere non possunt, nisi externo quodam agente explicentur, *Calido* cæteroquin *Innato* dicto, cujus quæ sit Natura, ac in rerum naturalium generationibus actio, in subsecuturis volente Deo pluribus dicetur.

Hoc verò Fœminini seminis innatum Calidum, per se debilius est, quàm ut Ideis illis evolvendis sufficiat. Ideas cæteroquin humani corporis (quod fortissimum certè pro fæmineo semine demonstrando argumentum est) integriq; foetus rudimenta, in carnosis Molis haud rarò esse, observata, Anatomicorum docent testimonia, tum præcipuè Cl. Kerkringii, qui infantem molâ circumdatum observavit. Quòd verò in fœcundæ hæ fuerint Ideæ, defectu Calidi innati Motoris fœcundantis factum est.

Mascul-

Masculinum verò semen, præterquam quod omnium sui sexûs organorum Ideam complectatur, motorem continet spiritum (*Calidumve innatum*) multo robustiorem, quàm fæminæ; cujus ratione mulieres frigidioris temperamenti, mares calidioris dicuntur. Idem spiritus motor, Cervum circa finem Septembr. in Venerem ruentem, adeò robustū reddit, & audacem ferè, ut aliàs timidior, non canes saltem, sed & homines adoriatur. Ejusdem, unico saltem coitu, facta jactura, generosissimum etiam Caballum adeò debilitat, ut largiori quoque cibo, vix amissas vires recipiat.

Ejus dispendio Eunuchi masculam vocem & naturam exuunt, & fœmininam induunt. Hic inquam spiritus est, hoc Calidum, hic motor & explicator inertium alioquin & mortuarum Idearum. Qui nisi ovum fæmininum fœcundarit, molæ potiùs & ova subventanea, quàm animalia nascentur. Hujus ergò fœcundatoris, Calidi, in muliebri sexu penuriâ fit, ut ova fæminina absque masculino semine nunquam perfectum fœtum edere possint.

Cum

Cùm verò masculinum semen tantâ Calidi hujus innati copiâ turgeat, ac præter id ipsum, integri hominis Ideam masculinam revera complectatur, quî fit quòd mares non possint intra se generare, sed ejaculatio seminis requiratur in uterum? aut quare nunquam, vel minimum formati fætûs vestigium, in vasis feminalibus masculinis inventum sit, prout quandoque in Tubis Fallopianis extra uterum observatum? Cujus ratio, præter loci angustias, explicandis ad justos sibi terminos Ideis, nimis arctas, hæc potissima est; quòd ideæ seminis Masculini confusæ sint, neque eum intra se ordinem observent, quem Ideæ fæminini seminis: Idq; ob liquiditatem & fluiditatem, quâ nullum certum ordinem servare possunt; sed hinc inde inter se fluctuant. Quod metuendum in fæminino semine non est. Hoc siquidem, quamvis & ipsum humidum sit, vesiculâ tamen seu testis ovorum ita munitum est; ut quem in illo seminales Ideæ, naturalem situm nactæ sunt, hunc retinere possint. Quare hæ Ideæ fæminini seminis, ovo suo inclusæ, se habent regulæ

O

inftar

instar ad Ideas feminis masculini, cujus beneficio, quæ confusæ ibi omninò erant ideæ, in ordinem rediguntur, ut Ideæ capitis, diversum fortiantur locum, ab illo, ubi crurum Ideæ poni debebant. Quæ quod ita sint, & monstra docent, nefandâ certè & Diabolica Venere è masculini feminis humani & fæminini bruti cujusdam conjunctione, nata. Quorum membra, etsi propter diversæ speciei Ideas commixtas, utriusq; animalis corporis, mixtas signaturas possideant; ita tamen conjuncta sunt, ut quæ in masculino humano semine caput formare vel brachium debebant Ideæ, ad easdem in fæminino semine Caput vel brachiū forturas applicitæ sint. Ita monstrum illud *Bitterfeldianum*, cujus in antecedentibus mentio facta est, oculos, aures & nares habebat hominis; rictus verò & pectus erant Vituli, anteriores pedes humani; posteriores Vituli. Nec facilè quis unquam viderit monstrum, specierum mixtione productū, cujus Ideæ Capitis fuerint conjunctæ cum ideis pedum alterius speciei & contra. Masculinum itaq; semen cum ad feminis fæminini ideas tanquam normam applicetur, & hoc

& hoc ipso in ordinem redigatur, facile patet; quare solum ad fœtus productionem inutile sit: spiritus verò ille motor s. Calidum innatum seminis, explicare quidem potest Ideas ordinatas; confusas verò in ordinem redigere potis non est.

Atque hîc non satis possum mirari *Paracelsi* & audaciam & impietatem, quod spermata maris & fœminæ, phiolæ indita, fimoque imposita, homunculum productura doceat, menstruo sanguine usque dum perfectus sit, nutriendum. Ausim namque hoc dicere; *Paracelsum* talem homunculum naturaliter productum, nunquam nec fecisse nec vidisse; quòd verum ignoraverit semen fœmininum, liquorem illum ferofum (cujus jam facta mentio) falsò cum sui temporis Philosophis, pro femine habens, adeoque verum Fœmininum semen cum Masculino, nunquam conjungere potuerit. Et ponamus, conjunxisse illum vera & genuina femina, Motorem tamen spiritum s. *calidi innati* particulas, Ideas seminales explicantes, ita incarcerare non

O 2 potu-

potuit, quin subjectum suum defereretur, adeoq; semina omnino infœcunda redderentur. Quid verò hujus fœtus, menstruo sanguine, nutritione ineptius? An verò extravasatus, adeoq; ad putredinem proclivis sanguis, nutriendo & non potius extinguendo fœtui aptus erit? Anne exsiccabitur sanguis colore fimi equini? Sed fabulæ sunt & quidem impiæ & absurdæ, præsertim cùm hosce homunculos omnia scire docet, quæ alii homines ignorant. Cùm enim arte vitam & corpus acceperint, artem & scientias ipsas illi connatas esse arbitratur, in quibus refutandis, non est, ut bonas horas malè collocemus, cùm nemo non rem falsissimam manibus palpet. Atque adeò (ut revertamur unde digressi sumus) ad hominis generationem, humanarum idearum, ab omnibus partibus decerpitarum, utriusque sexus, intra cancellos uterinos conjunctio requiritur.

Quibus præsuppositis, videamus nunc paucis; *quomodo conjunctarum harum Idearum in utero Explicatio fiat & nutritio.* Hoc verò fit unice à Calido illo innato s. cunctis fœcundis seminibus connato (de quo deinde pluribus)

Quam

Quam primum enim hæc seminalium Idearum conjunctio facta est; externus uteri calor, innatum seminum calidum excitat; hoc excitatum, singulis particularibus Ideis alimentum apponit. Quibus alimenti particulis, quæ aliàs in corporeæ, videbantur, & visum fugiebant; Idæ, corpoream molem seu trinam dimensionem nansciscuntur; adeoq; tûm statim ipsa fætus integri rudimenta conspiciuntur, etiam in quatuor dierum fætu. Cujus exemplum narrat *Cl. Kerkringius*, de muliere, quarto post coitum die extincta. In cujus aperto utero, rotunda invenda est moles (ovum) magnitudine eâ, quæ est cerasi acidi majoris; quâ apertâ compertum est, Naturam (*calidũ illud innatum*) fædus humani ideam ac signaturam, tantillo quoq; temporis spatium ità effinxisse; ut Caput clarè à corporis mole distinctum, in capite per nebulam quasi annotata organorum puncta conspici possent, corporis autem reliqui rudis adhuc indigestaque esset moles. Atque hæc alimentorum appositio, uno nomine Nutritio dicitur, quæ à primo formationis momento incipit.

hominemque sanum etiam extra uterū comitatur. Idem enim innatū calidum est, quod hominem tam in utero quàm extra uterum nutrit: eadem Idæ sunt quæ extra uterum hominem formant, quàm quæ in utero. Quænam verò particulæ sint nutriendis fætûs partibus apponendæ immediatæ, sanguinæ aut lacteæ (quod aliquibus magis probabile videtur) quisque suo judicio decernat; fundamentaliter tamen aqueas esse in subsecuturis demonstrabitur.

De quo nutrimento fætus, hoc singulariter notandum; quòd ad nutritionem planè ineptum sit, si vel minimum manifesti acidi vestigium in illo deprehensum fuerit; adeò ut statim abortus fieri debeat. Cùm enim nutritio corporis nostri fiat à Calido innato (quod ipsum occultâ quadam aciditate præditum esse in subsecuturis demonstrabitur) aciditate sua occulta adductum alimentum coagulante, in substantiam pro Idearum diversitate variam, fit; ut alimento, potentiori acido scatente advecto, ab hoc coaguletur & suffocetur. Quemadmodum contingit grano hordei

dei aperto igni injecto; quamvis enim granum hocce, particulam quandam innati calidi possideat, suffocatur tamen omnino hoc & moritur, potentiori manifesti Ignis acido superveniente. Quare quotidie videmus; has, quæ impuro acidoq; scorbutico sale refertum sanguinẽ habent, concipere quidem; conceptum tamen fætum, manifestâ potentiorique alimenti aciditate, illicò suffocâri. Quemadmodum qui hecticâ feбри laborant, non nutriuntur sed contabescunt, quòd singularum partium *calidum innatum*, nutritionis instrumentum, à manifesta quadam sanguinis aciditate, suppressum fuerit.

Atque hæc ratio esse videtur, quare Jud. XIII. v. 3, 4. uxorem Manuah, tum futuram Samsonis matrem, alioquin sterilem, seqq. verbis à vini potu dehortatus fuerit Angelus Domini. *Sterilis es & absque liberis; sed concipies & paries filium; Cave ergò ne bibas vinum nec immundum quicquam comedas.* Vini namque aciditas (in antecedentibus satis jam demonstrata) aciditate sua alimentum fæt9 corrumpit, ut acidius redditũ,

Idearum explicans nutriensvé Calidum, omninò suffocet, adeoq; abortus accidat. Probatur hoc iis medicamentis, quæ abortum præcavent, ut *matr. perlar, Corall. rubr.* Quæ abortus causæ, sterilitatis item, ex ovi ductuum obstipatione, aliisq; causis profectæ, pluribus hîc explicari possent, nisi prolixum nimis futurum esset.

Hoc unicum saltem de nutritione hominis, extra uterum jam constituti, probè notandum est; quòd nulla ibi opus sit facultate specifica Attractrice, Retentricæ aut Expultrice alimentorû, sed totum nutritionis negotium ab innato partibus Calido dependeat. Idem Calidum est, quod coquit in musculis brachii quàm quod in pedibus: nec differt calidum Hepatis à calido Lienis, &c. Coctio verò & alimentorum appositio, fit; ratione coagulantis, Calidi innati, aciditatis (cujus rei veritas è subsequituris Sole clariùs patebit) quæ, alimentum indifferens cæteroquin, ad varias ac diversas partes nutriendas, mutat in substantiam certæ partis, pro Idearum diversitate. Quare rectè dicebat

Hip-

Hippocrates, *quemlibet musculum suum habere ventriculum*. Quemadmodum enim, in ventriculo cunctorum animalium, v.g. hominis, Calidum quoddam reperitur s. Acidum manifestum fermentum; quò ritè constituto, appetitus naturaliter viget; destructò seu debilitatò appetitus perit, quod vulgustum ventriculi frigiditati (Not. propter Acidi fermenti defectum) tribuit: Quod item calidum, semine jam proprio instructum, varia diversæ naturæ alimenta, carnes varias, pisces, (& in canibus ipsa ossa) ita coquit, ut in hujus animalis, hominis, non alius substantiam convertantur: Ita quilibet Musculus, suo quoque ventriculo fermentum continet, quò sanguini ad certum quidem animal nutriendum jam determinato; ad diversas tamen animalis partes hætenus indifferenti, specificum sigillum ac Idea partis imprimitur, ut non possit aliam nisi hanc nutrire partem. Sanguis igitur ad os advectus, osseam duritiem ac figuram capit à calore loci; quemadmodum in Canibus idem Os in sanguinem redit. Si idem pervenerit ad Hepar, Lienem, &c.

utrobiq; in talem substantiam convertitur, quæ est Idealoci, unius tamen innati calidi beneficio. Atque hæc alimentorum appositio s. Nutritio provehit gradatim hominem, Ideas extendendo, ut definitam magnitudinem assequatur.

Habent enim non animalia tantum, sed vegetabilia etiam *certas quantitatis suæ, & magnitudinis leges*, quas naturaliter non impedita attingunt, neq; transgrediuntur. Cujus ratio, etsi difficulter demonstrari posse videatur, probabilis tamen admodum apparet illa Excell. M. *Marci*, è virtute speciei seu Idearum quæ est petita ratio; ita ut unicuiq; tanta moles convenire dicatur, quanta virtute continetur in confusa specie, ad quam sensim evoluta, ubi metam attigit perfectæ evolutionis, ulterius nequeat evolvi. Cùm enim species evolutione sua incrementum factui det primum, dabit & finem. Et cùm eadem det figuram, dabit & certam magnitudinem (sine qua non est figura) pro sua qua evolvi potest virtute. Deus quoque omnia fecit numero & mensura.

Ab hac tamen determinata mensura & perfectione humani corporis, interdum deficit magnitudo, servatâ specie humana, & *Pumiliones*, aut *Pygmai* dicuntur; aut illam transgreditur & excedit, & *Gigantes* salutantur.

Pygmaeos quidem reverà existere, recentiorum æquè ac Veterum relationes docent, Causa verò justâ minoris magnitudinis nulla est alia, quàm speciei evolutio impedita, ut debitam mensuram assequi non valeat. Quod quidem duplici ratione contingere posse, autumat magni ingenii *Marcus Marci*, vel ratione *nutrimenti*, vel ratione *speciei*. Ratione *nutrimenti*, cùm impurum est, & v. g. manifestâ quadam peregrina & hostili aciditate depravatum. Tum enim ab hoc innatum, illud cunctarum partium *Calidum*, *Acidumque*, quod Ideam hominis, speciemque universalem, ad justam mensuram explicare debebat & evolvere, ab actione impeditur & feriari cogitur. Quemadmodum enim in utero materno, primis


fætûs

fætûs apparentibus, signaturis, nutrimentî vitiô, evolutionis Organum *innatum Calidum* omninò ita suffocari potest & supprimi, ut tota hominis Idea simul deleatur, & abortus fiat; aut si certam saltem fætûs partem afficiat, affecta partis Idea deleatur, ut mutilus prodeat fætus; quidni à simili alimenti vitio, in homine jam extra uterum constituto, Idearû explicator, simulq; ipsa Idea ita impediri possint, ut progredi amplius non liceat.

Ratione speciei verò incrementum impediri potest, quando Idea imaginationi impressa, miscetur cum virtute fætûs formativa, cumq; ea ita coalescit, ut determinet illam, non ratione figuræ saltem, sed molis etiam (de cujus causis statim pluribus) ita ut, quæ ad majorem evolutionem apta erat Idea, propter arctam cum Imaginativa colligationem, infra justos magnitudinis terminos subsistere cogatur, hâc evoluta. Quæ species, si in uno saltem subjecto radices egerit, in posteros quoque propagatur, & Pygmæi Pygmæos generant, donec ab alia specie superveniente, prior hæc extinguatur.

Quem-

Quemadmodum igitur à specie infra justos evolutionis terminos subsistente, *Pygmæorum* ratio desumpta; ita ab eadem quoq; ultra definitas metas evoluta, *Gigantum* ratio petenda videtur. Qui, *an dentur*, ipsa scriptura sacra, nos dubitare non finit. *Modum* v. *evolutionis* non incommodè idem laudatus M. M. è *speciei* in dissimilare medium cadentis, adeoq; majus spatium occupantis *refractione*, exhibet, hoc Schemate. Sit Figu-



ra A, B, C, in C. convoluta, & inde radiis CD, CE, evoluta, quare in medio uniformi,

formi, dicti radii pertingent usque ad H & I, & linea AB, æqualis erit linea HI; & cùm horum triangulorum latera AC, BC, CH, CI, inter se sint æqualia, & anguli verticales æquales, & tertium latus HI, æquale erit AB, adeòque tota triangula inter se erunt æqualia. Medio verò difformi & minùs denso existente, radiorum refractione fiet, & angulus in ingressu talis medii; cadentque refracti radii, extra DH, EI, proindeq; appositis utrinque triangulis DHK, EIL, linea HI terminabitur in KL, adeòque major evadet.

Verùm conjecturæ hæ sunt in difficillimæ cæteroquin rei explicatione, non contemnendæ. Unde & ipse Vir Cl. præter refractionem, vehementem quoque matris imaginationem, accusandam esse decernit; ita ut gravidarum imaginationi fortiter impressæ fuerint, ingentes illæ antiquorum statuæ, Rhodiorum Solis, v.g. & Ægyptiorum Memnonis Colossus, quæ ita conceptæ Idææ, fœtui quoque impressæ fuerint.

Quomodo verò Idea matris *imaginatione* concepta, fœtui communicari possit,

possit, digna res quæ consideretur. Præter animam rationalem, à solo Deo creatam, hominiquè infusam, aliam habemus, animantium brutorum animæ similem, cum semine paterno fætui per traducem impressam, quæ per se una est: numerum tamen è subjectorum pluralitate mutuatur (quæ certè nulla alia esse videtur, quàm Ignis ille s. Calidum nobis connatum) Cùm igitur ex antecedentibus pateat, utrumquè sexum, prolificum semen ad fætum formandū concedere (quæ semina propter *calidum* suum *innatum*, *motorem*, *animam*, maris præcipuè, fæcunda esse monstravi) animarum mutua fit conjunctio in unam, ita ut binarius animarum cesset numerus; quem admodum, tribus vel quatuor lignis separatim accensis, per accidens Igni numerus tribuitur, qui lignis cunctis, ad suam sibi propriam unitatem redit.

Neque hæc seminum animæ, inter se saltē, in unam coalescunt, sed cum anima matris etiam. Quanquam enim, semina per se, *calido* quodam *innato*, *motore* & *anima*, iustructa sint; nunquam tamen hoc ipsum quicquam operabitur, nisi uteri

uteri materni calidum, tum etiam nutrimenti fætûs accesserit, à quo excitetur: unde fit ut in unam veluti animam coalescant & mater & fætus. Atque inde est, quòd inseparabiles sint affectus utriusque; atque adeò, ipsi actus imaginationis, omnesque môtiones appetitus sensitivi, non fætui minùs quàm matri insint. Quibus non parva lux accedit ex antecedentibus, quando demonstravimus, singulas particulares fætus Ideas, decerptas quasi particulas esse Idearum parentis utriusque. Unde facillimè ratio colligitur, quare determinatâ matris parte affectâ, respondens huic fætûs pars, non verò alia afficiatur.

Atque huic imaginativæ Ideæ, semini impressæ, quantum *virium* tribuendum sit, quotidie observamus. Huic enim soli tribuendum est, quòd integras sæpè nationes solo adspectu à se invicem discernere valeamus: Italos nempe à Gallis, hos ab Hispanis, atque hos ab Hebræis. Cùm enim singularum nationum prægnantes mulieres, quotidie nonnisi propriæ gentis, viros intueantur,

tur, horumque speciem fortius haustam sibi imaginentur; fœtus enituntur omninò similes. Ita Christianos non est difficile à Judæis discernere. Quod si verò Christiana mulier uterum gerens, toto gestationis tempore à Christianorum adspectu arceatur, ut neminem nisi Judæum conspexerit, affirmare auserim, hâc imaginationis vi, fœtum proditum, Judæo magis quàm Christiano similem. Quod idem contingeret candidissimæ etiam mulieri gravidæ, inter Æthiopes viventi.

Durat verò hæc Imaginativa Idea, usque dum superveniens alia potentior, illam suffocet. Cujus rei non possum non notatu dignum afferre exemplum, quod non ita pridem alicubi contigisse, ab amico fide digno, mihi communicatum. Videbat fœmina quædam prægnans primaria, Æthiopem inopinatò accedentem, & exhorrescebat tam inexpectatò accessu, ut animi ferè deliquium pateretur. Ex adstantibus unus, quòd insignem imaginationis vim probè perspectam haberet, prudenter metuebat, ne fœtus aliquando edendus.

nigrâ cute vestitus prodiret : author itaque erat adstantibus , ut lavarent fœminam totam , si forte impressa fœtui Idea , superveniente aliâ deleri posset. Lavatur fœmina , securaque redditur , nullum jam , post lotionem nigrorem , in fœtu observatum iri. Peracto gestationis tempore , fœtum enixa est candidum quidem , ast nihilominus aliquot in locis , impressi sibi nigroris vestigia ostendentem. Observabantur enim adhuc loca nigredine imbuta , quo diligens lavantis manus non pertigerat ; interstitia nempe digitorum , manuum æquè ac pedum , Inguinis , ac præter hæc , unus in dorso locus , cæteræ partes omnes , omni nævo liberæ videbantur.

Hujus itaque Æthiopis à prægnante fortiter concepta nigroris Idea , fœtui jam revera impressa erat ; neque illum deseruisset , nisi lotionem istam fœditatem certò ablui , fortiter apud se concepisset mater , adeoque ista prior ab hac posteriori suppressa fuisset ; quod nigroris vestigia docebant.

Neque

Neque hanc imaginativæ Ideæ vim, ignorant mulierculæ prægnantes ipsæ. Hinc à fœdarum rerum adspèctu, meritò oculos non tantùm & animum avertunt, ne speciem illarum fortiori contemplatione & imaginatione conceptam, fœtui imprimant; sed & in ea quæ pulchra sunt oculorum aciem sæpiùs dirigunt, ut concepta pulchritudo in fœtum derivetur: quare intuentur sæpius aliarum pulchros infantes, conceptamque hanc Ideam tanquam sigillum quoddam proprio fœtui imprimunt, non frustraneo eventu.

Actus verò imaginationis, motionesque appetitus sensitivi, & matri & fœtui imprimi, pulcherrimo exemplo suo demonstravit Patriarcha *Jacob*; qui in fraudem fœceri sui *Laban*, bacillos modò concolores, modò variegatos, ovium conspèctui opponendo, agnos impetrabat ejusdem cum bacillis coloris. Quem imitantur hodie illi, qui in magnorum Principum aulis equorum curam habent; qui ut equos adipiscantur, elegantibus quibusdam maculis, pilisque exoptati coloris ornatos, depictos,

piectos tali ratione equos, coëuntibus equarum oculis opponunt, & quæ hausta imaginatione ac concepta ab equa idea est, fœtui quoque imprimitur, pul- lusque nascitur optatis maculis colori- busque imbutus.

Quare cum tanta sit in fœtus forma- rione Idearum conceptarum vis, quidni- majoris cujusdam Gigantis conceptæ Ideæ, feminiq; impressæ, aliquid tribuen- dum virium, esset. Cùm prætereà con- stet, tantam quoq; imaginationis vim ef- se; ut non colores tantum varios fœtui imprimere possit; sed monstrosas quoq; ac à specie omninò dissimiles alienasque figuras s. Ideas inducere. Cujus quam- vis aperta sint apud varios auctores te- stimonia, notatu tamen digna admo- dum sunt, quæ recenset M.M. de fœmina gravida, insigni desiderio agrestis pomi affecta; cujus cùm à marito assidente, il- ludq; tanquam noxium reprobante, co- mestio interdiceretur, in mœrorem in- cidit insignem, ut à continua & forti de- siderati pomi meditatione, nec sibi tem- perare, nec ab aliis selectissima etiam poma offerentibus, revocari posset. Hæc
dum

demum enixa fœtum est, è cujus mala, pendebat pomum proprio petiolo adhærens, cùm crescente fœtu incrementum sumens, figurâ, colore, pomum exactè referens. Alia mercenaria mulier gravida, accumbens mensæ, avidius comedebat de capite carpionis piscis: accedens coqua, quòd hanc partem sibi destinârat, graviter increpat fœminam, ut pudore suffusa in patinam rejiceret ambesum piscem. Et quamvis ab adstantibus, fœminam uterum gerere cogitantibus, ad caput carpionis comedendum, postea invitaretur; pudor tamen dolorisque acerbitas, ipsam de mensa surgere fecerunt; surrexit ergò incœnata, continuas lacrymas fundens, cubitoque capiti admoto, (uti mœsti solent) nil nisi piscem illum meditabatur, in felicissimo certè eventu. Peperit namque infantem, cujus caput non prorsus humanum, sed ex dimidio piscem referebat: illâ parte, quæ cubito matre innitente fuerat compressa, ita ut ipsum quoque os in duo semiora, inq; partes humano ori & quale carpioni est, assimiles, divideretur: quin & color Cyaneus, & squamarum

rum similitudo eidem inessent. Tanta vis est conceptarum Idearum, quidni in magnitudine quoque determinanda? Et hæc de *vi Imaginationis* obiter dicta sufficiant.

Progrediamur ad alia, & quidem ad *Fætus pluralitatem* explicandam. Cum enim ad numerosam prolem concipiendam, unicus sæpè maris cum fœmina congressus sufficiat, non immeritò quæritur, quænam hujus pluralitatis *Causa* sit? An in masculino semine, jam distinctæ revèrà sint plurium fœtuum Ideæ: an verò, quod ad unicum fœtum generandum, aliàs determinatum videbatur, ita in utero ab extrinseco quodam dividatur, ut pluribus sufficere possit: quod quidem posterius, verò similis videtur. Neque tamen ex septenis in uteri cavitate loculis discretis, fœtus pluralitatis ratio petenda est, ut totidem fœtus, non plures fœminam concipere posse, credendum sit, cum tales loculi nullibi reperiantur. Ingeniosiss. M. Marci plurimum hîc *radiorum Idealium*, propter materiæ inæqualitatem, *refractioni* tribuit; quæ sententia ejus c. 4. pluribus legi pote-

poterit. Existimat verò V. Cl. Si duo femini insint corda (quacumq; ratione habeat) binos inde fœtus prodituros. Cùm enim cor sit Centrum evolutionis, quot corda tot evolutionis centra; adeoque necessariò, quoq; plures fœtus inde expectandos esse autumat. Quæ sententia quamvis subtiliter excogitata videatur; vereor tamen, ne cum modernorum Anatomicorum inventis consistere queat, quibus constat; ad viviparorum æquè ac oviparorum generationem, ovum concurrere, fœminini feminis, ad unicum fœtum sui sexus determinati habitaculum, quod à virilis feminis *innato calido* fœcundetur, s. Ideæ feminis fœminini torpescences aliàs, ad motum excitentur ac explicentur, ut in antecedentibus jam satis ut opinor demonstratum est. Quare his præsuppositis, aliorum salvis sententiis, *pluralitatem fœtus ex ovorum*, à masculino femine fœcundandorum, loculisque suis exclusorum, & per tubos uterinos in se ipsum uterum, delatorum *pluralitate* dependere, existimamus: ita ut *tot concipiantur fœtus, quot ova fœcundata* delapsa fuerint.

Cùm itaque in ovariis muliebribus, ingens satis ovorum numerus contineatur, fieri potest naturaliter, ut non septē saltem fœtus, uno tempore in utero materno concipiantur, sed plures etiam. Ita de *Comitissa* quadam refertur, quòd unico partu trecentorum & sexaginta infantum mater exstiterit; non alia ratione, quàm quòd totidem ova, à masculino femine fœcundata fuerint; quod etsi rarissimum sit, secundum causas tamen naturales, quin fieri potuerit, nullum est dubium.

Ast verò, quamvis plura ova concurrant, quomodo *masculinum semen pluribus ovis fœcundandis sufficere* possit, non incommodè dubitatur. Cùm enim in illo integram ideam ac signaturam fœtûs proprii sexus, contineri dixerimus, quomodo hæc unica idea ita dividi poterit, ut plures inde fœtus oriantur? Hoc verò facillimum evadet, si duo hîc præcipuè considerentur. *Primò* quidem quòd Masculinum semen, propter suam liquiditatem aliàs confusum, cum fœminino femine conjunctum, in ordinem reducatur, uti in antecedentibus explicatum

catum est. *Deinde*, quòd *semen masculinum* licet propriè trinam dimensionem non habeat, ita tamen *divisibile* sit, ut quæ particularis cæteroquin v. g. Capitis Idea, caput formare debebat, divisa, pluribus capitibus formandis idonea sit: & ita in reliquis quoq; particularibus Ideis, adeoq; universalis illa hominis Idea divisa, plures fœtus formare possit: præcipuè cùm constet, minimam saltem sui corporis particulam esse, cui vis formandi tribenda sit.

Quare in plurium ovorum fœcundatione, ita res se habet; ut singulis Ideis fœminini seminis, convenientes masculini seminis applicentur, adeoq; masculinum semen, alioquin unum, propter ovorum pluralitatem multiplex fiat & numerosum. Manifestissimum hujus rei exemplum videmus in semine Galli. *Gallus* enim si semel saltem gallinam compresserit, plura ejus ova fœcunda reddit, adeò ut integrum sæpè annum fœcunda ova pariat, diversi sexûs: quod fieri non posset, nisi galli semen in tot divideretur particulas, quot ova, & exinde pulli nascerentur. Atq; hæc breviter de fœtûs pluralitatis causis dicta sufficiant.

Quam antequam deferamus doctrinam, paucis quoque *pluralitatem partium, infætu præter naturam* nonnunquam observatam, consideremus. Contingit enim quandoque, fætum esse natum bicipitem, quatuorve brachiis, ac totidem pedibus instructum. Cujûs *causam* etsi sæpè laudatus M. M. itidem radio-
rum Idealium refractioni tribuat, pace tamen tanti viri, fieri posse existimo, ut & alia hujus rei ratio subfit. Quare brevissimè sequenti modo hancce rem se habere arbitror: In conceptione fætûs masculinum semen, confusum alioquin à fæminino femine tanquam regula in ordinem reduci jam superiùs dictum est, ita ut Idea Capitis feminis masculini, applicetur Ideæ capitis fæminini feminis, brachia brachiis, crura pedesque, cruribus pedibusque. Quod si ergò contigerit, Ideam v. g. capitis, masculini feminis, non ritè applicari Ideæ capitis fæminini feminis, aut in partem aliquam dextram vel sinistram declinare, fit; ut bina capita humeris extantia cernamus; aut amborum feminum Ideis cruralibus, haut justo sibi invicem appli-

plicatis, quaterna crura prodeant. Ita enim quæ conjunctæ particulares Ideæ unicam saltem partem formare debuissent, nunc divisæ, singulæ explicantur, numerusque partium præter naturam augetur; quale quidem non in homine saltem, sed brutis quoq; observatur. Ita non ita pridem hîc *Hamburgi* equus ostendebatur, octo pedibus instructus, cujus præter jam dictam, nulla videtur ratio esse alia.

Hæc de numero partium fœtus aucto; quid de imminuto dicemus? Neq; enim rariùs contingit deficere interdum partem, quam eandem excedere. Quod itidem hîc loci, ante paucos dies videre licuit. Adolescens nempe erat Gallus, utroq; brachio à natiuitate destitutus, pedibus tamen omnia illa obiens munia, quæ manuum ministerio naturaliter fieri solent. Cujus defectus, quæ sint Causæ, paucis expediet explicare. Magna quidem imaginationis, conceptarumque Idearum vim esse, in antecedentibus demonstratum est; quibus iisdem quoque, in partium defectu non parvam efficaciamtribuendam esse
ex-

existimamus; ita ut si fœmina uterum gerens viderit, fortiterq; conceperit objectum hominem aliqua parte mutilum, Idea conceptæ partis mutilatæ, in fœtu quoque deleatur: nihilominus tamen præter hanc, potiores causæ aliæ sunt, è quibus hæc res commodius explicari possit.

Cùm enim Idæ fœtus non aliter explicentur, quàm si beneficio *Calidi* ejus *innati*, *motoris* ac *coagulatoris*, advectæ alimentorum particulæ, iisdem apponantur, atque trinam dimensionem largiantur. Contingere potest, ut alimentum, ad certam partem non deferatur, adeoque Idea illius partis, propter alimenti defectum non explicetur, sed emarcescat. Vel etiam alimenti vitio, tale quid accidere potest. Quemadmodum enim manifesto acore imbutum alimentum, integram humani corporis formandi Ideam omninò extinguere potest, unde abortûs causam in antecedentibus derivavimus. Ita fieri potest, ut particulæ quædam nutrimenti vel ex se, vel loci seu uteri ratione impuræ, acidæ atque ad nutritionem ineptæ, tenel-

li fœtûs certam partem afficiant, Ideam ejus nec dum plenè efformatam suffocent, suppresso ejus explicatore; unde deleta idea, suffocatoque motore, necessariò parti moriendum est. Quæ, an revera eo ut dixi modo, se habere possint; tuo L. B. judicio ac arbitrio, uti omnia, committo.

Quare ab his tandem ad aliam properemus quæstionem, & quidem ad *Causas differentia sexus* cujus paucis hæc reddi ratio potest ac demonstratio. Ad fœtus generationem, utriusque sexus semina s. Ideas concurrere, in antecedentibus demonstravimus; modum item conjunctionis ac explicationis addidimus; quibus præsuppositis concludendum videtur; sexûs diversitatem, à prævalentibus Ideis ortum habere, ita ut, si masculini spermatis forma potentior fuerit, fæmininum semen subjugetur, & fœtus masculinus inde nascatur: & contra Fæminino semine, masculinû subjugante, fæmina proles generetur. Quod si verò contigerit, utriusque seminis parem esse potentiam, fœtus formetur ab utroque sexu participans.

Quem

Quemadmodum quotidie hoc videmus; quomodo debilior forma à potentiori subjugetur. Ovillà caro propriam suam possidet formam, quâ à cæteris carnibus omnibus realiter distinguitur; comesta; tamen à lupo in hujus carnem transmutatur, adeoque propter formam potentiozem supervenientem ovillà caro esse desinit. Pari modo, si eadem ovillà caro comedatur ab homine, cujus potentior forma debiliorem ovillæ carnis formam subjugabit, inq; suam humanā naturam eandem trahet; quod ipsum supra jam explicatum est.

Atque hæc, de Animalium ac præcipuè hominis semine seu Ideis, harumque in utero explicatione & nutritione dicta sufficiant. Progrediendum nunc esset ad semina vegetabilium demonstranda, nisi unicum adhuc circa animalia reliquum esset, quod non facilè, sicco (ut dicitur) pede, prætereundum censeam. Cum enim cuncta animalia, eâ lege hanc mundi scenam intrent ut eadem aliquando exeant, s. morti succumbant, cui cuncta viventium individua obnoxia sunt, brevissimè saltem lubet considerare

derare. quisnam sit *seminalium Idearum in morte status*, præcipuè cum viventium generationes ex illarum evolutione jam repetierimus.

Quemadmodum verò ex antecedentibus patet, seminales Ideas, per se, suâque sponte nunquam iri explicatum, nisi motor quidem accesserit, torpentes illas alioquin, ac omninò steriles excitans & fæcundans, qui idem nutrimentum iis apponat per omnem vitam, vitamque ipsam seu motum (neque enim aliter, nisi motu, viventes à mortuis discernimus) largiatur, quem *Calidum innatum* nominavimus. Ita obscurum ex iisdem esse non potest, quâ ratione mors scilicet interitus viventibus contingat. Oppressio nempe, à causa morbifica, *Calido illo innato*, primò in Corde; secundò in sanguine musculorumque ventriculis habitante motore, ac principe omnium actionum animalium; necesse est, ipsas actiones omnes cessare, adeoque animal mori. Cujus exemplum in antecedentibus jam attulimus ex *Causis abortus*, qui certè nihil nisi fœtus mors est. Diximus verò eundem potissimum accidere

cidere, quando nutrimentum fœtus impurum exstiterit, hostiliq; quodam fermento manifestoque imbutum. Quod quia manifestum, potentiùs; debilius, seminalium fœtus nondum planè formati, Idearum Calidum nativum suppressit & figit, adeoque actionibus abortivis ipse fœtus moritur. Atq; eâdem hâc, neq; ulla alia ratione, cuncta quæ vitam habent, emori demonstratu facilissimum esset, si integram hîc Pathologiam afferre liceret, & ostendere, quomodo in singulis morbis, *Calido* nostro & *motori innato*, à Causa morbifica, suffocationis periculum immineat, & mors; neq; præterea hæcce aliis quandoq; curis, si Deo ita visum fuerit, servaremus.

Cùm adeoq;, Calidô innato idearum suppresso, animal moriatur, quid de ipsis Ideis dicendum est, an illæ conservantur adhuc in cadavere, an verò omninò delentur, & in nihilum rediguntur? Quod certè nullo modo dicendum videtur. Quamvis enim fecunditatem omnem amiserint, & steriles factæ dici possint, non tamen ideò omninò destructæ sunt. Quod certè infallibi-

lia in

lia in cadavere existentia vestigia loquuntur.

Serpentes in minima etiam frustula concisi ac putrefacti, ut nullum amplius vitæ vestigium adsit, Solis calore in novos serpentes abeunt. An vero hîc solam licebit accusare putredinem, Uti pluri mi faciunt? Non certè. Quomodo enim putredo s. mixti resolutio diversis animalium speciebus quæ potest contingere, quandâ ac certâ specificam formam largiri poterit? nonne deinde effectus nobilior esset sua causa? an verò desuper infusa est serpētis forma materiæ? aut quare tum hæc, & non alia infusa forma est? de quo jam in antecedentibus actum. Quare verissimum erit, ipsas etiam serpentum formatrices, Ideas, in putrefactis serpentibus revera etiam post mortem delituisse, atque adeò cum vita non destructas esse. Solis verò calor, quiescentibus his Ideis spiritum motorem infundit, quem per mortem aliòquin amiserant, ut denuò nutriri possint ac vivere. Eodem modò *Rana* contrita, & in lutum resoluta, hyberno tempore; æstivo sole accedente,

Q

revi-

reviviscunt. Quas quidem è solo limo, Solis calore, nullo proprio præexistente semine aut Ideis, factas formatasque non pauci ex eruditis etiam opinantur, ita ut generationem hanc vocent *Æquivocam*, quod effectus dissimilis speciei producat. Sed pace aliter sentientium, nunquam è solo limo, Solaris caloris beneficio producta rana est. Quæ enim hæc foret in luto potentia ad ranam, & quidem ad hanc potius quam aliud animal producendum? Sed si quandoq; contigerit, in luto solaribus radiis incubantibus ranam formari, peculiare ac propriæ, in luto latuerunt Ideæ ranarum formatrices, è contritis ac putrefactis, lutoque commistis ranis profectæ. Quibus probè consideratis, patet, Ranarum mortuarum Ideas ita non esse destructas, quin Sole motore reviviscere possint. *Ægyptii* & *Insulæ Madagascar* incolæ locustis vesci dicuntur, atque è carnibus ipsorum putrefactis denuò locustæ nasci: at verò unde hoc? anne ultro largiendum erit, locustarum comestitarum, atque ab Ideis seminalibus humanis, in substantiam humanæ carnis com-

commutatarū Ideas, ne per tot quidem digestiones deletas omninò esse ; sed subjugo seminalium Idearum humanarum integras perstitisse. Cui non absimile est, illud, quod de *anatibus* refertur. Hæ cum serpentibus sæpius vescantur, putrefactæ æstivo tempore in serpentes resolvuntur. Cujus rei, præter aliorum testimonia, testem habeo Virum fide dignum oculatum, qui ab illo tempore quo hæc in anatibus fieri observavit, semper ab illarum carne abhorruit; adeoque & hoc experimento innotescit, Ideas mortuorum animalium non deleri, sed superesse adhuc vitæ extinctæ. *Ardea* lucis nutritæ in lucios resolvuntur; *Carpionibus* in carpiones: *Anguilla* non aliter ac serpentes, ad putrilaginem etiam coctæ, locoque debito repositæ, in plures alias anguillas abeunt. Alia *Cancrorum*, aliorumque resuscitatorum animantium exempla, passim apud autores videri possunt.

Quæ cuncta, etsi apertissimum testimonium præbeant, *Ideas in mortuorum cadaveribus reverà superstites esse*; maximè tamen hoc notatu dignum erit, in

defunctorum hominum etiam cadaveribus, Idearum superstitem signa observari. De sanguine humano in antecedentibus notavimus, quod in ejus destillatione variæ interdum humanarum partium Ideæ visæ ac observatæ sint. Sed quid dicemus de his, quæ Borellus habet, posse nempe in phiolis licitâ Necromantia, patrem, avum, atavum, totamque profapiam, imò antiquos Romanos, Hebræos & quemcunque volueris, umbratili quadam Resurrectione in lucem revocari, cum propriis figuris, modo eorum cineres ossaque servaris? Quæ certè adeò in Naturæ videntur potestate radicata esse, ut dubio circa hæc nullus locus esse possit. Quod si enim feminales Ideæ animantium brutorum, aliis etiam potentioribus formis subjugatæ, salvæ persistant, quidni Ideæ humani corporis, solo motore Spiritu destitutæ, integræ in Cadavere quoque persisterent? Et ut dicam prout sentio, Phantasmata illa, in Cœmiteriis sub noctem conspecta, non semper pro Spectris Diabolicis, nec etiam Angelorum bonorum apparitionibus habenda videntur,

dentur, cùm naturaliter quandoq; contingere possit, Ideas corporis mortui, beneficio centralis cujusdam caloris elevari, quæ non nocturnò saltem, sed diurnò etiam tempore ibidem conspicerentur, si per majorem Solis lucem liceret, quæ eadem & Sydera cœlestia de die inconspicua reddit. Neque tamen & hoc negârim, Diaboli illusionibus interdum tale quid contingere, ut hominum credulorum superstitionem augeat, tandemque miserè decipiat, & in suos castes pelliciat. Fieri namque potest, permittente Deo, ut Diabolus corporis cæteroquin oculis, quia Spiritus est, invisibilis, demortui corporis seminalibus Ideis indutus, certam personam, *Samuelem* nempe aliumve referat, cujus ideas induerit.

Quæ, cùm ita sint, quis non gaudeat, in nobis demortuis etiam, futuræ *resurrectionis* luculentissima *vestigia* reperiri? Non quòd existimem; posse tantum summi Opificis miraculum, ex ullis causis naturalibus perfectè explicari aut perfici: Absit hoc. Sed ut veræ Philosophiæ naturalis hostes liquidò videant,

quantus ac quàm mirabilis hujus cum
 sacris sit consensus. Deinde, Athei pro-
 priis sensibus convicti, aliter ac solent, de
 futura corporum resurrectione sentire
 discant. Cùm enim hi. Scripturæ sacræ
 auctoritati, parùm aut nihil ferè tribuant
 (quod dolendum sanè!) ac prætereà ipsā
 resurrectionem, nunquam fieri posse ar-
 bitrentur: obmutescant profectò, si ejus
 possibilitatem ac probabilitatem, è cau-
 sis naturalibus demonstrabilem oculis
 suis viderint. Et quidni *possibilis* sit *mor-
 tuorum resurrectio*, cùm idem numero se-
 men, aut etiam Ideæ formatrices, quæ
 nos movente calido innato formârant
 in utero materno, in ipsis etiam de mor-
 tuorum cadaveribus reliquæ sint, quie-
 scentes jam, quòd motore Spiritu desti-
 tutæ sint; quem si ab omnipotenti Deo
 receperint, quidni novam vitam accipe-
 rent & è mortuis resurgerent? Ita enim
 ipse Deus apud Prophetam Ezechiel. c.
 xxvii. *Vaticinare fili hominis, dicens Spiri-
 tui; Sic ait Dominus Jehova: A quatuor
 ventis, adveni Spiritus & perflato inter-
 fecios istos ut vivant. Et ingressus est in
 illos Spiritus, & revixerunt, steteruntq;
 super*

super pedes suos . copiae magnae quam plurimum.

Neque tum nova Idearum semina-
lium, à parva statura ad majorem, e-
volutione opus erit, prout in utero
materno fiebat; sed evoluta jam in-
tegra Idea, prout mortis tempore erat,
resuscitabitur. Atque adeò idem nume-
ro, qui cecidit Petrus, resurget, & quod
Hob dicit, eadem numero cutis & caro
hæc ossa circumdabit; hi oculi vide-
bunt Dominum. Horum namq; oculo-
rum, horum ossium, hujus cutis carnisq;
Ideæ seminales, in demortuorum cine-
ribus latent. Quare cùm viderimus, de-
mortui hominis corpus Terræ visceri-
bus mandari, non aliter existimandum
est, quàm si semen quoddam Terræ con-
credatur, cui omnipotens Deus, moto-
ren Spiritum aliquando afflando, fœ-
cunditatem redditurus sit: ut quemad-
modum granum tritici v.g. proprio mo-
tore s. Calido innato præditum, Solisq;
Calore excitatum, verno tempore ger-
minare incipit; ita & hoc novissimo die
è Terra denuò resurgere possit.

Atq; hæc de Ideis in mortuorū corporib.

superstitibus, salvis ideis, credo quòd
sufficiant quæ dicta sunt. Qui plura hu-
jus testimonia desideraverit, facilè hæc
inveniet, si naturalium rerum historiam
consulerit; præcipuè vero de *Hirundini-
bus*, quæ observantur, notatu dignissi-
ma sunt. Hæ namque, hyberno frigo-
re compulsæ, ad exteras regiones cali-
diores migrare, ab antiquis nostris ma-
joribus creditæ sunt: hodie verò com-
pertum est, non discedere illas à no-
stris oris, sed aquis submergi, ac sub
his hyberno sæviente frigore, redeun-
tem ad nos solem expectare. (quod
idem, notat *Luther*, T. X. Witt. 21.)
Quò quidem tèmپore, nullum in ipsis
observare licet motûs ac vitæ vestigi-
um, adeò mortuarum instar, ad maris
littora jacentes deprehenduntur; his
tamen, æstivo redeunte sole, (quis
credat, nisi sensibus ipsis convictus?)
nova vita conceditur, ut è morte in
vitam veluti revocentur ac resur-
gant. Quod non frustra à summore-
rum opifice factum credendum est, sed
ut, præter admirandam suam potenti-
am, doceret nos, resurrectionis quod-
dam

dam certò futuræ non incertum documentum,

Verùm sistamus tandem has, circa animalium formatricium Idearum meditationes ac Experimenta, cùm præter spem longius paulò his immorati simus; quod tamen æquo Te laturum animo, Lector, spero, si probè attenderis; quanta in animalium generatione consistat dignitas, pariter ac difficultas, ut propter hanc non potuerim, propter illam certò non debuerim esse brevior.

Quare nunc tandem ad Ideas *Vegetabilium* transeamus; & quemadmodum animalium semina, perfectam ac integram sui corporis Ideam continere diximus: ita ipsum hoc quoque in vegetabilib9 liceat demonstrare. Quamquam enim *Vegetabilia* tot non videantur organicis partibus ac dissimilaribus instructa, prout animalia; nihilominus tamen & ipsa non paucas partes habent, diversæ naturæ ac definitionis, quarum singulas, proprias sibi ac peculiare Ideas seminales habere necesse est. Quemadmodum enim in animalium

generatione Ideæ seminales cordis, foli cordi formando, destinatæ sunt ac determinatæ, neque ullam convolutio-
num intestinorum, vel alius partis formativam potentiam continent: Ita & *Vegetabilium* particulares Ideæ, foliorum nervis v. g. formandis dicatæ, non formabunt caulem aliamve partem, atq; adeò quot erunt partes diversæ in plantis, tot quoq; erunt particulares Ideæ, quibus conjunctis unica tandem prodibit Idea, integram, integri vegetabilis signaturam, continens.

Quæ quidem Idea totuplex erit, quotuplicia sunt ipsa vegetabilia. Cum enim *salviam* v. g. externâ quoque signatura à Rore marino, & hunc ab aliis discernere queamus, quod diversa utrique sit figura, diversis terminis comprehensa, necesse quoque est: utrique proprias esse Ideas, à cæterorum vegetabilium omnium Ideis, specificè differentes, atque adeò tot esse seminalium formatriciumq; Idearum species, quot sunt vegetabilium.

Hæ specificæ, ac integræ vegetabiles Ideæ, illo corpore, quod semen communiter

niter vocamus, continentur, tanquam capsulâ quâdam. Neque enim (uti jam in antecedentibus monitum, & postea pluribus dicetur) integrum illud corpus pro vero semine habendum est; cum hoc ad corpus suum minimam saltem, quoad quantitatem, rationem habeat. Indigebat verò tali thecâ semen, tum ut ab externis non adeò violari, tum etiam, ut in illa commodè citra confusionem recondi posset, prout in antecedentibus circa ova muliebria monui. Adeò ut si hanc internam feminis signaturam corporis ac mentis oculis cernere liceret, solo aspectu judicare proclive futurum esset, qualis figuræ planta, è feminalibus istis Ideis quandoque evolutis, proditura sit.

Evolutio verò harum, quomodo fiat, si quis scire volet, præsupponat hic necesse est è subsecuturis, cunctis fecundis feminibus connatam esse particulam aliquam *lucis*, *sulphuris vitalis*, quod omnium vitalium actionum, motûs, nutritionisq; sit principium. Vegetabile itaque semen in terram quando
pro-

projicitur, aqueo humore madentem, externa Idearum feminalium capsula mollescit, ut majus spatium Ideæ occupare possint; atque tum externus Solis calor, ejusdem cum motore feminum Spiritu, originis & naturæ, motu suo ad motum excitat, mobilem illam feminum particulam *lucis & sulphuris*, quæ mota, incipit, vi Sulphuris propria, propter aciditatem coagulativa, (de qua in subsecuturis) Aquam elementalem coagulare, in substantiam pro Idearum varietate variam: atque hanc, tanquam nutrimentum Idearum spatio-
lis interponit, quô ipsæ explicantur Ideæ, ut foras demum prodeant, & evolvantur ad certum quantitatis terminum.

Ut verò uno intuitu quasi, hanc *vegetabilis* seminis *Ideam* observare possis L. B, consideres quæso, è plantarum feminibus, artificiosa institutâ vegetatione, quæ ad candelæ calorem institui possit, illarum luculentissima demonstratio.

Plantarum hæc feminumve vegetatio, à plerisque Resurrectio earundem
appel-

appellatur: at pace illorum minùs commode & verè. Resurrectionem enim omnem, necesse est prægressam esse mortem: sequeretur itaque, è mortuis planè h. e. infœcundis sterilibusque seminibus, talem Idearum productionem produci posse: quod tamen naturæ vires superat, ac contra Experientiam est. Nisi enim Spiritus ille vivificans ac movens, fœcundationis etiam origo, reverà semina inhabitaret, nunquam profectò talis Idearum sublimatio fieri posset. Sine illo enim omnis motûs expertes sunt & steriles. Hoc verò vitam largiente Spiritu, præsentè feminibus, quomodo mortua dici poterunt? Si verò non hoc, quomodo resurrexisse dicentur? quare non nisi *vegetatio* quædam *seminum* est, quâ innatum seminum calidum excitatum, externi caloris auxilio, *Ideas seminales vegetabiles* movet ac elevat. Ipsa hujus vegetationis *ἐγχείρησις* hodie plurimis non ignota, cum publicis expressa typis extet. Omnes verò hujus descriptiones, sequentem communem ferè habent rationem cum Cl. Tackio.

Recipiunt maturum plantæ cujusdam semen, idque sereno cœlo sub diò
col-

collectum, & in mortario vitreo contusum, Cucurbitæ vitreæ injiciunt, cujus longitudo plantæ longitudini respondeat, orificiumque habeat angustum, ut sigillari possit. Cucurbitam obturatam ne quidquam evaporet, asservant, donec vespere ingruente, Cælum dispositum videant, ad fundendum istâ nocte rorem. Quibus observatis contusum semē tabulæ vitreæ imponūt, & hāc in prato vel horto amænissimo, paropsidi impositam, ne quid perdatur sub dio collocant, ut cadat ros super semen, illudque humectet. Interea roris majalis aliquot mensuras colligunt; madidum verò rore semen, ante solis ortum recondunt, ne sol oriens filium suum repetat. Rorem collectum filtrant, destillant, donec nullas amplius relinquat fæces; (è fæcibus verò calcinatis salem extrahunt, quem in rore destillato solutum semini affundūt, ad eminentiā triū digitorū) sic colliquatō vitri orificio, ne quid exspirare possit, commodò quodā loco tepido illud recondunt, & aliquot elapsis diebus, apparet semen instar glaræ vel mucilaginis: Spiritus verò super-

supernatans strias accipit, apparetque instar cuticulæ versicoloris: intrà verò cutis & terræ glarealis spatium, ros ex natura seminis saturatè viridis videtur. Vitrum sigillatum Solis Lunæque radiis exponunt; pluviali verò aëre, in hypocaustis asservant, donec omnia signa fuerint completa. Ita tandem admoto vasi calore effigies ac Idea quædam exsurget plantam exactè referens, cujus semen dicto modo dispositum fuerit, eadem verò calore remoto iterum evanescet. Talem, excitandi Ideas vegetabilium modum, tenent ferè omnes ut dixi, paucis saltem ab aliquibus mutatis.

Neq; verò potentiùs ullum excogitari potest experimentū, ad efficaciter demonstrandum; in plantarum seminibus, verè ac realiter existere, integram integræ plantæ signaturam. Ratio verò operationis omnis, è natura Roris petenda est. In hoc enim continetur particula quædam, spiritûs illius, universum hoc vivificantis, quem ventus portat in ventre suo, occultum, sed absolutè necessarium, vitæ cibum. Hic, calidū illud semini
inna-

innatum, fœcunditatis principium, excitat ad motum, occultamque fermentationem, quâ Idea feminis, ab externa terreaque mole s. capsula sua liberatur, ut ab externi caloris particularum motu, terreis particulis relictis, elevari possit.

Plura ejusmodi experimenta, reperiuntur apud varios, ut illorum magnū cumulum huc afferre, neq; gratum neq; necessarium futurum sit. An verò ex incineratis etiam plantis, talis perfecta Idea impetrari possit, ac è feminibus, non omni dubio carere videtur. Non defunt quidem, qui è cineribus rosarum v. g. eandem promittunt; quò verò eventu, non ausim determinare. Celeberr. saltē *Helmontius*, *Quercetanium* in lixivio urticarum congelato, earundem Ideas observantem, delusum arbitratur; quòd glaciei incipientis striæ acuminatim desinant. Neq; rationes defunt, quæ hoc confirment. Cum enim principium talis elevatæ Ideæ, sit spiritus ille universi vivificans, (de quo in subsecuturis dicetur, quod natura sua acidus sit, coagulans) proximum seminalis Ideæ receptaculum, sit; ut hujus jactura facta, nul-

nullus postea Ideæ motus aut elevatio esse possit. Quod certè in salis fixi præparatione contingit. Violenta namque illa calcinatione, maxima feminalis acidi pars in auras abit, tantillo saltem relicto, quod prohibet, ne in aquam elementalem sponte solvantur Alcalifata. In hoc vero tantillo Acidi relicto, quamvis reverà quiddam seminis contineatur, (quamprimùm enim cœlestis ille spiritus, cum feminalibus Ideis conjunctus fuerit, inseparabilia hæc à se invicem sunt) minimum hoc saltem est, & minoris efficacix.

Neque adeò valet illa consequentia *Cl. cujusdam Viri*, quam affert ex cinerum Ideis, constare nempe hoc ipsò, maximam partem essentialis substantiæ consistere in Sale suo fixo. Præterea enim, quòd ipse operationis successus, ipsi dubius videatur *Helmontio*, à rei veritate alienum est, vel unicum granum Alcalifati salis, quale cinerum est, in vegetabili ante Calcinationem formaliter præexistisse, uti pluribus jam demonstratum est; quomodo igitur in illo pars essentialis substantiæ consistet?

His itaq; relictis ad *Mineralium* femina nos conferamus. Neq; enim hæc, suis particulis seminalibus carent. Quamquam enim in *his* non reperiantur tot dissimilares partes ac organicæ, quot in *animalibus* præcipuè ac *vegetabilibus* reperi diximus; neq; adeò, integralibus partibus constans Idea, in illis notari possit, habent nihilominus Metalla ac continent formam quandam substantialem, convertentem commune alimentum, *Mercurium* nempe, cunctorum metallorum materiam, in suam propriam substantiam; quod certè seminalem quandam vim arguit.

Et, quod Metallicorum scriptorum autoritate & experientia confirmatum est; *Ferrì* mineræ, omni ferè ferro exhaustæ, certis annorum intervallis, denuò repletæ reperiuntur. Neque verò hæc ferri regeneratio fieri unquam posset; nisi seminale quoddã *ferri* fermentum, in illo loco delitesceret. Idem in *stanno* observatur, nec non *Nitro*.

Atque si ullum ex mineralibus semen est, pro cuius possessione, indefessi, nocturni diurniq; labores suspiciuntur, *Auri* certè semen est. Ita enim *Augurellus*:

Semi.

*Semina sunt auri, quamvis abstrusa recedant
Longius, & multa nobis querenda labore.*

Hoc auri semen quamvis reverà ac realiter in auro vulgi contineatur; inhabile tamen hoc habetur à Philosophis ad opus Philosophicum, quod vulgi aurum mortuum sit & infæcundū. Quamvis enim aurum vulgi, tantæ sit ductilitatis, s. sulphur ejus feminale, adeò manum ducentis sequatur: ut si per magna argenti massa deauretur, atque illa postmodum distrahatur in filum, crinis magnitudinē æmulum, inauratū, de futurū citiùs sit filum attenuandi ingenium artificis, quam auro colorandi vis: ad alia tamen metalla, seminali suâ vi imprægnanda ineptum est, quòd sulphur ejus semel coagulatum, motûs impofterum potentiam amiserit & fæcunditatem, adeoq; mortuum sit. Quare ex alio subiecto necesse est, ut semen hocce eliciatur, de quo videantur alii.

Semini huic tribuenda est *vis aurifica* à Philosophorum turba tantoperè desiderata. Quemadmodum enim tritici semen habet facultatem, aquam vegetabilem seu communem convertendi in

suam substantiam: ita quoq; semini auri, inest facultas, commutandi aquam metallicam f. Mercurium in aurum.

Quod illis à rei veritate valde alienum videtur, qui naturam in omni re similem ignorant: quare tanto strepitu, veritatem Tincturæ Philosophicæ in dubium vocant; Viri nominis alioquin celebritatem quandam adepti: quanquam rationibus nitantur valdè leviculis, quos fatius fuisset tacuisse: Philosophi enim mansissent. Vel enim dicunt Formas rerum esse immutabiles, ac unius Dei proprium formas dare rebus, & datas mutare & transformare. Quo dubio semetipsos produnt, quàm omninò sensum non capiant Philosophorum, cui tamen tanto conatu contradicunt. Quis enim unquam hæc negavit Philosophus? aut quis dixit, ipsas formas substantiales esse in alias transmutabiles, aut posse has ab hominibus produci? contrarium potius illi docent, qui veræ Philosophiæ præcepta hauserunt. Semina certè ipsa in alia semina mutari non posse, ipsi probè nōrunt; eundemq; ortum non à creaturis sed ipso Creatore proficisci. Neq; tamen illos fugit, semina debiliore motore innato

nato Calido instructa; ab alio semine, potentiori motore prædito superari, & subjugum mitti posse, quod ipsum variis similibus Naturæ operationibus edocti sciunt. Neq; etiam ignorant; formas à Deo creatas, materiales præcipuè, artis auxilio, non tantum in actum duci posse, sed separabiles quoq; ita esse, ut subiecto suo relicto in aliud migrare, illudq; debiliori formâ suppressâ informare possint. Quod ipsum ex antecedentibus aliquo modo clarum esse potest. Certè Pythagoras formarum Metempsychisin docens, alio sensu intelligi non debet. Sed hæc non adeò sunt hujus loci.

Vel Synodorum objiciunt autoritatem, decernentium; *Infidelem esse hunc, & quovis pagano deteriorem, qui credat fieri posse, ut aliqua creatura in melius aut deterius transformetur, nisi ab ipso Creatore, qui omnia fecit, &c.* Ast verò quomodo transmutatio illa Philosophica intelligenda sit, jam dixi, ac prætereà, haud rarò contigit; ea damnata esse falsitatis à conciliis, quæ sequentibus annis verissima reperta sunt, veluti expertus est is, qui Antipodes dari dixerat.

Vel etiam Diaboli oggerunt insidias, quibus obnoxii fuerunt sæpius, qui operi huic Philosophico operā darent. Hoc vero negandum quidem non est, Diabolum hujus mundi Principē, divitiarumq; injustarū præsidem, avaris animis, haud intermissis insidiis clandestinisq; extremum exitium minitari, cum adverterit præcipuè non tam ad divini nominis gloriam testandam, sed proprios avaros oculos explendos, susceptum hunc ab hominibus laborem esse; docente hoc Apostolo *Qui volunt divites fieri, incidunt in tentationem & laqueum Diaboli, & desideria inutilia multa, quæ mergunt homines in interitum & perditionem &c, tu autem o homo Dei fuge hæc.* An verò ipsi arti per se nobilissimæ, aliquis propterea nævus imprimitur? non certè. Hic enim a condito mundo, hominib9 conditis, Diabolo mos fuit & est, hic labor, hæc invidia, ut quæ ad operum Dei pleniorē cognitionem Divinique nominis gloriam aperendam, profutura viderit, hæc quovis modo ac arte suspecta hominibus reddat; ipsis primis parentibus nostris, suo nostroq; malo, hoc ipsum expertis. Quare dictus Apostolus cupiditatem saltem divi.

divitiarum, non ipsa media, primario fine ad Dei gloriam, secundario verò ad honestas divitias ordinata, proculâ nobis esse voluit. Alia, contra hanc artem nobilissimam afferri quæ solent, cuncta certè levissima sūt, ac minimi momenti, neq; adeò digna, ut in iis labefactandis bonæ horæ malè collocentur. Præterea verò ipso philosophorum secreto, secretum majus esset, horum tenebris obvolutum intellectū, haustā semel, citrà rationem etiam sententiā, tenacissimè tenentem, neq; ultra sensus sapere cupientem, in melius transmutare; ut discussis tenebris lucem videre queant. Hoc enim solius Dei opus est. *quare & hæc de mineralium quoq; seminibus dicta sufficiant.*

Atq; adeò in triplici isto Naturæ Regno, *Animali vegetabili & Minerali*, particulas quasdam reverâ inesse demonstravimus, s. seminales Ideas, ad quarum normam s. regulam, cuilibet semini impressā, ea generatur, quæ quotidie generantur. Hæc verò, quāvis (nisi plus justo mea mihi placet causa) adeò evidentia sint, ut de illis jure nemo dubitare possit, plurimos tamen quotidie videas ea saltē

pro veris habere, quæ externis sensibus, proh! quàm fallacibus sæpe nuntiis, percipiuntur; illa verò quæ mentis oculis intueri debebant, ferè negligent contra *Scaligeri* monitum; ea *quæ longius ab externis sensibus recedunt, diviniora esse* docentis, qui adeoque his, parvam fidem habebunt, Quos tamen denuo monitos velim. Si fortè molis quandam quantitatem, vero semini hætenus tribuerunt, hanc suam mutant sententiam, firmiterq; teneant; molis quantitatem in semine, juxta omnium Philosophorum sententiam, esse tantum 2800. partem sui corporis. Quò ipsò quidem non determinatam certamq; seminis quantitatem dimensi videntur, nisi quod notare saltem significareq; voluerint, verum in generationibus semen, ab omni fere externa quantitatis mole abhorre-
re. Considera itaq; rogo te, B. L. tantillum tritici granum, in quo tantillo corpore 2800. saltem pars pro vero semine habenda est. Quis credat in tantillo, semine galli, tantam latere virtutem, quæ tot ovis fœcundandis sufficiat, ut per integrum annum fœcunda sit Gallina, quæ
semel

semel cum gallo coit? Quis credat in tantilla humani seminis particula, integram contineri omnium humani corporis partium Ideam, & tamen revera continetur? Anatomicorum namq; experi-
entiâ variâ comprobatum est, embryo-
nem nonnunquam repertum, formicæ
majoris vel pini nuclei magnitudinem
non excedentem, in quo microscopii
beneficio, observare licuit partes omnes
distinctas, ut sexûs etiam diversitas no-
tari potuerit. Cl. *Kerkringius* in utero fœ-
minæ mortuæ, molem reperit rotun-
dam, magnitudine eâ quæ est cerasi aci-
di majoris, quâ dissecta fœtum observa-
vit, quatuor quamvis dierum, perfecti
tamē hominis signaturas complectentē,

Cū adeoq; humani corporis Idea,
æquè integra sit, in tantillo embryone,
ac postea in perfectæ magnitudinis ho-
mine, quota quæso hæc pars erit seminis
communiter dicti? Incomparab: *Harve-
jus*, post fœcundum etiam coitum ma-
sculinum semē utero iterū effluere, fre-
quentissimâ caprarum sectione edocto,
docet; ita ut nullam corpoream seminis
molem in utero unquā offenderit, & ta-
men fœcundans cum Ideis seminalibus

spiritus relictus ibi fuit, nullis externis sensibus perceptibilis. De genitrice sua Cl. narrat *Tackius*, quòd in summitate pectoris, à vespa icta fuerit; ex ictu verò obscuros semper senserit dolores in longam sectam usque, ante obitum verò recrudescentibus doloribus, globulum quasi sub cute læsa volutari deprehenderit, ex hoc verò sentiendo, pruritum aliquem, acu exploratura quid ibi lateret, granum tritici extraxerit. Hoc verò citra dubium à vespa tritici granis pasta acceperat. Admiratione tamen dignum est, potuisse integri grani seminalem virtutem, adeò parva vespæ proboscide capi, atque in tantillum foramen, quale ab ejusmodi ictu esse solet, implari. Quare hæc firma stabit thesis, quâ hanc tandem circa semina præter spem prolixiorē doctrinam claudeamus: *Semina triplici Naturæ regno reverà inesse; propter molis tamen exiguitatem invisibilia esse, oculis vulgi nempe, non sapientum. Quod ne quem terreat, audiat quæso Illust. Baconem, nov.org. §. 50. ita dicentem; 'Longe maximum impedimentum, & aberratio intellectus humani, prove-*
nit

nit à stupore & incompetencia & fallaciis sensuum; ut ea quæ sensum feriant, illis quæ sensum immediatè non feriunt, licet potioribus præponderent. Itaq; contemplatio ferè desinit, cum ad spectu, adeò ut rerum invisibilibus exigua aut nulla sit observatio. Itaque omnis operatio spirituum in corporibus tangibilibus inclusorum, latet & homines fugit.

Explicatâ igitur feminum naturâ duo adhuc nobis facienda sunt & demonstranda. Primò enim ostendendæ erunt particulæ istæ, quarum appositione Ideæ nutriantur, ac molis quandam quantitatem nanciscantur, itemque visibiles fiant. Per se enim hæc omnia ipsis feminalibus Ideis non insunt, sed alimenti demum auxilio eidem accedunt. Demonstrabimus verò; unum ac Catholicum cunctorum vegetabilium, animalium, mineralium esse nutrimentum, **AQUAM** nempe *Elementalem*, in quam etiam singula corpora ultimatò reducibilia esse, ostendemus.

Deinde verò, cum Aqua Elementalís, semetipsam in tot formas transmutare non possit; neque etiam ipsæ feminales Ideæ,

Ideæ , suoptè auxilio præstare hæc possint, cùm eadem ipsæ , omnis motûs actionisque expertes sint, ac motorem quendam desiderent (sine quo steriles omninò essent) fœcundantẽ illas ac evolvendam: explicabimus motorem huncce, coagulantem Aquam in corpora, pro Idearum varietate specificè differentia, qualisq; naturæ sit, clarè ostendem⁹. Cujus veritatem invictis trademus rationibus ac Experimentis , demonstrando; quòd, quemadmodũ hujus coagulatoris beneficio, cuncta corpora materialiter, *ex aqua* nativitatem suam habent: ita eodem coagulatore separato, à corporib⁹, eadem cuncta denuò in aquam relabuntur. Quibus, ut spero, feliciter peractis, nostris circa naturalium rerum Principia meditationibus, finem imponemus.

Quod igitur primum attinet membrum, demonstremus primò locò, *vegetabilia materialiter nihil nisi aquam esse, & a, quâ enutrirì*. Ad vegetabilium quidem conservandũ vigorem, aquam non commodã tantùm sed necessariã quoq; esse, etiam illi norunt, qui extta rerũ naturalium solidam cognitionem constituti, a-

gro-

grorum curam habent. Quemadmodū enim, gratos inter solis calores quæ cadit pluvia, cunctas plantas flaccidas alioquin, mirificè reficit ac erigit; ita contra æstivo urente sole, deficiente verò aquâ pluviali, emoriuntur gramina, cunctaq; vegetabilia, propter nutrimenti defectum. Homini sano, & cujus ventriculi, singularumque partium fermenta integra sunt, si per aliquot dies cibus subtractus fuerit; tandem moriendum ipsi certò erit, propter fermentum acidum. Non aliter accidit in plantis in quibus fermentum illud *Calidum, acidum, solis filius* (de quo in subsequituris plura dicentur) quamvis integris planè viribus deprehendatur, aquæ tamen velut nutrimenti defectu emarcescunt. Cui morbo ipsi medicinam afferre solemus, quando æstivo tempore, hortulos nostros irrigamus aquâ, quò ipsò nutrimus plantas & à marcore præservamus. Sed afferamus alia hujus rei ac potiora testimonia.

Egregia certè mechanica est, quam Incompar. habet *Helmontius Compl. & mission. Elem. figm. §. 30.* quâ demonstrat, omnia vegetabilia immediatè & materialiter

liter è solo aquæ elemento prodire. Cœpit enim vas terreum, in quo posuit, terræ in clibano arefactæ libras ducentas, quam madefecit aqua pluvîâ, illique implantavit truncum salicis, ponderantem lib. 5. ac tandem exacto quinquennio, arbor inde prognata est pendens 169. libras & circiter uncias tres. Vas autem terreum, solâ aquâ pluvîâ vel destillatâ semper ut opus erat maduit. Ac ne quidem computavit pondus Foliorum quaterno autumno deciduorum. Tandem iterum siccavit terram vasis, & repertæ sunt eadem libræ ducentæ, duabus circiter unciis minus. Libræ ergò 164. *Ligni, corticum, radicum, è sola aqua surrexerunt.* Quod quidem reverâ ita esse debuit. Præter aquam enim & terram, nihil hic fuit, quod materia Salicis esse posset. Terra verò non est mutata in salicem, quia eodem planè pondere & quantitate perstitit. Quare affusa aqua fuit quæ à fermento seminis in lignum, corticem, radices, folia, mutata; tantum salici incrementum & pondus materialiter dedit.

Cui Helmontiano, omninò fere simile est

le est illud ab *Illust.* ac *Incomp.* Boyle notatum, *Chymist. scept.* p. 52. Jussit ipse, hortulanum suum convenientem bonæ terræ quantitatem effodere, & in fornace exficcare, ponderare, immittere ollæ fictili, quæ ferè æquam cum fundo haberet superficiem, eiq; selectum semen, Indicū Peponis genus, quod festinanter crescit, inferere, non nisi aqua pluvia s. fontanâ quotidie irrigandum. Neque sine delectatione incrementum plantæ, licet intempestivè confitæ; humani corporis crassitiem tum æquantis se observasse dicit. Curavit igitur effodiendam ab hortulano plantā ac ponderandam, & peponi cum pediculo & foliis, trium librarum pondus fuisse compertum est: Excoctæ Terræ uti antea, æqua planè priori quantitas deprehensa est. Hocce experimentum *subjungit Vir Illust.* æstivo tempore à se reiteratum, atque tum peponum pondus decem librarum cum semisse repertum esse, ramusculos cum radicibus habuisse quatuor libras, duabus unciis subtractis, Terram exsiccatam verò, nihil ferè de priori suo pondere amisisse. Unde
verò

verò quæso te L, B. tantum peponi pondus? annon è sola *aqua*? Si verò non; affer velim tertium quoddam præter aquam & terram, cui pondus ejus ac incrementum accepta ferri debeant. Ex nihilo enim Negativo tale quiddam generari non potuit: præter aquam verò nihil hîc fuit, quod frequenter additum consumptum fuisset. Terræ enim quantitas, imminuta non est deprehensa. Quare *Aqua* sola, fuit materialis peponis causa; ac pepo materialiter nihil aliud quàm *Aqua* ab Ideis ejus seminalibus in talem substantiam commutata.

Quæ cùm ita sint, facilè patet, quid de cæteris dicendum sit vegetabilibus. Cuncta nempe hæc, ne unico quidem excepto, *solâ aquâ* nutriuntur, & materialiter nil nisi aqua sunt. *Aqua* vero s. pluvia s. fontana in terram delapsa, juxta Celeb. *Helmontium* primò, à fermento feminis Vegetabilis, mutatur in succum *Leffas* ipsi dictum, qui proxima deinde materia plantæ est; a-
liàs indifferens *Aqua* est, ad hanc, vel aliam plantam producendam.

Sicut

Stent enim juxta se in uno solo diversi feminis plantæ, Aconitum v. g. & Lavendula; utraq; eodem nutritur alimento, *Aqua* enim pluvia in utramque cadit, neq; illa, quæ Aconitum nutrit *aqua* magis ad hoc quàm ad Lavendulam nutriendam determinata est, & contra. Idea verò seminalis singulis propria, mediante *fermento* suo, *motore*, coagulat aquam in suam naturam, adeòq; *Aqua* tum, in *aconito* letiferam vim, in *Lavendula* salutarem, humanæ vitæ virtutem acquirit, Utraq; tamen planta materialiter non nisi *aqua* est. Atque idem hoc de iis quoque, accipiendum est, quibus quotidie vescimur, *Tritico* nempe *siligine*. Horum namque semina, dum terræ matrici inferuntur, *fermenta* illorum (seu *Calidum innatum*) pluviam *aquam* coagulat, in triticum & siliginem, quæ præparata *panem* appellamus, cibum nunquàm non necessarium. Gramina item cuncta, quibus pecudes vescuntur, sola aquâ nutriri, atq; ex hoc nutrimento augmentû capere, quotidie cernimus ut nullibi lætiùs crescere videantur, quàm ubi loca sunt palustria, frequentibusq; rivulis irrigata.

Quare, & tantam pluviae observamus necessitatem & præstantiam, ut inter gravissimas propter delicta poenas, populo Judaico quas comminatus est *Deus*, non infima cenferi debeat, Pluviae defectus. Hâc enim deficiente, cunctis vegetabilibus certa mors imminet: neq; his saltem, sed & ipsis pecudibus, quæ solo gramine & aquâ nutriuntur. Quin homini ipsi intereundum esset, quod hujus nutrimentum è Vegetabilium æquè ac animalium censu depromptum sit: Ipsi ergò Vegetabilibus ac pecudibus extinctis, propter nutrimenti defectum, homo ipse extingueretur.

Ipsa verò *Animalia*, nō minùs ac Vegetabilia *aquâ nutriri* in piscibus videmus. Hi namque extra aquam non degunt; neque tamen cibum aliunde accipiunt, neq; ullum ejus rudimentum in stomachis illorum reperitur; diligenter hoc notante *ingeniosissimo Helmontio*; & nihilominùs tamen *aqua* in illis, virtute fecundorum seminum, mutatur in Osseas particulas, pingues & sanguineas etiam. Gramina cuncta materialiter nil nisi aquâ esse, jam demonstratum. Hi tamen Solis & po-
tu

tu *aqua*, enutrita *vacca*, quot habet dissimilares partes & essentialiter diversas, osseas, carneas, membranofas, pingues, lacteas, sanguineas? Quas particularum species & seminales Ideas, etsi vacca jam in prima sui formatione habuerit; nemo tamen dixerit, tantam singularum specierum molem, vaccam in principio possedisse; cum constet, nutrimenti beneficio, tantum ipsi incrementum contigisse. Jam verò nutrimentum ejus *Gramen* est, ut & *aqua*. Gramen verò ipsum mera est *aqua* materialiter, quo ipso sequitur, nutrimentum vaccae originaliter & materialiter meram *aquam* esse elementalem. *Aqua* ergò pro seminalium Idearum in singulis specie differentibus partibus Vaccae existentium diversitate, abit modò in ossa, modò in carnem; hancque, pro fermentorum seminalium diversitate variam, modò in lac, sanguinem &c. E quibus necessario sequitur, ossa vaccae, carnem, lac, sanguinem materialiter meram *aquam* esse. Neque hoc, de vacca tantum, existimandum est, sed cæteris quoq; animalibus brutis.

Quamquam enim non omnia bruta ani-

mantia, solo *gramine* vescantur & *aquis*, sed ipsi etiam animalibus, quale est Leo, Lupus: Neq; canes etiam, uti est in proverbio, *graminibus* delectentur; nec tamen desinunt *sola aqua* nutriri. Oves, quibus insidiatur Lupus, solo *gramine* ac *aquis* contentæ sunt, his nutriuntur, ex his in iis partes ac præcipuè Lac generatur, quod certè quoad materiam *Aqua* esse non desinit; atq; adeo cum agni illorum ovillo lacte enutriantur, usque dum *gramina* concoquere valeant, non minùs *aqua* nutriuntur, quàm cum majores facti *graminibus* vescuntur. Quare omninò dicendum est, & ipsam ovillarum *carnium, ossium, membranarum, lactis, sanguinis, cæterarumq; partium omnium substantiam*, materialiter meram *Aquam* esse. Hisce ergò si nutritur Lupus, certè *Aqua* nutritur, & ipse materialiter *aqua* erit. Ex iis enim constamus quibus nutri-
mur. Parratio est in Canibus. Ossa enim quibus nutriuntur, reverà aqua sunt, uti jam Vaccarum exemplo ac ovium demonstratum est; quanquam & aliis carnibus aqua tamè & *gramine* enutritis vescan-

ſcantur, unde & canes ipſos materialiter aquam eſſe neceſſarium eſt.

Quæ cum ita ſint, quid de *homine ipſo* dicendum erit? Veſciſtur hic, & nutritur cibus è Vegetabilium ordine ac animalium depromptis, & in pluribus locis ſolius aquæ poſitum ſedat: Triticum & ſiligo panem ipſi præbent, cibum proſectò ad vitam noſtram ſuſtentandam adeò convenientem, ut ſi ſolus hic, ac puræ *aquæ elementalis* copia, per omnem vitam cuiſpiam ſuppetat, nullam ex fame, mortis neceſſitatem metuendam habent, quin propter ſimplicem eiſmodi victum, vitam fruiturus ſit, non tot corporis animique morbis obnoxia, ſed citra ægri tudinem (ſi Deo ita viſum fuerit) definitum à Deo vitæ terminum, hilari animo expectare poſſit, quem pauci palatò indulgentes attingunt. Neque tamen corpus noſtrum deſtitueretur, particulis carnoſis, oſſeis, cæterisque, quamvis animalium carnibus non veſceremur. Triticum verò & ſiliginem ſolâ *aquâ* nutrirî & conſtare materialiter, in præcedentibus dictum eſt. Panis ergò ex his factus, *aqua* erit materialiter, qui in homine pro

ventriculorum ac seminum in iis delitescentium diversitate; variarum partium formam accipiet, non quod aqua esse definat; sed quod singularum humani corporis partium *fermenta* (*motor, Calidum*) per *semina*, scenam suam sub uno isto *aqua elemento* lusura sint: Atque adeò homo ipse quantus est, materialiter tamen nil nisi aqua futurus sit.

Præter panem verò; & carnibus animalium vescitur homo, quæcunq; tamen illa tandem sint, Vegetabilibus tamen nutrita fuerunt, gramine; cujus quæ natura sit, jam dictum.

Nutrit verò *Aqua* cuncta nutrienda duplici ratione; vel *Immediatè* vel *mediatè*; *Immediatè* aquâ nutriri diximus cuncta, *Vegetabilia*, uti & *Mineralia*, de quibus in seq. Item *Pisces*, quod quidem clarè satis explicatum arbitror. *Mediatè* illa nutriuntur animalia terrestria. Antequam enim his dare alimentum commodum, posset, graminis formã accepit, veletiam in alius animalis substantiam jam transformata est.

Panis igitur (quod non possum non hîc monere, antequam ad *Mineralia* progrediar)

diar) non nutrit nos eo, quò *Paracelsus* falsissime opinatus est modo; ac si in illo, potentia quædam delitesceret particularis, ordinata & determinata, ad carnem generandam, etiam extra animalia constituto. Minimè gentium. Ita verò docet idem. *Panem frumenti, si sub fimo equino calido, quis posuerit, per 9. vel 10. dies, generatum inde iri carnem commixtam sanguini,* quod ipsum anili certè fabulæ affinius, quàm verò experimento videtur; quæ nonnisi è seminalium virtutum proficisci potuit ignorantia. Seminalium enim Idearum rationes, qui mediocriter saltem calluerit, facilè fatebitur, vim illam commutandi alimentum in substantiam humanæ carnis, non in alimento, utpote, materiali causa, cujus per se ac propriè nulla activa potentia est, positam esse; sed in ipsis partibus hominis nutriendis sedem suam habere. Quod ipsum ex antecedentibus, de Natura seminis quæ dicta sunt, obscurum esse non potest; atque adeò firma ista stat sententia; id ipsum, quod ex pane nos nutrit, non magis in se, continere potentiam ad carnis generationem determinatam, quàm ad ossis cæte-

rarumq; partium, sed esse indifferens ad cunctas nutriendas; determinari verò, à femine cuius parti proprio, ac præterea nil nisi larvatam aquam esse.

Mineralia verò quod attinet, non levia certè sunt testimonia, quæ demonstrant, & hæc non minùs ac *Vegetabilia* & *Animalia* ex aquis nata esse. Incomparabilis certè *Helmontius* tit. *de Elem.* ita inquit. *In terra fracescens aqua, semen locale vel insitum acquirit, idèq; vel in liquorem* (Leffas) *ad omnem plantam; vel in succum* (Bur) *mineralem transit, juxta species per directionem seminum electas.* Cujus sensus breviter hic est, quòd aqua pro fermentorum feminumq; diversitate, in diversa specie corpora coaguletur; à *Vegetabili* femine in succum *Leffas* dictum, proximam eundorum *Vegetabilium* materiam; à *Minerali* in *Bur*, Metallorum materiam proximam. *Bur* igitur hocce, cum è sententià *ingeniosiss. Viri*, Aquæ productum, materia sit metallorum, sequetur omninò; & ipsa metalla prima generationis suæ principia materialia, aquæ debere. *Bur* verò hocce, idem laudatiss. *Helmontius* alio in loco *Magnò oportet nempe* §

39 clarius explicat, quando dicit. Non r-
rò nempe contingit, ut Metallario in fodinis sa-
xa diffringente, dehiscat paries & rimam det,
unde tantillum aquæ subalbida virescentis
manavit, quod mox concrevit instar saponis
liquidi (Bur voco) mutatoq; deinceps pallo-
re subviridi, flavescit vel albescit, vel satura-
tius viridescit.

Aliàs proxima Metallorum materia,
Mercurius dicitur, *Mercurius* autem reve-
ra nihil aliud videtur esse, quam *Aqua*,
Elementalis, virtute *Sulphuris* cuiusdam
metallici & arsenicalis, coagulata in ta-
lem aquam, quæ manus non madefacit:
quæ *Sulphurum* variorum auxiliò ulte-
rius coagulatur in *Antimonium*, metal-
laq; varia, quorum tamen materialis cau-
sa prima, mera est *aqua* Elementalis. Ne-
que novum est iis, qui metallorum mate-
riam, cupiculos terræ sollicitè perrepen-
do, observarunt aquam, in calcem fixi &
boni argenti coagulabilem. Cuius testi-
moniū quoddā in illustre *Boyl. Chym. scept.*
exstare memini. E Tagi verò ac Rheni
fluviorum arenis, reverà aurum elici; non
est ignotū; neq; metallorum reperiuntur
mineræ absq; magno aquarum confluxu.

Neque *Lapides* aliud præter *Aquam* nutrimentum habent. Hinc nullibi major arenarum quantitas quàm juxta maris fluviorumq; littora & ripas. Lapidēs verò, ex arenularum congerie compacta corpora sunt, de quibus in initio discursus hujus; Quòd testimoniò gravissimi Philosophi, in aquam reducibiles sint, dictum est, quæ adeoq; hîc nolim repetere, cum crambe bis cocta mors sit. Quare & *Rupium*, terrarumq; cunctarum, nulla præter *aquam* materialis causa alia est.

Quamvis ergò ex dictis obscurum esse non possit, tam *Mineralia* quàm *Animalia* & *Vegetabilia* ex aqua primitùs nasci, variis immutata Idearum seminalium fermentis; magnam tamen lucem his ipsis conferet, si demonstraverimus; *cuncta hæc corpora ultimatò in aquam esse reducibilia*.

Incomparabilis certè Helmontius Tract. de El. § II. &c. aliisq; in locis docet; omne *saxum*, *lapidem gemmam*, *Marcasiam* &c. *transmutari posse in salem actualem*, æqui ponderantem suo corpori, qui tandem in aquam insipidam transeat. Cui fidem, ut quis habeat, in principio circa
aquam

aquam monuimus, neminem cogi posse. Illustr. certè *Boyleus* propter incredibilem experimentorum *Helmontii* veracitatem non temere ipsi denegandam judicat. Metallicorum item corporum, materialem causam ipsum *Mercurium*, vulgi esse, in antecedentibus diximus, quod ipsa salibus suis coagulativis orbatæ, in *Mercurium* denuò resolvantur. Cujus egregium quoddam experimentum non ita pridem demonstravit *Clar. Langelottus* ex Antimonio, & quidem *Regulo* ejus: Rei possibilitatem, rationibus ac causis operationis adductis, confirmavimus in fine *Epist. ad Clar. D. Langelottum*. Quare si cætera quoq; metalla, in *Mercurios* suos redacta fuerint, separatis sulphuribus, atque iidem *Mercurii* per residuorum adhuc Sulphurum sequestrationem in *aquam* redigantur, habemus quod quærimus. Et certè ipsum *Mercurium* in *aquam* resolvi posse, celebrium Philosophorum experimenta ac testimonia dubitare nos non sinunt. Neque ignoti mihi sunt amici qui aurum ipsum in *Mercurium* possunt redigere per *Mercurium*, seu *Lato-*
nem

nam flavum albefacere, quibus tamen omnibus quantum cuiq; placebit adhibere fidei; cuiq; integrum esto, neq; cum ullo super hac re digladiari animus est.

Sulphura itaque Mineralium omnia, si accendantur, in spiritum abeunt acidissimum, quia ab Alcalibus fixis s. alcalificatis salis Tartari abstracti, omni possunt aciditate ita exui, ut præter Elementalem *aquam* nihil relinquatur. Ipsum verò Alcalisatum sal, quod Acidum salem in se absorpsit, crebrius per deliquium solutū, & phlegmaticā parte, aliquot vicibus separata, tandem omninò in puram aquam Elementalem convertitur: quod ipsum de cunctis, uti dixi, Mineralium *Sulphuribus* intelligendum est.

Silices quoq; in liquorem resolvi posse, in principio & quidem § de *Terra* diximus. *Calx* item *viva* salia habet, per deliquium quæ solvi possunt, & in aquam resolvi.

Animalia quoque, quemadmodum ex *aqua* tanquam prima materiali causa, ortum suum traxisse, in antecessoribus demonstratum est; ita quoque eadem in aquam denuò convertibilia esse ultimatò ostend-

ostendendum erit. Mortua quidem animalia, quando putredinem concipere observantur, in aquosam resolvuntur materiam, quâ etiam ferè diffluunt. Notatu dignum tamen experimentum *Helmontii* est de *Formarum ortu* § 54. quo Lunæ tribuit, singularem illam vim de mortua animalium corpora in aquosam mucilaginem resolvendi. *Rana enim dicit, si sub plenilunio atrocissimo hyemis borea effodiat, abluatur, & baculo alligetur in agro, sequenti manè reperitur alba quadam & transparens mucilago, liquatum Tragacanthum referens, & figuram rane.* Idem affirmat § 54. de homine ac bruto de mortuis; hac si una saltem nocte per noctârunt (dicit) sub Luna, sequenti manè cadaver putrilagine diffluet, quò ipsò patet; animalia postquam ex aqua, corporis sui nutrimentum nata sunt; adeoque materialiter nil præter aquam sunt, retrogradâ tandem viâ in eandem remigrare. Aquarum cæteroquin non parvam copiam in animalibus existere, vel inde observare licet, quod illorum partes, citra aquarum additionem si Igni expositæ fuerint, in proprio succo sufficienter bulliant. In quo succo, reverà particu-

ticulæ quædam sunt meræ aqueæ, ad quas demonstrandas, sola pinguium seu oleosarum partium separatio requiritur facillima. *Aqueæ* verò particulæ ideò saltem *formaliter* superstites sunt, quòd ab Ideis feminalibus nondum determinatæ sunt, ad certam partem. Excell. *Helmox* phlegma hocce, prout etiam in vegetabilibus, *Mecuriale* partem vocat, nondum à semine maturatam. Oleosæ verò ac pingues particulæ, arte in merâ aquam priorî similem reducibiles sunt. Quod si enim cum sale conjungantur Alcalifato, cum illo in saponem abeunt, & destillata phlegmatica prodeunt: aliquoties verò ab ejusmodi alcalifato sale abstractæ in meram abeunt *aquam* Elementalem. Quod ipsum de omnibus animalium pinguedinibus notandum est; quòd crebrâ circulatione cum sale Tartari in aquam convertantur.

Spiritus verò ille Urinosus, è sanguine animalium qui etiam impetrari potest, in antecedentibus dictum est, quòd naturâ suâ sit Sal quoddam volatile in phlegmate resolutum. Jam verò, ex ejusmodi Urinosi Salis Volatilis cum acidis

acidis particulis colliquatione, Alcalifat-
tum Sal fixum prodire, pluribus experi-
mentis demonstratum est. Quòd Alca-
lisatum Sal facilè p. d. & tandem *in a-*
quam Elementalem resolvitur; quò ipso
sequetur; & ipsum *Sal Volatile*, materiam
Alcalisati salis, simul revera in aquam
convèrti. Alioquin Urinosum hocce
Sal, evidenter satis è Sale Tartari sepa-
rari potest, uti notum est; Non sepa-
ratum verò, cum illo abit in aquam Ele-
mentalem: atque adeò ipsi etiam Uri-
nosi animalium spiritus, seu Salia Volati-
lia essentialiter à Vegetabilibus non dif-
ferentia, eodem modo in aquam redigi
possunt. Evidens quoque testimoni-
um est, è fuligine vegetabilium quod pe-
ti potest. In hac ingens satis deprehen-
ditur Urinosorum salium copia, ut etiam
Sal Ammoniacum, ope spiritus Salis, ex
ea parari possit; calcinata tamen hæc, in
Sal fixum abit, ac tandem *aquam* Ele-
mentalem.

Quæ cum ita sint, *Sanguis, Urina, Sudor,*
&c. cuncta in *aquam reducibilia* sunt.
Neq; aliter se res habet in solidis substan-
tiis.

tiis. Ex his quæ eliciuntur cuncta, vel insipida sunt adeòq; *aquea*; vel sapida s. *salina* & quidem vel volatilia *Alcalia*; vel *acida* pingua &c. cuncta materialiter nil nisi aqua. *Terrea* verò partes, è calcinationis durioribus partibus, ossibus v. g. residuæ, teste fide dign. *Helmontio*, in aquam non minùs reduci possunt, beneficio liquoris *Alkahesti*.

Ipsa tandem *Vegetabilia*, quemadmodum solâ aquâ nutriuntur, adeòq; materialiter nihil aliud sunt quàm *aqua*; ita & *in eandem* reduci possunt ultimatò. Partes enim præcipuæ, in quas *vegetabilia*, Ignis artisq; ope dividi possunt, sunt *spiritus vini, Oleum, Sal fixum, Volatile, Tartarus*. Tartarus herbarum, in succis earundem delitescens, calcinatus, in salabit alkalifatam; Hoc vetò Alcalifatam, si Aëri expositum fuerit, p. d. solvitur. Liquorem huncce Tartari, Retortæ inditum, si destillaveris, phlegma quidem seu *aquam* impetrabis sale in fundo relicto, quem de novo si p. d. fluere permiseris, novam phlegmatis partem accipies, quod reiterari toties poterit, donec totum sal alkalifatam, in meram *aquam* elementalem con-

cōversum fuerit, quam immeritò à *Zwelffero* pro Sale Tartari Volatili haberi, in præcedentibus demonstravimus.

Olea verò *Vegetabilium*, si cum Alcalibus fixis conjuncta fuerint, abeunt cum iisdem in saponem, ac si tandem crebriùs abstracta fuerint, in meram resolvuntur *aqua* elementalem. Quod ipsum de *spiritibus* omnibus verum est. Cum enim hi formaliter in Vegetabili non præexisterint: sed *Olea* saltem sint, beneficio fermentationis in phlegmate resoluta (uti in antecedentibus ostensum est) eâdem cum Oleis conditione gaudent.

Quare spiritus Vini, quamvis rectificatissimus fuerit, ut in ejus accensione, ne tantillum quidem phlegmatis relinquitur, quod pyrium pulverem contra Ignis vim defendere possit, nihilominùs tamen, si semel saltem à Sale Tartari abstractus fuerit, phlegmaticus factus deprehenditur, seminali acido in Sale Tartari relicto: quod ipsum si sæpiùs reiteratum fuerit, in puram tantummodò *aquam*, spiritum Vini resolutum videbi-

T

mus:

mus: Sal Tartari verò relictum, si Aëri expositum fuerit, solvetur tandem p. d. in puram *aquam* Elementalem.

Salia *Vegetabilium Volatilia*, cum materia sint Alcalisati salis; hoc verò in *aquam* elementalem ultimatò resolvable, & ipsa necessariò in *aquam* converti poterunt.

Atque adeò nihil est in triplici *Animalium Vegetabilium & Mineralium* Regno, quod non ex *aqua* natum, & in *aquam* ultimatò reducibile sit. Unde firma stabit hæc & in concussa sententia, *Aquam elementalem, materiale cunctorum sublunarium & ceterorum esse principium.* Nititur hæc sententia divinâ autoritate. *Moses* enim sacer Philosophus, Vniversi hujus Creationem & productionem narraturus, ita inquit *Spiritus Dei ferebatur super aquas:* & postea pergit recensere integrum rerum Creatarum ordinem, *Aquâ* tanquam materiali cunctorum causa, & *Spiritu Dei* formante corpora varia specieq; diversa, ex *aquâ* juxta seminũ eidem inierforum præsuppositis. De quò incubante aquis *Spiritu* in subsecuris pluribus.

Atq;

Atq; hanc divini Philosophi circa Naturaliũ rerum principia, sententiam secuti sunt postea plurimi. Ita enim *Hermes Trismegistus* in *Pimandro*; Erant tenebræ infinitæ in abyſſo, & aqua, & ſpiritus tenuis intelligibilis. *Hesiodus* docuit primum omniũ fuiſſe *Chaos*, tum ampliſſimam tellurem extitiſſe. Quod certè *Chaos* *Hesiodi*, graviſſimorũ virorum iudicio, nil niſi aqua fuit, è quã primo *Limus*, & deinde ſolida terra ortum traxit. *Homerus*, *Oceanum* & *Thetis* primos facit Deorum parentes, & Deos inducit jurantes per aquam ſtygiam, quaſi per rem omniũ vetuſtiſſimam & honoratiſſimam.

Thales quoq; , primus Philoſophorum in Græcia, aquam dixit rerum omniũ principium, docente hoc *Seneca* Natural. Quæſt. 13. l. 3. his verbis. *Aqua ait Thales valentiſſimum elementum eſt, hoc fuiſſe primum putat, ex hoc ſurrexiſſe omnia.*

Neq; docere voluerunt aliud Majores noſtri veteres illi admodum & Antiqui fabula iſta de *Proteo*. Huncce enim *Proteum* narrant Poëtæ *Neptuno paſtorem* fuiſſe, eundemq; *Senem* & *vatem*. *Vatem* ſc: præ-

stantissimum & veluti Ter. Maximum. Noverat enim non *futura* solummodo, sed *præterita* & *præsentia*, adeò, ut præter divinationem, etiam omnis *Antiquitatis* & omnium *secretorum* Nuncius atque interpret esset. Morabatur autem sub *ingenti specie* ibi ei mos erat sub meridiem gregem suum *Phocarum* numerare, atq; deinde somno sedare. Qui autem opera ejus in aliqua re uti volebat; is non alio modo apud eum valere poterat, nisi eum manicis comprehensum *vinculis constringeret*. Ille contra ut se liberaret in omnes *formas* atque rerum miracula, *Ignem*, *Plantam*, *feras*, se convertere solebat, donec tandem in *pristinam formam* restitueretur. Egregia profectò fabula ad significandum; *aquam cunctarum visibilium rerum principium esse materiale* nempe. *Protei* enim *persona*, *aqua* significatur, omnium rerum post D E U M antiquissima. In Historia enim creationis mundi, sacer Philosophus & Historicus, post D E U M, æternum, Efficientem mundi causam, *aquarum* meminit, super quas spiritus Dei ferebatur. *Neptuni* *mancipi-*

um dicitur Proteus; aquarum enim præfidem & Dominum Neptunum fingebant Poëtæ. Ingens *specus*, est cælum. *Pecus* sive Grex *Protei* nihil videntur aliud, quam *Animalium*, *Plantarum*, & *Metallicorum species*, quorum materiale causam, solam *aquam* esse, sufficienter satis in antecedentibus demonstratum est. *Protei* verò operâ, nemo uti poterat, nisi *vinculis ante constrictus* fuisset; hoc est, non convertetur aqua in diversas species, nisi Spiritus quidâm adfuerit universi, coagulans ipsam juxta seminalium Idearum diversitatem in corpora specie diversa (de quo spiritu in subsequendis) Quibus speciebus absolutis, sub *meridiem* nempe, quando altius pergi non potest, *somno* se dat *Proteus* seu quiescit, donec tandem in *pristinam formam* reducatur, hoc est, corpora ex *aqua* formata, in *eandem* de novo resolvantur, quod in antecedentibus sufficienter quoque à nobis præstitum arbitramur.

Quare nunc tandem, non Experimentis saltem manifestissimis, ostendimus, particulas illas sive alimentum

Ideis seminalibus appositas, quantitatēque molis quandam ipsis largientes, meram *aquam* esse; sed autoritate, etiam Divinā hanc sententiam niti, ex *Mose* sapientissimo Philosopho attulimus. Neque Antiquos Philosophos (forte ex *MOSE* edoctos) *Hermetem*, *Hesiodum*, *Homerum*, *Thaletem*, &c. aliter sensisse; neque *Poëtarum*, veterum fabularum involucris; sententiam aliam reconditam fuisse, luculenter demonstravimus. Quibus tam Divinis quàm humanis testimoniis, ipsisque sensibus, si quis assensum præbere dubitet, cum hoc non frustra litigabimus; qui enim tot Experimentis, gravissimisque testimoniis se moveri passus non fuerit, hunc certè nihil movebit; aut enim Ratio ipsum deficiet, aut pertinax quoddam impiumque contradicendi studium vexabit.

Ultimum igitur hoc restat unicum; ut demonstremus, virtutem illam, coagulantem aquam, in solida corpora, & applicantem Ideis seminalibus,

ina-

in antecedentibus demonstratis. Cujus realem existentiam, ortum, vires, determinationem docebimus.

Quemadmodum verò, præter experimenta, antiquorum Philosophorum ac præipue Mosis autoritate, usi sumus ad ostendendū; *aquam* cunctarum rerum materiale principium esse; ita non incongruè nos facturos confidimus, si breviter ostenderimus; unanimem hunc præcipuorum Philosophorum antiquorum consensum fuisse, dari *Spiritum* quendam cuncta procreantem (DEUM verò tanquam cunctarum causarum primam hic semper præsupponimus) quo mediante cuncta vivant & conserventur, cujus item auxilio aqua coaguletur in solida corpora pro seminum varietate varia.

Hermetem Trismegistum, præter aquam, Spiritus quoque cujusdam tenuis intelligibilis meminisse in antecedentibus jam monuimus. *Anaxagoras* censuit omnia fuisse prius confusa & indigesta, deinde accessisse *mentem* quæ ea distinguendo & separando mundum effecit.

cit. *Homerus* præter *Oceanum* seu *Aquam Thetin* quoque sive *Cœlum*, primos *Deorum* parentes faciebat. *Stoici* asseriebant omnia quæ sunt in mundo, uno *Divino Spiritu* procreari, regi atque contineri; quod idem *Virgilius* elegantissimis hisce versibus expressit:

Principio Cœlum, ac terras camposque liquentes

Lucentemque globum Lunæ Titaniaque astra,

Spiritus intus alit: totamque infusa per artus

Mens agitat molem, & magno se corpore miscet.

Hunc fortè *Spiritum* intelligendo *Hesiodus*, *Amorem* docuit mundi esse principium, quem eundem *Plato* *Animam* mundi vocavit. *Gentiles* ut est apud *Plutarchum*, *Spiritum* quendam esse universi, *Igneum*, non habentem formam, in quamcunque tamen se voluerit transmutantem (de quo etiam *Zoroaster* & *Heracitus* loquentes, omnia ab

ab unico igne genita esse docebant, contenderant. Hinc etiam *Orpheus*, cœlum medium Spiritus hujus ignei lumine illuminatum *Ætherem*. Dixit, quasi *Æthaërem*, seu ardentem Igneumque Spiritum) Præter hæc verò, notatu dignissima est, ac jucundissima pariter fabula illa veterum Philosophorum de *Cupidine* excogitata, quâ certè, uti solent fabularum involucris, ardua rerum naturalium mysteria tegere ne vulgo ac indignis pateant; maximum circa Naturæ incunabula rerumque principia, secretum tacitè docuerunt; quod breviter non pigebit explicare; monendus tamen antea S. B. L. per *Cupidinem* hoc loco non esse intelligendum juniorem illum, *Veneris* filium, Deorum natu minimum, sed majorem quendam, ante constitutas species existentem. Fabula ipsa sequenti modo se habet.

Narrant sapientissimi majores nostri, *Amorem* omnium Deorum fuisse antiquissimum, atque adeò omnium rerum; excepto *Chao*, quod ei coævum perhibetur. *Chaos* verò à priscis etiam *Cælum*

appellatur, nunquam tamen Divino honore aut DEI nomine insignitum reperitur. Atque *Amor* iste prorsus sine parente introducitur; Ipse autem cum Cœlo vel *Chao* mixtus, & Deos & res universas progenit, A, nonnullis tamen, ovo prognatus, incubante *Nocte* traditus est. Ejus autem attributa ponuntur; ut sit *infans perpetuus, cæcus, Nudus, Alatus, Sagittarius*. Vis autem ejus præcipua & propria, ad corpora unienda valet, etiam claves *Ætheris, Maris, & Terræ* ei deferre bantur. Ita narrant Philosophi Antiqui, sequentia est modo se intellectos volunt. Per *Amorem* intellexerunt *spiritum* quendam universi, Mundi principium; affirmante idem *Hesiodo*, uti in proximè præcedentibus diximus, ita dictum, quod Spiritui huic insatiabilis appetitus insit, innumeris formis seu seminalibus Ideis se conjungendi, juxtaque illarum differentias específicas, indifferens cæteroquin alimentum, Elementalem *aquam* coagulandi. *Sine parente* hic introducitur; quod ipsum significat; nullam prorsus Spiritus hujus esse causam naturalem, cum

cùm naturalibus causis aut rebus omnibus prior sit. (*DEUM* verò tanquam causam omnium primam & *Naturam naturantem* semper hic excipimus) unde omnium rerum antiquissimus habebatur. excepto *Chao* quod ei coævum perhibebatur, hoc est, *aqua* excepta; hæc enim universi hujus spiritus coæva extitit, docente ita sancto Philosopho statim in principio, ubi ante rerum creationem *spiritus & aquarum* meminit, dicens: *Spiritus DEI, ferebatur super aquas*. Ipse autem cum *Chao* mistus res universas progenuit, id est, Aqua hujus coagulatrix spiritus beneficio, juxta seminum signaturas in omnis generis corpora, *Vegetabilia, Animalia, Mineralia* coagulata est, quod ipsum ex antecedentibus aliquomodo constare potest, ubi seminum signaturas seu Ideas fusè demonstravimus, ostendimusque componendo ac resolvendo res naturales; cunctarum materialem causam aquam, esse. Coagulatorem denique

Spiri-

Spiritum explicandi, hic auspicati sumus initium. *Nocte tamen incubante ovo* natus *Cupido* dicitur. Non enim seu *tenebrae* rerum creationem præcesserunt. Ita enim *Moses*: *Tenebrae erant super faciem abyssi*; & deinde addit: & *Spiritus Dei*, ferebatur super aquas. Repetit hoc *Hermes* item ac præter hos *Thales Milesius*; hic enim interrogatus; utra prior fuisset nox aut dies? respondit; priorem fuisse *Noctem*.

Est verò *infans perpetuus* seu pusillus, *Cupido*. Universi enim iste *spiritus*, particulis constat valde minutis, non adeò grandi corporis mole, qualis ætate provectis competit præditis. *Cæcus* est, spiritus enim dictus, non habet formarum delectum, cui potissimum se conjungi malit, sed cæcorum moreruit in cuncta obvia. Ita in *Vegetabilia*, *Animalia* & *Mineralia* horumque semina, citra providentiam influit, movens cuncta ac explicans.

Nudus est; Neque enim *Vegetabilium*, *Animalium* aut *Mineralium* fe-

semina in illa latent; sed tùm quando vefcitur demùm, & corpus affumit, coagulatus, ad normam feminalium Idearum, in varia corpora. Hinc est, quod aliquibus *informis* dictus fit hic spiritus; & tamen *Omniformis*. *Informis* quidem quod actu nullam formam habeat; *Omniformis* autem, quod indifferens fit & aptus, ad omnis generis formas, quiescentes cæteroquin & steriles, movendas & fœcundandas. *Alatus*; velox enim est iste spiritus, & celerrimè per aëra, alis quasi ac pennis portatus, in hæc sublunaria ac inferiora defertur. *Sagittarius* tandem; quia, virtute sua in distans agere cernitur; quemadmodum, qui sagittam in distantia loca emittunt.

Hæc erat Gentilium Philosophorum circa *universi spiritum*, cunctorum seminum motorem, & fœcundatorem sententia, quem cum *Chao* mistum cunctorum naturalium rerum efficientem causam Physicam dicebant. *Moses*

ses tamen ab ipso universi Creatore ita edoctus, expressis verbis exsertoque digito hunc spiritum ostendit, dicens: *Spiritus Dei ferebatur super aquas.*

Per hunc *Spiritum*, quid potissimum intellectum velit *sacer Philosophus* diversissimæ sane sunt Doctissimorum virorum sententiæ, quas ad tria potissimum capita, *Doctissimus* redegit *Pererius Comm.* in 1. *Cap. Gen.* § 60. & seq. *Prima* erat *Tertulliani*; hic enim in libro, quem scripsit adversus *Hermogenem*, contendit, per spiritum Domini hoc loco non Deum, sed *ventum* significari. Quæ interpretatio maximè probatur *Theodoreto*, qui in quæstione 8. super Genesin putat, *Mosen* his verbis significasse, Elementum *aëris* sicut tradiderat Elementum *Terra & Aqua*, Illud autem *Ferebatur*, ait; *demonstrare mobilitatem & agitationem naturalem ipsius Aëris seu venti vel naturalem Aëris situm, qui est, undique supereminere aquis, ipsas circumdando.*

Altera interpretatio est fermè omnium *Patrum* tam *Græcorum* quam *Latinarum*, per Spiritum *DEI* hoc loco, vel
solum

solum, vel præcipuè ac principaliter significari *Spiritum sanctum*. Tertia interpretatio est, per Spiritum Domini significari non Ventum, nec Spiritum sanctum sed vim & impetum, & efficaciam quandam vitalem, & fecunditatis plenam, aquis impressam, à DEO. Ita sentit Chrysostomus homil. 3. in Genesin. Augustinus autem in libr. super Genesin imperfecto c. 4. ait; per Spiritum Dei tria posse intelligi; vel Spiritum Sanctum, vel ventum sive Aërem, vel vitalem quandam creaturam, qua universus orbis visibilis movetur atque continetur. Hæc cum recensuisset supra laudatus. Pererius, lectoris quidem arbitrio existimandum relinquit, in cuius sententiam descendere malit; neque tamen primam & tertiam, secundum sensum literalem; secundam verò secundum sensum mysticum, maximè sibi probari diffitetur.

Neque verò necessarium esse, ut per Spiritum Domini semper intelligatur Spiritus Sanctus sive Ipse DEUS, Trinitatis Persona, quam plurima sacra,
Scri-

Scripturæ loca ostendunt. Quando enim *David*, Psalm. 147. dicit: Flabit *Spiritus* ejus (*Domini* nempe) & fluent aquæ; nemo profectò dixerit; Spiritum Sanctum dicto loco intelligendum esse. Frigore enim congelatæ aquæ immediatè non à D.F.O. sed Solis calore deliquantur & diffluunt. *Esaias* cap. 40. vers. 7. ita habet: Exsiccatum est fœnum, & cecidit flos, quia *Spiritus Domini* iussit in eo. Ubi *Spiritus* ille *Domini*; nullâ ratione accipiendus erit, pro Trinitatis Persona sed vento potiùs. In his ac pluribus aliis Scripturæ dictis, cum *Spiritus Domini*, usurpetur; aut pro vento, aut vitali quodam robore, rebus certis creatis, quid impediet, quominus locum illum *Genesios* cap. 1. vers. 2. cum *Chrysostomo* & *Augustino* intelligere liceat de vi & impetu & efficacia quadam, vitali ac fecundante aquis impressa? præcipuè quidem, cum manifestissimis pateat Experimentis; ejusmodi vitalem vim, Elementalem aquam coagulantem, hodiernum etiam

&

& in hunc usque diem reverà existere. Tum verò tantò potiori jure hoc licebit, quod *Moses* primo illo capite *Geneseos* historicè referat, Mundi, rerumque naturalium creationem, neque figuratò locutionis genere, quale in Canticò Canticorum est, utatur, sed res gestas saltem referat; unde nullà *necessitas*, quare Spiritus ille Domini, pro ipsà Dei Persona accipi debeat. An non verò mystico sensu, pro Spiritu Sancto piè satis accipi possit; nullum quidem inter Theologos est dubium: modo qui ita sentiunt, non mordicùs ac præfractè ita eam contendunt Scripturæ esse propriam, ut aliam quamlibet, suæ, vel adversam vel diversam, contendunt Scripturæ esse contrariam. Malè enim de Scriptura merentur certè (judicium est Doctissimi *Pererii*) qui loca, salvâ Christianâ fide, variarum sententiarum ac interpretationum capacia, ad suæ opinionis & ingenii angustias coarctare volunt, sæpiusq; dimicant obstinatè pro sua potiùs, quàm Scripturæ sententiâ, cum tamen monente Div. *Augustino* c. 18. l. 1. in *Genesin*; *non tam eam, quæ nostra est,*

quàm qua Scripturarum esse comperta fuerit, nostram esse velle debeamus. Quemadmodum enim, docente eodem *Augustino*, si ratio contra Divinarum scripturarum auctoritatem redditur, quantumlibet acuta sit, fallitur verisimilitudine, nam vera esse non potest. Ita manifestæ certæque rationi, si velut sacrarum literarum opponitur auctoritas, non intelligit, qui hoc facit: & non Scripturæ sensum, ad quem penetrare non potuit, sed suum potius objicit veritati, nec quod in ea, sed quod in se ipso, velut pro ea invenit, opponit. Et in hoc certè cunctis elaborandum, circa Mosis historiam creationis occupatis, non Theologis minùs quàm Philosophis est, ut nihil constanter sentiant dicantve, quod repugnet manifestis Experimentis & Rationibus Philosophiæ vel aliarum disciplinarum. *Vero enim verum semper congruit*, nec potest veritas sacrarum literarum veris rationibus & Experimentis Naturalis Philosophiæ (cujus ipse Deus non minus autor est) esse contraria. Quare & idem *Augustinus* autor nobis est, ut quicquid sapien-

sapientes hujus mundi, veraciter de natura rerum demonstrare potuerint, ostendamus: sacris literis non esse contrarium. Quod certè, si in loco ullo, sacrarumq; literarum explicatione observandum, in primi capituli *Geneseos* interpretatione, nullâ ratione negligendum est. Est enim hocce *primum Geneseos Caput*, omnis naturalium rerum cognitionis fundamentum, è quo unico capite totius sapientiæ Divinæ pariter ac humanæ, primordia & origines rectè depromuntur. *Rabbini* ipsi in c. i. *Geneseos* Mosaicæ, plus agnoscunt mysteriorum Naturalium, quàm in omni barbarica Philosophiâ, tantùm subtilitatis, ut nemini suorum ante annum ætatis trigesimum lectionem ejus temerè judicent indulgendam. Cùm enim Dei Creatoris omnipotentiam, Sapientiam, bonitatemque immensam, non meliùs possimus cognoscere, quàm ex iis operibus, quæ ipse, bonitatis suæ, Sapientiæ, omnipotentiae testimonia esse voluit; ita quoq; Divinorum operum nullam certiore habere poterimus cognitionem, quàm ex iis ipsis verbis, quibus creationis historiam ipse DEUS à *Mosè* con-

signari voluit : Atq; adeò , in pietatem Christianam peccare videntur illi , qui rerum Origines & causas , ex putidis Gentilium lacunis , vel proprii cerebri labyrintho haurire malint , quàm limpidissimâ illâ *Mosis* , *Prophetarum* ac *Psal-morum* , ac præcipuè etiam *Hiobi* scaturigine , (quem librum sunt , qui *Mosen* scripsisse velint) Quam , nos voluptatem , ipsis libenter absq; invidia ulla relin-quimus , si modo honesta quædam voluptas , animum explens dicenda est. Tutissimâ certè viâ , ingredi videntur illi , qui manifestissimis instructi & *rationibus* & *Ex-perimentis* , sententiæ suæ veritatem in ipsa Creationis Historia radicatam esse , ostendere possunt. Sed ad rem ipsam accingamur , & cùm invictissimis *Expe-rimentis* ac *rationibus* verissimum sit ; dari quendam *Universi Spiritum* , cuncta Semina moventem & fœcundan-tem , & Aquam Elementalem in duram ac siccam substantiam coagulantem ; nemo facilè vitio nobis vertet , si præ-euntes *Chrysostomum* , *Augustinum* , aliosque secuti , *Spiritum illum Domini* , capit. illo primo *Mosis* , v. 2. dictum : pro vir-

virtute quadam fecundante semina, ac Aquis incubante acceperimus, quem aliàs *Cælestem Spiritum*, in hæc inferiora effusum, appellare consuevimus: Item *Ignem Universalem*; quæ, & plura ejus nomina alia, in subsequendis videbimus. Quatuor verò præcipuè sunt; brevissimè quantum citra obscuritatem fieri poterit, de hoc Spiritu dicenda: *Primò*, Origo ejus ostendenda, *Deinde*, Nomina ejus varia explicanda; *Tertio*, ostendendum; eundem causam esse perfectionis, omnium rerum, & *Quartò* denique quomodo, quæve virtute corpus assumat, & aquam coagulet; quomodo item specificetur; & quod ejus separatione factâ, corpora cuncta in Aquam Elementalem redeant.

Originem quidem quod attinet, non hîc quærimus primam, à solo Deo petendam; sed ex quo potissimum fonte, opere creationis absoluto, ad hunc usque diem in sublunaria hæc, haud interruptè defluerit. Atque hunc dicimus esse *Solem*. Hic enim nisi radios suos, & vitalem illorum vim, per totum orbem spargeret, cunctis viventibus necessariò

& subito emoriendum esset. Quamvis enim cuncta, ex præexistentibus generentur seminibus, uti in antecedentibus fusè fatis demonstratum est, semina tamen nunquam in actum vegetationis deducerentur, sed æterno sopita somno quiescerent, nisi motore quodam *Spiritu* instructa essent explicante eadem. Quæ motoris Spiritus particula per traducem propagatur, neque deferit semen, usque in extremam sui annihilationem, at verò non sufficeret Spiritus hujus tantilla particula, vegetationis operi integrè absolvendo, nisi à *Solaribus* radiis incubantibus multiplicaretur.

Manifestum hujus rei testimonium præbet Hyems. *Sole* enim longiùs à nobis recedente, ut radii ejus non adeò directè ac perpendiculariter Terram, feriant, anne Semina Terræ visceribus concredita torpent ac dormiunt? anne vegetabilia marcescunt; folia, flores, ipseque tandem vitalis succus arbores deserunt? Anne Animalia ipsa vigorem suum amittunt? aves, ac præcipuè hirundines, omni vitali Spiritu sufflaminato, ad maris littora, sensus omnis mo-

motusque expertes quiescunt? Ast verò redeunte iterum verno tempore, ad nos *Sole*, bone Deus! quæ quantaque mutatio rerum observatur. Semina germinare incipiunt, & veterum excutiendo, ad motum se accingunt; Variique generis vegetabilia, herbæ, arbores foliis suis floribusque ornatae, è tumultu resurgunt. Animalia hirundines, motum ac sensum recuperant. Quicquid denique orbis habet vitæ capax, vitâ donatur.

Quæ certè omnia, absente ac præfente *Sole* fieri videmus. Unde inevitabilis nos cogit necessitas; tenuissimas, maximeque mobiles substantias, s. Spiritum quendam Universalem vitæ plenum, in solis radiis existere, ut concludamus; qui ejusdem cum illo, in fecundis rerum Seminibus præexistente naturæ sit, alioquin non posset hunc movere. Quod ipsum cum observarent Sapientissimi Majores nostri, dicebant elegantissimè certe; *Solem verno tempore parentem suum senio aggravatum, & ex hyberno frigore*

frigore admodum debilem , & penè emortuum calefacere & vivificare. Neque verò vis alia est & diversa , quam Astra largiuntur , à Solarium radiorum virtute ; cum enim ipsa eandem à Sole acceperint , eandem reddunt.

Cùm itaque cuncta semina , universalis hoc motore orbata , sterilia esse viderent, iidem Majores nostri, *ad hominis generationem non hominem tantum requiri* docebant ; *Sed Solem quoq.* Non quòd hunc crederent semen humanum cœlitus ad nos deferre , sed ut semina hoc ipsa fœcunda reddi docerent , sterilia cæteroquin.

Posuisse verò hunc *vivificantem & Igneum Spiritum* Summus rerum Creator ideo in *Solis* globo videtur , ut ex eo tanquam adspectabilis mundi centro s. medio vivifica vis, tantò commodiùs in cætera universi corpora dimanare posset. Est igitur *Sol* in Macrocosmo, quod *Cor* in Microcosmo, & virtus ab utroque defluens , specie eadem. Vis enim vitalis cordis s. *Innatum Calidum* communiter dictum, est tanquam rivulus ab universalis fonte *Sole* emanans, omniaq; illa in
suo

suo Microcosmo analogicè operans, quæ pater ejus in Macrocosmo operabatur.

At verò cum Omnis agentis virtus, immediatè debeat adesse patienti, *Sol* verò tot à nobis diffitus parasangis conspicitur, quodnam quæso medium est, per quod vitalis illa vis in hæc sublunaria defertur? Et certè præter *Aërem* nullum hoc est aliud. Hinc enim tam necessarius nobis est *Aëris* usus; & cum *Ventus* reverà nihil aliud sit, quam aër motus, idem utriusque commodum erit & venti & aëris. *Aër* enim vehiculum quoddam ac vestimentum est, vitalis Spiritus, quem nisi ad nos continuo deferret, marcescerent Plantæ, interirent animalia, universus denique mündus languesceret.

Ventus certè, quàm sit ad vegetabilium vigorem & incrementum necessarius, & vulgò notum est, non item quare tanta ejus sit necessitas. Nulla verò hæc est alia, quàm quod *ventus portet in ventre suo* (uti loquuntur Philosophi) *Vitæ Spiritum*, & *calidum motorem*, innatum cuilibet semini *calidum* moventem. Ne-

Neceſſitatem hancce Aëris, elegantiffimis certè Experimentis demonſtravit, Prænobilis Dn. *Otto de Guericke*, in *Experimentis* ut vocantur *Magdeburgicis*. Uvas hic vaſi vitreo immiſit, aëremq; extraxit, atq; ita obſervavit, omnem ſaporem eaſdem amittere. Idem, Paſſerem, aëre privato vaſi, incluſit, qui illicò, aperto noſtro Spiritum difficilius ducere viſus eſt, tandem verò ſine omni anhelitu diſtento noſtro ſtetit, hocq; oris habitu immutato quietus omnino, vitalis cordis flamma exſpirante, ipſa vitâ privatus concidit. Quemadmodum enim, utijam laudati Dn. de *Guericken* alio experimento edocemur, flamma candelæ ex cera alba factæ, ſimiliq; vaſi impoſitæ, pædetentim una cum exſucto aëre contrahitur & conglobatur; donec tandem cum coeruleo colore ad cacumen Ellychnii provecta extinguitur, propterea quod in locum extracti cum aëre vitalis Spiritus, ejuſdem ſubtilioris licet, cum flamma materiæ ac naturæ; flamma Ellychnii concedat: Ita quoque *flammula noſtra vitalis*, certo certius ac ſubito quidem extingueretur, niſi à vitali

vitali Aëris Spiritu conservaretur & multiplicaretur.

Quare non ideo tantum aëre indigemus, quod multis visum est Anatomicis circa Pulmonum usum occupatis, ut hoc ipso tanquam vehiculo quodam sylvestres è sanguine fervente particulæ, foràs eliminentur, in expiratione aëris; Sed potissimum, ut occultus ille vitæ cibus aëre vestitus, à nobis inspiratione attrahi, cordi inspirari, adeoq; *iunctum ejus calidum, Ignisq; particularis* ab hoc *universali* foveri, vitæque ipsa conservari possit.

Neque *Metalla & Mineralia* absque aëre universi hoc Spiritu insignito, augmentum aut multiplicationem capere possent, ut jure ac merito à majoribus nostris dictum sit: *Mineras rerum, radices suas in aëre habere, caput autem & verticem in terra. Ferri Nitri v. g. mineræ, omninò ferè consumptæ, dierum cursu, insigne incrementum nactæ deprehenduntur, quarum cunctarum nutrimentum ac materiam, quamvis in antecedentibus ostende-*
rimus

rimus *Elementalem Aquam* esse, nunquam tamen hæc ipsa, in duram solidamque *ferri, Nitri*, substantiam, suâ sponte ac virtute propria, coagulari posset, nisi hic *universi motor* ipsam coagularet. *Sol* igitur *Parens* est Spiritus hujus : *Aër medium* s. vehiculum ejus, quo ad hæc sub-lunaria deportatur.

Quemadmodum verò *Sol* hujus Spiritus Pater dicitur à Philosophis , ita *Luna* ejus mater ab iisdem appellatur, ideò quidem quod *Luna* humido ac aquis præesse credatur, in aquam verò potissimum hic universi Spiritus , vires suas exferat ; hic enim *Spiritus* est , qui Aquam in corpora pro seminum diversitate varia coagulavit, & se habet ad Aquam , ut Mas ad fœminam , forma ad materiam.

Et si verò hic *Spiritus* natura sua *unicus* sit ; varia tamen nomina, quod dilectissimis parentum liberis præ cæteris contingere proverbio dicitur , accepit. Ita *Mercurius* appellatur , quia cui se applicat ejus naturam suscipit, *informis* per se, *Omniiformis* autem propter aptitudinem, quâ omnibus formis applicari, ac

ab iis determinari potest. *Catena aurea* quia hoc mediante *Spiritu*, superiora cum inferioribus conjunguntur. *Ignis*, quod parens ejus *Sol* reverà ac formaliter *igneus* sit, unde filius ejus non potest non esse *igneus*, ejusdem nempe cum patre naturæ. *Solem* quidem formaliter calorem non habere, aut *Igneum* esse, sed eminentertantum, acerrimè disputant *Peripatetici*, quo jure aut veritate ipsi videant. Longè certiora sunt Experimenta illorum, qui *Solem igneum esse* dicunt *formaliter talem*; quomodo enim quæso alioquin Solares radii concentrati, illa præstarent omnia, quæ *Ignis* culinaris? Et præterea, manifestissimè hoc docent observationes Celeberrimorum Mathematicorum, *Ottonis* de *Guericken*, *Kircheri*, *Riccioli*. *Solem* nempe, circa proprium axem, incomprehensibili celeritate *motum*, beneficio telescopiorum sæpius observatum esse vehementer ebullire, & ab hac vel altera parte in formam montis protuberare, interim autem se subito in ordinariam rotunditatem convertere, haud aliter ac si intus concepta intrinsecus luce

luce rumperetur, & in fulguris morem, effulgeret, jubare momentaneo subful-tans, flammamque emittens; quibus quid potest esse manifestius? ac proinde, quidni universi Spiritus à Sole indefinenter, in & per cuncta diffusus Ignis appelletur. Deinde etiam, omnes ac singulæ istæ misti particulæ; quæ ad velocissimum motum concitatæ, Ignem nostrum culinarem constituunt; olim hujus universi Spiritus particulæ fuere, & à solari globo emanârunt; unde necessariò sequitur; & ipsum Ignis fontem Igneum esse; quanquam in certo mixto, quæ sunt Ignis particulæ jam determinatæ sint, à proprio mixti semine, unde *Particularis hic Ignis* appellatur à Philosophis, quemadmodum ille nondum certo individuo insitus *Universalis* nominatur. Hinc docebant sapientissimi majores nostri; cuncta propter inclusum in se *Calorem* vivere & nutriri; hic enim rebus cunctis, attactu etiam frigidissimis inest, & à vulgaris Ignis calore, solâ particularum quiete, aut potius motu tardiori discernitur, actionum cæterorumque naturalium autor unicus. Atq; ex
his

his quoque intelligitur; quare idem Spiritus dicatur *inextinguibile & incombustibile Sulphur*, hoc enim naturâ suâ est *Ignis* quidam *latens*, motu ad conflagrationem *excitandus*; illud verò universi *incombustibile* est, propter indefinens, & ad diem novissimum usq; , à *Sole* suppeditandum alimentum. In *animalibus* potissimum appellatur *Calidum innatum*, quod hujus *Ignis* particula, animalium seminales Ideas comitetur, in ipsum animalium uterum usq; , fœcundet illas, explicet, alimentum apponat, adeoq; nobis connascatur, quod postea in homine lucem ingresso, alimentis commodis, tùm aëris præcipuè inspiratione conservatur & multiplicatur. Atq; ut rei compendium faciam, variaq; nomina ac ferè innumera, quibus unicus hicce Spiritus insignitur, aliis explicanda relinquam, qualia sunt *Sol centralis*, *Avis Hermetis*, *Ignis Sapientiae*, *Archæus*, &c. elegantissimè appellatur *Natura* vel *Leo viridis*. Hujus enim motoris beneficio, prata æstivo tempore venustissimâ viriditate gaudent, ac superbiunt arbores; cuncta enim geminare facit, *Leo* verò appellatur, pro-

propter robur, quo cuncta movere potest, & penetrare: quod *Hermes Trismegistus* docuit, appellando illum in *Tabulâ Smaragdina*; *Totius fortitudinis fortitudinem fortem.*

Hic itaque Spiritus, reverà omnium perfectionum corporis naturalium principium est ac autor, in triplici Naturæ Regno. Hujus beneficio vivimus, nutrimur & simile nobis gignimus. Sole quidem meridiano clariora sunt, quæ demonstravimus ante, de Ideis ac signaturis rerum feminalibus, quod nempe hæ ad omnium specierum conservationem radicaliter sufficiant, & necessariae sint, cujus rei plurima quæ ibi videri possunt, adduximus & Rationis & sensuum testimonia. At vero steriles essent, in æternum Idæ istæ seminales & infœcundæ, nisi motor quidam accederet ac easdem explicaret; quem non ignoravit certè *Aristoteles*, quando de animalium generatione ita disserit. *Inest*, inquit, *in semine omnium, quod facit, ut fœcunda sint semina, videlicet quod calor vocatur; Idq̃ non ignis, nec talis aliqua facultas est; sed Spiritus qui in semine spumosoq̃*

mosque corpore continetur, & natura quæ in eo spiritu est, proportionem respondet elemento stellarum, nempe illud, cui anima & virtus plastica proximè insunt, neque hic sensu deprehenditur, neque ejusmodi humor est qui in coitu prodire cernitur, verum quid spirituosum & cælestis naturæ in eo latens. Neque difficile foret innumeras alias gravissimorum Philosophorum autoritates, Aristotelicæ addere, si in re propria luce clara hoc ipsum liceret.

In *Generatione* certè *animalium* res clarissima est. Quod si enim animalium semina prolifica cæteroquin ac fæcunda, unicum saltem minimumque temporis momentum, aperto aeri exponerentur, eodem momento omni fæcunditate privarentur; propterea, quod Universi iste Spiritus in aere habitans, fratrem suum illicò ad se raperet, hic quoque quod nondum incorporatus facile sequeretur. Hinc provida mater natura, talem uteri formavit structuram, ut post conceptum prolificum, internum ejus orificium arctissimè claudatur, neque ullus externo aeri aditus ad uteri penetralia pateat, secus si fieret, frustra inde tætus expectaretur. Quando verò eo, quo naturaliter debet modo intra carceres uterinos conservatur non torpet otio, sed illicò Idearum, quibus destinatus, explicationem aggreditur, & cum à primo formationis puncto incipiat nutriri & crescere foetus, hic spiritus singulis musculis ac partibus assis-
alimentum foetui apponit, usque dum adeò angustii carceris pertæsus, in lucem publicam prodeat. Cum tamen tantilla hujus vitalis ignis parti-

X

cula,

cula, quæ humanis Seminibus inerat, non potuisset per se sufficere, ad integram humani corporis Ideam evolvendam, & particulas alimenti apponendas, auxilio utebatur spiritus matris, à quo multiplicatus tantò reddebatur robustior. Quod ipsum ne cui obscurius videatur, consideret velim quæ in antecedentibus circa Idearum doctrinam asseruimus; *Vitalem* matris, ac foetus in utero constituti animam, revera unicam esse, propter subiectorum tamen numerum adeòq; per accidens tantum numerosam dici, quemadmodum diversis ac separatis lignis accensis, igni numerus tribuitur, qui tamen conjunctis lignis, saltem unus est. Homine itaque hanc lucem ingresso, idem spiritus est, qui alimentum assumptum in partium substantiam convertit, qui in utero (alimenta vero hæc omnia quod materialiter nil nisi aqua sint, in antecedentibus satis demonstratum est) Conservatur verò tum & multiplicatur haud interruptâ aeris in spiratione uti in præcedentibus diximus. Neq; adeò vivimus saltem ac nutrimur hujus Ignis beneficio; sed & simile nobis gignimus, quod enim sæpius jam dictum; cuncta prolifica semina, hoc motore explicantur.

Harum vero actionum omnium, quemadmodum hic solus & unicus autor est, individui nempe ac speciei conservator; ita eodem labefactato aut suppresso, ipsæ vitales actiones labefactantur & cessant, sive quod idem est morimur. *Mors* enim nihil est aliud quam *Calidi nostri innati à causa morbifica suppressio*, quod cuilibet accuratius intuenti clarum

rum erit. Neque alia est opera Medici, in morbis sanandis, quam ut hostilem, spiritui nostro motori interitum minantem causam, aptis remediis tollat, ita *Calidum nostrum innatum, vitalis spiritus, Natura* hoc onere sublevata victoriam reportabit, cuncta heterogenea ac inimica subiget, vel uti communiter dicitur humores coquet. Quemadmodum talem *innati* partibus calidi, virtutem, in externis vulneribus sanandis quotidie videmus. Cum enim vulnus fit, sanguis extravasatus ad contactum aeris aclescere ac corrumpi incipit, unde inflammatio, quæ nisi tempestivè tolleretur tandem in gangrænam & sphacelum abiret, s. *innatum* partis *calidum* supprimeret, quo suffocato, moriretur ista pars. Quibus malis avertendis nullum auxilium afferre potest Chirurgus aliud, quam ut commodis medicaminibus, hostilem innato partis calido aciditatem, è sanguine putrefacto profectam tollat, ita inflammatio, dolor, & quæ alias imminebant pericula procul arcebuntur, & ipse spiritus partis, in libertatem assertus vulnus sanabit, ac carnem (quod in nullius medicamenti potestate est) generabit. Sed de his alibi; nihil enim hic observandum aliud, quam, quod *Vivamus Nutriamur ac Simile nobis gignamus*, hoc unice hujus Universi spiritui tribuendum esse.

Vegetabilium deinde *Semina* non minus, quam Animalium, particulam hujus Spiritus desuper immissi possident; quæ Solis actione calefacta, vitam acquirit, ac evolvit Ideam vegetabilem ad certum quantitatis terminum; quam molis quantitatem

è Sola Aqua mutantur vegetabilia, uti pluribus in præcedentibus demonstratum est; Hæc verò, hujus Seminibus innati calidi ac ab universali spiritu conservati & multiplicati beneficio, coagulantur in partes pro Idearum varietate varias. Neque aliter se res habet in *mineralibus*, quorum incrementum ex Aqua est, ab universi spiritu coagulata, uti ex præcedentibus non potest esse obscurum.

Atque adeò *unicus* revera *Spiritus* est in omnibus tribus Naturæ Regnis qui dominatur. Neque aliud est spiritus, quo *vivimus*, ab eo quo *nutrimur* & simile nobis *gignimus*. Neque alius coquit Calor in *hepate*, alius in *Corde*, alius in *musculorum* substantia. Neque natura sua diversus est spiritus Elementalem aquam in *Vegetabilia* coagulans, ab eo qui eandem aquam in *Mineralia* convertit. Atque hinc erat quod *Democritus Orpheus* & multi *Pythagoreorum*, quoniam hujus cælestis virtutis particulam omnibus creaturis inferioribus inesse percipiebant, omnia Diis plena esse opinati sint. Deos verò omnes ad unicum reducebant *Jovem*, ut docerent; omnes vitæ actiones, ab unico universi spiritu regi ac conservari. Quamvis verò reverà *unicus* sit hic *spiritus*; adeoque, antequam incorporetur *indifferens* ad omnia tria Regna fecundanda, *specificationem* tamen acquirit s. *determinatur* pro *seminum* determinata natura. Ita si conjunctus fuerit cum semine *Vegetabili* fit ipse vegetabilis, si cum semine *Animali* aut *Minerali* fit Animalis & Mineralis.

Quare verò adeò facile cum seminibus jungatur; ratio aliquo modo patere potest ex antecede-

recedentibus; ibi enim diximus; singulis ac cunctis fecundis seminibus, particulam hujus motoris spiritus connatam esse; unde fit; ut hicce universalis, particulari isti & determinato facile conjungatur & simul determinetur. Et postquam rerum *Semina* verè & arctè cum hoc spiritu conjuncta fuerint, nullâ ratione naturaliter separari possunt, sed perpetuo conjuncta manebunt, quod ipsum summo studio tenendum erit, cum ad plurimarum rerum cognitionem pernecessarium sit. Atque hinc est quod *Vegetabilium sulphura*, toto cælo differant à *Mineralium*, & hæc ab *Animalium sulphuribus*, neq; inter se invicem ulla humana industria transmutari possint.

Si cui verò hæc adeò arcta *seminum* cum spiritu isto l. *sulphure* (synonyma enim hæc esse jam ante ostendimus & pluribus patebit è secuturis) conjunctio, paulò visa fuerit obscurior, attendat quæso quæ verissimè demonstrata sunt ab *Experientissimo Tachenio*, quod nempe cunctarum rerum *Seminalis virtus Acida* sit, & quod propterea *Acida* ducant *Alcalia* pro suo arbitrio, quod ipsum experimentis variis ex *Acido Silicis*, *Oleorum*, *Granorum Chermes*, *Vitrioli*, *Aluminis*, *Salis communis*, *Aceti destillati*, in unius generis *Alcali* regenerantium pulchre ostendit; tum verò sensibus aliquantò manifestius ex *Nitro* peti potest experimentum, hujus enim *acido spiritui* quæcunque etiam conjunxeris *Alcalia* propria figura etiam instructa, omnia tamen à *Nitri Spiritu* s. *Acido Sale* mutabuntur in *Nitri formam* h. e. Cylindricam sex facierum, for-

mam. Neque ratio alia est quare in fermentatione *Salis Tartari* cum *Tartaro crudo* bullæ, naturales *uvæ* referentes, conspiciantur; quam quod *Acidus Tartari* crudi *spiritus*, *Seminalem* adhuc *Vitis* proprietatem quandam, in ventre suo portet. Quemadmodum enim dictus *Tartari Acidus spiritus*, *Solis filius*, cum adhuc in vite existeret, pro *Seminis* sibi concrediti *Ideis*, *uvæ* formabat ex aqua elementali; ita idem *spiritus* coagulatus & corporeus factus à vite separatus etiam, ostendit in dicta fermentatione cujus *Naturæ Semini*, determinationem suam debeat, & quam arctè cum *Semine vitis* conjunctus sit.

Horum verò, tum in præcedentibus quoq; dictorum *Veritas*, non patebit clarius, quam si penetrabilia *Spiritus* hujus penitus adhuc rimati fuerimus, & ostenderimus; quâ præcipuè virtute aquam convertat in duram solidamq; substantiam, & quomodo ipse corporeus fiat. Quod ipsum quidem non ita accipiendum est, ac si *Spiritus iste* *Universi* omnis corporeæ molis, prout *Spiritus* propriè dicti, exspers sit, & aliquando corpoream molem induat; nemini enim hoc in mentem veniat; Sed quod *spirituosæ* istæ *particulæ*, corporeæ, minutissimæ, ac *Ignis* ille *invisibilis* à quo *Heraclitus cuncta genita docebat*, aqueis particulis incoagulatae, visibiles fiant. Alioquin ipsos *Solares radios* corporeos esse, illorum concentratio manifestè satis docet; hæc enim verus producit *Ignis* corpus nostrum afficiens, urens, non secus ac *Ignis* culinaris. Jam verò in antecedentibus, plurimis stabili-

tum est experimentis *Ignem* nihil esse aliud quam velocissimum motum *particularum acidarum* adeoque *corporearum*, unde certissima colligi poterit consequentia, & ipsum Solarem Ignem acidarum particularum motum esse.

Sed videamus hæc clarius, ac ostendamus, subtilissimas Universi spiritus particulas corporeas, natura sua *Acidas* esse, atque hæc *acida* virtute, Aquam in corpora solida & sicca coagulari.

Rerum quidem concrectiones ac coagulationes, cuinam potissimum principio acceptæ ferendæ sint, diversi diversa sentiunt. Potissimorum tamen eò tendunt sententiæ, ut *Salino* cuidam principio easdem deberi profiteantur; quanquam quod pace illorum dixerim, hoc ipso nondum expleantur curiosorum desideria. Cum enim *Salium* non unicum genus sit, explicari certe debebat, cui potissimum *Salium* generi coagulationes rerum tribuendæ sint. Tria verò potissimum sunt *Salium* genera. *Alcalia*, *Acida*, *Neutra*, è quibus unicum *Acidum* est, cui rerum coagulationes debentur. *Alcalia* non tam coagulant quam coagulantur: *Neutra* seu ex *Acido* & *Alcali* quæ constant, non tam coagulantur nec coagulant, quam solvendis corporibus apta sunt, *Acida* verò rodunt & rodendo coagulantur.

Acidi Salis virtutes in coagulandis rebus ac volatilibus figendis quantæ sint, qui scire desideraverit, singularia saltem inspiciat, atq; experimenta obvia, nec dubitabit amplius.

Salia Cornu Cervi volatilia. *Ammoniaci*, quam-

vis summè volatilia sint, ab *Acidis* tamen spiritibus s. salibus adeò *figuntur*, ut apertum aliquamdiu ignem sustinere possint; additione autem *Alcalisati Salis*, quando *Acidum figens* denuo separatum fuerit, in pristinam volatilitatem redeunt fixata Salia.

Antimonii Sulphura, quæ acidis suis particulis volatilibus, ac tenuioribus, ventriculi ac intestinorum tunicas convellendo, vomitus excitare, ac per interiora ad excretionem alvum incitare solebant, *Acidus Nutri Salibus* adeò *figuntur*, ut magnæ virtutis diaphoretica evadant. Neque ullum absq; acido coagulati corporis afferri potest exemplū.

Acidum Sal & sulphur est plumbi, quod mercurium *coagulat*, atque quadantenus *figit*.

Acidum Antimoni sulphur est, quod eundem mercurium in purpureum pulverem s. cinnabarium *coagulat*. Nec minus *acidum* sulphur est, quo semetipsum *coagulat* mercurius, digestis aliquandiu.

Acidum Sal est, quod impedit, ne p. d. fluant Salia & dissolvantur in Aquam elementalem. Quod si enim violento nimis Igne calcinata fuerint *Alcalisata*, magnam *coagulantis acid*i volatilis jacturam facient, & exposita aeri facillime in aquam solventur; quod ipsum præcavetur, si loco amissi acidii aliud reddatur. *Alcalisatis* enim Salibus si in calcinatione tantillum saltem *Sulphuris* (Acidi) additum fuerit, non adeò facile p. d. solventur. Atque hinc est, quod Tartarus crudus vel cremor Tartari p. d. non solvantur, magnâ enim acidarum par-

particularum copiâ, vel Solo gustu manifestè factis perceptibili, gaudent. Quod si verò Ignis & calcinationis auxilio hæ separentur (hinc acidiusculus ille in Spiritus Tartari præparatione liquor) haud difficulter in aquam abibunt.

Acidum item *Sal* est, quod Urinæ alcali *coagulat* in calculos. Hinc enim *Acida vina* tantum calculosis detrimentum afferunt, Spiritus vini rectificatissimus si cum Urinæ Sale conjungatur, aliquot mensium leni digestionem calculus inde prodit (Lapis animalis aliquibus dictus) punicei coloris; hujus quatuor partes, novam spiritus Urinæ partem unam, in suam substantiam convertunt; & denuò hujus partes quatuor aliæ, aliam spiritus urinæ partem coagulabunt. & ita in infinitum. Hæc verò *coagulandi* vis atque potestas, ex *acido* Spiritus vini proficiscitur, coagulante alcali Urinæ. Neque aliter generatur calculus in corpore humano. Hinc enim crebræ istæ calculosorum stranguriæ ab *acido* ortæ, ac oleosis, acidumque temperantibus tollendæ. Neq; alius naturæ sunt, quibus ipsi Nephritici dolores sopiuntur.

Acidum Sal est, quod si lices, lapidesque omnes *coagulat*. In calce enim viva, non alcalia tantum latere Salia sed *acida* quoque actio illa ac reactio particularum aquâ affusâ docet, adeò ut *Ignem* quandoque emittat, hic autem sine *acido* Sale nullus esse potest. Atque hoc *calcis vivæ acidum est*, quod è parietibus recenter dealbatis, neque adhuc exsiccatis, per aerem vagatur, & cum aere simul attractum, vel pulmones exulcerat, vel vita-

lem nostrum ignem supprimendo ac *figendo* mortem affert, quod aliquibus contigisse, dormientibus præsertim, experientia constat.

Acidum Spiritûs vini est, quod spiritus potantium *figendo*, soporem, ac nonnunquam mortem causatur.

Acidum Carbonum candentium sulphur est, quod itidem *figendo* particularum subtilium s. spirituum nostrorum motum, *suffocat*; cujus varia exempla ab aliis consignata videri possunt.

Acidum Opii sulphur est, quod *figendo* spirituum motum, somnum conciliat, tempestivè adhibitum; intempestivè verò mortem.

Acidum fulminis sulphur est, quod spiritus *figendo* & *coagulando Carochen* quandoque attulit. Et omnium certe soporosoform melancholicorumque morborum causæ, in unico figente ac coagulante acido Sale quærendæ sunt. Sed mittamus illa quæ ad Pathologiam spectant, & revertamur in viam, unde digressi sumus.

Lacti si Alcalisatum Sal injectum fuerit *Helmontio* atque experientia testibus, butyrum inde non impetratur, quia *Acidus coagulator* ita absorbitur.

Quæ cum ita sint, neque ullum contrarium possit afferri exemplum; non dubito confidentissimè affirmare, & illum *Universi spiritum, aquam, in vegetabilia, animalia mineralia coagulantem*, *Acidum esse*. Atque ab hac sententia majores nostros ac sapientes, non alienos fuisse, non pauca vestigia docent, Hinc enim Universi istum spiritum appellabant *Sulphur incombustibile & inextinguibile, Ignem, Calorem*; Sulphura vero omnia, natura sua acida esse, atque in harum *acidarum* particularum motu, *Ignis, ac caloris* rationem consistere ad satietatem ferè ac nauseam in præcedentibus demonstratum est; Et cum

cum hæc *Acidas sulphureus* particulas, propria Seminum habitacula cognovissent, atque præterea, ab iisdem, corpora coagulari omnia adverterent, *sulphur* το ὀξύον appellarunt. Expresius vero docuit hæc Nobilis Polonus Cosmopolita; cum à Sulphure (*Acido*) vegetabili (*vegetabilis semine determinato*) Aquam coagulari dixit in vegetabilia, à *Sulphure* animali in animalia, à *sulphure* Minerali, in mineralia.

Acidus igitur *spiritus* iste est, qui aquam in corpora pro Seminis diversitate varia *coagulat*, & simul coagulatur. Quemadmodum enim cuncta acida rodunt & coagulant, coagulando verò, & ipsa coagulantur, ita & hic universi *spiritus acidus* coagulando coagulatur, & *corporeus* fit.

Atque adeò ab hoc *Acido* universi *spiritu* profectum est *Acidum* illud in cunctis vegetabilium succis observandum, quod ipsum principium est actionis s. fermentationis succorum; hinc ab *Helmontio*, *fermenti* nomine appellatur.

Si tamen in ullo vegetabili *Acidi* hujus *spiritus*, *Solis filii*, in semine coagulati, aperta testimoniaprehenduntur, certe in uvarum succo ad Rhenum crescentium, s. vino Rhenano, eadem manifesta sunt. Grata enim illa Rhenani vini aciditas *Solem* habet patrem; neque quicquam aliud est quam *Universi spiritus in semine vitis coagulatus*. Atque ex eo est; quod ex modico Vini Rhenani usu *Ignis* noster *vitalis*, *Calidum innatum*. (*Naturam* vulgus nominat) tantum roboris nanciscatur, fratres enim sunt unius parentis, diversis quanquam fominibus ad aliam familiam, illud quidem ad Vegetabilem, hoc verò ad animale determinati.

Adeoq; & nostrum *innatum calidum*, cunctorumque animalium *Acidum* est; *Acidus spiritus*
est,

est, qui coquit in *Stomacho*; *Hepate*, *corde*, *musculis* omnibus. Acido fermento mediante, Sanguis è fluida, in solidas substantias coagulatur, quemadmodum elementalis aqua, ab *acido vegetabili* fermento, in ligna, cortices, folia, coagulatur.

Neque alium coagulatorem *metalla* habent & *Mineralia*, præter Acidum. *Mercurium* certe vulgi, ex aqua elementali, beneficio metallici sulphuris (*Acidi*) coagulata, profectum esse, constans ac vera est Philosophorum sententia. Idem vero *Mercurius* à diversis sulphuribus acidis, in metallica corpora varia postmodum coagulatur. Atque hæc sunt *Sulphura* ista *Metallica* ac *Auri* præcipue, pro vera Tinctura exinde impetranda, quæ tanto studio totque laboribus quærentur, *Acida* verò sunt & Universi spiritus particulæ.

Quare hæc tandem firmissima stabit conclusio *Coagulatorem, & motorem rerum omnium* (Deum tanquam causam primam, semper hîc excipimus) *universalem*, à *Sole* profectum, cunctis fecundis seminibus innatum, acidum esse, atque hac aciditate, corporum ex aqua concretionem præstare, quin etiam coagulando alia, ipsum coagulari & corporeum fieri.

Hæc verò, quamvis citra omnem dubitationem verissima sint, unicum tamen adhuc reliquum est argumentum, adeò manifestum ac evidens, ut nullum magis. Ut enim uno intuitu videre possis Lector; *Dari revera universalem quendam cunctorum corporum coagulatorem, Acidum, proprium seminum domicilium, Aquam in varia corpora coagulantem*, separabo denuò spiritum huncce à corporibus, & ipsa simul separata erunt semina, migrabuntque corpora in *Aquam elementalem*.

Quamvis verò in antecedentibus mechanicè ostenderimus, posse corpora ultimatò in aquam de-
nuo reduci, fundamentum tamen ejus, operatio-
numque rationes huc usque studio reticimus, ut
universi hujus coagulantis natura tanto clarius pa-
teret. Aggrediamur itaque rem ipsam, ita tamen
ut quantum fieri poterit, breves simus, & quæ alibi
jam dicta sunt mittamus, neque enim crambe, bis co-
cta grata esse potest.

Tartarus vini, aliorumque vegetabilium, in
Aquam redit, si calcinatus fuerit; calcinatione verò
separantur ab illo particulæ *acidæ* (hinc phlegma
illud Acidiusculum officinarum, loco spiritus Tartari
genuini alcalici amaricantis quod vendunt) aliquot
tantum relictis, quæ cum *Alcali* volatili & *Terra*
in *Alcalisatum* Sal abeunt (uti pluribus in antec-
edentibus demonstratum est) Calcinatus hicce Tar-
tarus vel *Alcalisatum* Sal si aeri expositum fuerit
in puram tandem aquam abit elementalem (modus
separationis in antecedentibus quoque allatus. Ra-
tio verò operationis hæc est, quod *Alcalisatum*
Tartari, *maxima coagulantis acidi portione pri-
vatum sit.* Tartarus enim crudus p. d. non fluit.

Atque in hoc *Alcalisato* Tartari Sale, ipsa post-
modum *Olea* & *Spiritus vini* vegetabilium, *acidis*
suis particulis privantur atque in *Aquam* abeunt.

Ita *Olea*, si ab *Alcali* Tartari crebrius abstra-
hantur in meram resolvuntur *aquam*, propterea
quod, *Oleorum Acidum* (tot experimentis demon-
stratum) ope *Alcali* separatum fuerit. Eodem modo
resoluta olea s. *Spiritus Vini rectificatissimi* cæte-
roquin, ab *Alcali* fixo abstracti *acidis suis particulis*
orbati, Aqua fiunt.

Eadem ratione, Animalium *Olea* & *pinguedines*,
in Sale *Alcalisato*, *acidæ* suas particulas amittunt,
atque

atque in *Aquam* redeunt. Ipsa animalium Salia verò volatilia Urinosa tantillum saltem *acidi* possident, & ad aerem facile in liquorem solvuntur; quemadmodum Urinosa volatilia vegetabilium cum acidis pro Alcalisato sale conficiendo colliquata, p. d. ultimatò in meram *aquam* abeunt.

Ipsum verò Alcalisatum Sal, quo mediante reductio illa corporum in *Aquam* peracta fuit, tandem p. d. ultimatò in *aquam elementalem* resolvitur.

Mineralia tandem & *metalia* in *Aquam* reducuntur, reducta prius in suos mercurios. Quemadmodum verò *mercurius* à variis Sulphuribus *Acidis* in varia metalla coagulatus erat; ita per eorundem Sulphurum separationem, denuo in lucem prodit. *Antimonii* igitur *mercurius* (docente idem Præcellentissimo. Langelotto) impetratur, variorum Sulphurum; quibus illa metallorum matrix prægnans est, *Separatione*, Separatio vero *Acidorum Sulphurum*, alcalisatorum Salium beneficio impetratur; ab his enim primò in Regulum abit Antimonium (partem mercurialem) à quo, si Alcalium beneficio quæ reliqua sunt *Sulphura* separata fuerint, currens inde mercurius prodit. Ipsum verò *mercurium* qui omni Sulphure privare noverit, *Aquam* inde habebit *Elementalem*.

Neq; alio modo agunt, qui ex *Auro* mercurium quærunt, quam ut *seminale Auri Sulphur acidum* ab eo sepatent.


Atq; adeò, quod breviter demonstrandum fuit, Quemadmodum *Universi* hicce *Spiritus*, corporumque cunctorum coagulator, *Solis filius*, *seminibus cunctis* fecundis incoagulatus, movens illa ac explicans, & ab iisdem determinatus, in differens alioquin, *Acidus*, ex *Aqua* tanquam universali ac unico cunctorum corporum principio materiali, auxilio semi-

num omnia corpora coagulavit. Ita eodem spiritu à corporibus & cum illo virtute *seminali* tanquam formali & essentiali totius parte separato, eadem in *Aquam* elementalem s. alteram & materialem partem resolvuntur.

Quare hinc tandem Experimentis nostris & meditationibus circa Naturalium rerum Principia, finem imponamus, quando hoc saltem tribus verbis monuerimus; Celebratissimam illam *Hermetis Tabulam Smaragdinam* præter jamjam ostensum universi mundi Spiritum, nihil docere aliud. Hoc unum enim spiritu perpetrantur miracula totius mundi; ab hoc omnes res nata adaptatione. Pater ejus est Sol, Luna mater, portavit illum ventus in ventre suo. Pater omnis Telesmi totius mundi est hic &c. Vincit omnem rem subtilem, omniaque solida penetrat. Hic est totius fortitudinis fortitudo fortis. Ab hoc adaptationes sunt mirabiles. Sic mundus creatus est. Sic interibit mundus, hujus enim particulis acidis cuius corpori insitis, jussu Omnipotentis Dei, ad motum excitatis, die novissimo conflabit mundus, & universi hujus finis erit.

O QUAM MIRABILES, SUNT TUÆ
VIÆ DOMINE STULTUS NON CAPIT
ILLA, SNEC INSIPIENS INTELLIGIT.

F I N I S.





Errata Extantiora.

Pag. Lin.

- 3 21 divortio.
9 1 eorum productos.
12 24 Ast. verò,
14 24 ulla.
15 11 Vitro.
38 20 commiserunt.
49 14 lithargyrium.
64 28 stabilitum.
66 14 lucrentur.
70 4 appareant.
77 24 hæc.
87 5 præexisterunt.
105 8 præextitisset.
19 accedentibus.
109 13 subsecuturis.
112 1 suspicari.
2 è fuligine.
118 22 possit.
120 18 è defectu.
24 alieniora.
125 24 asserenda.
134 21 sum assecutus.

Pag. Lin.

- 138 21 digeruntur.
140 6 assusus fuerit,
7 unicam.
152 25 Motus.
165 5 Quid.
166 5 proprius.
174 4 faciat.
177 8 pro homine semine.
180 2 Ille.
187 11 conformatio.
225 11 contingeret.
235 23 Magnam.
249 4 Idearum doctrinam.
260 10 quas.
276 10 illarum.
277 13 habeat.
284 8 Salibus.
289 18 relinquatur.
290 25 immerforum pro-
prietates.
300 3 Nox.
301 2 vestitur.

Reliqua velut ; Mōdica, sicca, Ellychnium, fætus,
Chalybs, obscurum, arderet, Borax, granum, unicam &c.
Benevolus ac æquus Lector ipse emendat.

